

同治中興京
外藩議約編
八卷

每冊實銀貳兩

敘

粵稽三代以上中興令辟若殷之高宗周之宣王尚
已迄今讀尚書說命諸篇至傅巖爰立甘盤舊學恍
然見殷宗納誨之切念典之勤用能格皇天而纘湯
緒誦詩至崧高烝民韓奕常武則尤歎申伯韓侯召
穆公之倫出納旬宣經營四方江漢之師如雷如霆
固由文武遺澤之長涵濡有年人材鼎盛亦唯周宣
王側身脩行知人善任於以撥亂反正造車馬攻同

之烈匪易也洪惟

穆宗毅皇帝沖齡嗣服躬遘殷憂上賴

七廟眷佑之靈入稟

兩宮思齊之教卒能削平僭偽綏靖邊陲偉烈豐功為
書契以還所罕觀維時親賢夾輔臯夔布列二三中
外大僚其導揚

聖學平章軍國者視版築荒野之士所就孰多若夫擁
旄專閫禽渠斬馘區宇蕩平神州再造較之大雅所

稱築齊城而征徐國區區平淮瀆一隅之亂者其規模之廣狹又不可以同日論

側席求賢豪俊輩出

中興事業甄殷陶周盛矣哉比

大政親裁六幕仰化

堯臞禹胼宵旰忘倦

橋山弓劍遽棄臣民薄海黔庶攀號莫逮願

功德之景鑠則赫乎歷久弥彰者也

天子誕膺寶祚孝思維則方

命儒臣編纂

實錄年經事緯昭示來茲唯是

史宬尊藏之書職非清要未由仰觀魏之蕩民莫能
名攷自甲子燕遊日閱邸抄每見中外臣工條陳時
事者輒手錄成帙今年春友人見而寶之謂同治一
朝芟夷大難六官成法因時損益者尤多地道無成
才難斯盛觀諸臣之崇論閎議益見

先皇帝虛懷翕受孜孜求治之盛心爰憇憑付之梓人
嘉惠同志蓋將使章句之士陬澁之民略識

本朝掌故並令食毛踐土者思此十有三年中

廟堂擘畫何等焦勞纔有此出水火而登衽席之一日
庶幾忠愛之忱油然觸發則又未始非世道人心之

小補云

光緒元年太歲乙亥季夏之月

漸江陳弢序於宣南行館

--	--	--	--

凡例

一是編專刊同治一朝奏議其咸豐十一年以前及今光緒元年以後中外各摺概不登錄以示限斷

一所刊奏議皆曾發 閣抄或已見專集者其未經明發之摺匪特無從搜採亦於功令不宜

一凡條陳時事或准或駁原非一律然觀切問齋支鈔經世文編諸書所采名臣奏疏亦非全經 俞允者以已發邸鈔例無禁忌故取錄之

一 中興已來名卿碩輔規畫孔多然尋常奏報非有朝章國故關係其參劾諸摺亦無甚崇論閎議概不及登

一是編陸續付刊其次第祇畧爲編排未能條理井井且各疏或得之展轉傳鈔不免謬誤或得之報房舊刻則麻沙斷爛校正尤難閱者諒之

一是編遇應三擡雙擡者敬謹空格不復提行用近刻曾文正奏疏例取省篇幅

同治中興京外奏議約編目錄

卷一

杜漸防微疏

會銜

弘德殿大臣

祁寯藻

倭仁

李鴻藻

長治久安疏

御史

張緒楷

請飭廷臣直諫疏

內閣侍讀學士

鍾佩賢

請崇節儉片

鍾佩賢

請崇尚節儉片

御史

劉毓楠

敬抒愚忱疏

御史

賈鐸

禁言祥瑞疏

御史 邊寶泉

敬陳管見疏

給事中 劉毓楠

敬陳管見疏

御史 馬元瑞

政期核實疏

御史 朱澄瀾

及時防弊疏

御史 王書瑞

請除近日流弊疏

御史 孫翼謀

應 詔陳言疏

福建巡撫 王凱泰

積穀練兵疏

贊善 徐申錫

懇 停賜雙俸疏

恭親王

懇收回 成命疏

閩浙總督 左宗棠

懇收回

成命疏

江西巡撫

沈葆楨

陳請終制疏

山東巡撫

閻敬銘

籲

恩開缺疏

兵部侍郎

彭玉麟

--	--	--	--	--	--	--	--	--	--

杜漸防微疏

弘德殿大臣

祁寯藻

倭

仁

李鴻藻

臣等恭閱邸抄本月十四日御史劉毓楠奏請崇尚節儉屏絕浮華一摺奉 上諭逆氛肆擾兆姓流離正君臣

交儆之時豈上下恬熙之日我

兩宮皇太后痛念

山陵未安民生未奠孜孜求治宵旰不遑所有內

廷供奉業已隨時酌減爾內外大小臣工宜體此意及時振作共濟艱難毋蹈奢靡之習貪耳目之娛用付朝廷崇實黜浮無敢戲豫之至意等因欽此中外臣工祇承

訓誡自罔不力求儉約矣而臣等猶有過慮者

皇上

冲齡御極智慧漸開當此釋服之初吉禮舉行

聖心

之敬肆於此分風會之轉移卽於此始則玩好之漸可慮也游觀之漸可慮也與作之漸可慮也嗜好之端開不惟有以分 誦讀之心而海內之仰窺意旨者且將從風

而靡安危治亂之幾其端甚微而所關至鉅可無慎乎方今軍務未平生民塗炭時艱蒿目百孔千瘡誠如 聖


諭正君臣交儆之時非上下恬熙之日也伏願 皇上

恪遵 慈訓時時以憂勤惕厲爲心事事以逸樂便

安爲戒屏玩好以節嗜欲慎游觀以定心志省興作以惜物力凡 內廷服御一切用項稍涉浮靡概從裁減雖向例所有亦不妨量爲撙節如是則外物之紛華不接於耳

目詩書之啟迪益歛夫心思將見 聖學日新 聖
德日固而去奢崇儉之風亦自不令而行矣臣等區區愚
悃爲杜漸防微起見不揣冒昧謹合詞恭摺具陳伏乞

皇太后 皇上聖鑒謹奏



--	--	--	--	--	--	--	--	--	--	--

11

長治久安疏

御史張緒楷

竊臣恭讀同治三年七月間奉

上諭江甯省城克復

東南漸期底定自古君臣安不忘危治不忘亂不得以捷書遄至因而晏安爲懷總期上下交儆共濟時艱慎始圖終無荒無怠以鞏丕基而躋上治等因欽此又奉

上

諭吳廷棟奏金陵告捷尤宜益加敬慎一摺剴切敷陳深得杜漸防微之意朝廷宵旰焦勞無日不以奠民生培國脈爲念中外臣工亦當體朝廷兢惕之心各矢忠赤實力籌畫務策萬全以期海隅乂安閭閻樂業有厚望焉吳廷棟摺著交弘德殿用資省覽等因欽此仰見我

皇上

勵精圖治有加無己之至意故自金陵克復以來東南之
餘孽未清捻寇之逆氛尙熾不數年間次第削平近復捷
音迭告腹地肅清是皆我 皇上兢兢業業一日萬幾

上承

皇太后之懿旨憂勤惕勵惟日不足所以將

士用命迅奏膚功率土臣民重登衽席同深欣幸允宜

天顏有喜矣若如吳廷棟摺內所云從古功成志遂喜
心一生而驕心已伏宦寺乘此喜而貢其諂媚左右因此
喜而肆其蒙蔽容悅之臣屏逐之奸卽由此喜而工其諛
佞巧爲夤緣戒懼之念一喜敗之侈肆之行一喜開之等
語以 皇上聰明天尊嚴恭寅畏萬無慮是第恐一息

稍寬其端兆於無形片念偶疏其機復於不覺亦惟是快
愉之來加以警省慶幸之至倍切提撕又况秦隴未息烽
烟滇黔尙煩征討邊警方殷河患又起所有移師轉餉捍
患救災與夫招徠撫綏一切善後各事宜其有待於經營
籌畫上厯 聖慮者曷其有極伏願我 皇上保泰
持盈燭微鑒遠已治而猶若未治已安而猶若未安憶鋒
鏑之慘遭生靈荼毒則怵然矜念瘡痍之未復觸目顛連
則惻然憫慮府藏之空虛練軍籌餉度支已竭益殷然於
惜物產而除浮華思閭閻之彫敝抽釐勸捐取給無遺愈
憬然於節財用而崇質樸一人篤恭於上百爾承流於下

宰臣則益勤襄贊不以世治而稍懈蓋忱疆臣則益矢靖
共不以功成而或矜武畧樞臣則綜理愈勞不敢以時已
恬熙而廢弛漸起諫臣則箴規日進不敢以意安承順而
緘默爲高並請 飭下大學士倭仁等盡心啟沃及時

講學勿泥章句勿事咕嚕綜其大而畧其細遺其粗而擷
其精舉凡古帝王親賢遠佞去奢崇儉載在史冊與有切
於時勢而爲當務之急者日講明而切究之庶盛衰之故
治亂之由得失之機瞭於指掌聿見 聖德日親

聖功日懋以迄於億萬年有道之長也天下幸甚臣民幸
甚臣不揣冒昧披瀝直陳是否有當伏乞 皇太后

皇上聖鑒謹奏

臣

等

請飭廷臣直諫疏

內閣侍讀學士 鍾佩賢

竊京師自同治四年一冬無雪上年春夏缺雨冬雪又復
愆期近京一帶地方麥皆未種今年亢旱如前我 皇
上勤恤民瘼屢經設壇祈禱旬月以來風霾間作欲雨旋
止畿南赤地數百里旱象已形人情惶懼夫水旱爲災古
今皆有而自來英君哲后因是而益加修省者誠以災眚
之成由於政事休徵咎徵其應不爽方今 朝廷厲精圖
治庶政修明所謂咎徵固無其理然天下之大萬幾之煩
用舍弛張豈必一無過舉彌縫匡救責在臣工應請 飭
下在廷滿漢言事諸臣於時政得失盡心獻替悉意指陳

母循故常母避忌諱言有可采立予施行庶上下之情通而天和可期感召矣抑臣更有請者治莫要於求言德莫大於從諫政令所布以爲是而行之知其非而立止此聖人之無我何損日月之至明臣伏覩近者夏同善諫

幸惇親王府第

諭旨稱循舊章以折之倭仁諫設同

文館

諭旨令酌保數人另立一館以難之此二事者

在


聖心原自有權衡而羣情遂不無疑惑謂

朝廷

開言路之時而迹似杜言者之口謂大臣盡匡弼之義而轉使有自危之心臆揣私度未能相喻誠恐敢言之氣由此沮唯阿之習由此開此臣之所大慮也伏願

皇上

宏翕受之量屏除成見惟善是從則求言之 詔不徒
循其名而益副其實臣愚誠所迫冒昧直陳不勝戰慄屏
營之至伏乞 皇太后 皇上聖鑒謹奏



--	--	--	--	--	--	--	--	--	--

請崇節儉片

內閣侍讀學士 鍾佩賢

再儉爲美德而在今日尤爲當務之急軍興十餘年帑藏空竭民物凋殘勸捐抽釐皆權宜不得已之舉羅掘雖盡猶不足以供軍餉此時京師畧有庫儲皆百姓瘡痍之餘賸其膏血而入之府庫者也斯卽省嗇而用之仰窺

聖主之心已惻然其不忍乃臣聞近日 宮廷費用稍廣

傳取稍多較前數年增至一倍我 皇太后 皇

上揚厲憂勤躬行節儉萬無崇尚浮靡之理第恐該管執事人等奉行不善藉事鋪張以難得之財爲無名之費上累 主德臣竊慮之夫逸豫玩好其端甚微而浸淫遂

至於不可止防之於早方能預絕其萌應請飭下總管內
務府大臣隨時查核一切用款酌從刪減毋聽增加以仰
副 聖主痾瘼在抱崇儉黜奢之意是否有當謹附片
具奏

請崇尚節儉片

御史劉毓楠

再前恭讀 上諭本年十月釋服後除 朝廷大典均仍照常舉行外至萬壽禮節向有賞王公大臣聽戲筵宴著一併停止俟永遠奉安後再行照例舉行所有昇平署歲時照例供奉俟 山陵奉安候 旨遵行其咸豐十年所傳之民籍人等永遠裁革等因欽此仰見我

皇上孝思無窮崇實黜華之至意詳釋 聖意高深

實深欽佩查國服期滿後梨園演戲原爲例所不禁惟現值逆氛未靖海內騷然戰士蹈鋒鏑之危百姓動流離之歎 皇太后 皇上宵旰憂勤凡在臣工皆宜及

時奮勵共濟時艱若仍徵逐靡曼相事恬嬉何以起衰頹
而返樸素也可否請 旨諭令中外臣工務各振刷精
神力挽從前積習毋耽耳目之娛咸切痼瘵之念崇尚節
儉屏絕浮華庶風化可期轉移而吏治軍務行見日有起
色矣臣愚昧之見是否有當附片具陳伏乞 聖鑒

敬抒愚忱疏

御史 賈鐸

從來君心之敬肆關繫天下之安危古帝王念茲在茲時
懷非幾之貢弗畏入畏常憂耽樂之從凡所爲好惡有必
謹視聽有必嚴者雖國家承平無事猶且業業兢兢無敢
戲豫而况其在多事時也伏查同治二年七月二十二日
奉 上諭本年十月釋服後除朝廷大典均照常舉行
外至萬壽禮節向有賞王公大臣聽戲筵宴著一併停止
所有昇平署歲時供奉俟 山陵奉安候旨遵行其
咸豐十年所傳之民籍人等永遠裁革欽此臣恭讀之下
仰見我 皇上孝思純篤崇實黜華之至意乃近日風

聞內務府又有太監演戲將庫存進貢緞疋裁作戲衣每演一日賞費幾至千金竊思 皇上自咸豐十年以來

險阻艱難備嘗之矣旋以 冲齡踐阼寅紹丕基全賴

兩宮 皇太后勵精圖治勤求上理現值逆氛滋擾

生靈塗炭之時方將 宵旰不遑何暇演戲爲樂臣再

四籌維或係內監人等信口誇耀任意妄談抑或內務府

官員藉此逢迎爲侵漁肥己之計以致道路傳說紛紛不

一恐傳之日久中外軍民缺望所關匪淺請 旨密飭

總管內務府大臣速行禁止用以杜漸而防微並籲求兩

宮 皇太后念切時艱倍加惕勵庶朝政可期整肅

而外患不難蕩平則宗社幸甚天下幸甚臣愚昧之見是
否有當伏乞 皇太后 皇上聖鑒謹奏

--	--	--	--	--	--	--	--	--	--	--

T1

禁言祥瑞疏

御史 邊寶泉

竊惟貢諛獻媚端必有所由開而杜漸防微機貴嚴于先見祥瑞之說 盛世不言卽豐年爲瑞一語亦謂年穀順成民安其業以是爲瑞焉耳未聞有水旱頻仍民生凋敝之餘而猶復陳嘉祥談瑞應者也自漢迄唐臣下競言祥瑞其始倡之者一二人其弊至于一草一木爭獻無已侈逸上心愚惑天下莫此爲甚臣恭聞邸抄大學士直隸總督李鴻章奏清苑縣暨廣平府等屬呈報麥秀兩歧並進呈麥樣以爲靈異此摺中外傳述物議紛紛考之宋太祖乾德四年澶州濮陽縣麥秀兩歧至五六歧各數十本

不等神宗時深州麥兩歧者四十畝徽宗政和二年蔡州
麥一莖兩歧至七八歧近約十餘畝遠或連野一代如此
他代更不可枚舉臣少居鄉里每見麥非甚歉雙歧往往
有之推原其故或地力有餘或得氣偏厚皆足以致之物
理之常何異之有卽以瑞應言之漢章帝時大臣以嘉穀
芝草諸瑞議改元章和當時何敞據經義面責宋由袁安
由安懼不敢答至元馬端臨纂文獻通考乃舉歷代祥瑞
統謂之物異夫祥且謂之異今以恆有無異之物而以爲
祥可乎上年直隸水災之大爲數十年所未有畿輔東南
幾成澤國至不獲已而集捐外省發粟京倉議賑議蠲動

勞 宸慮迄今田廬没于水中者所在多有就令今年
 二麥豐收猶不足補上年之歉况收成多者不過五六分
 近聞永定河甫經歲工北岸又行潰決順天南路州縣暨
 保定天津各屬各河亦多漫溢秋稼並間有被蝗之處雙
 歧之祥抑又何取大抵逢迎諛諂乃庸劣州縣之故習遇
 事揣摩希圖見好上官而紳衿之無行者因而藉端貢媚
 撫拾微物妄事掄揚弊實由此現值邊省軍務未竣民困
 未蘇該督臣身膺重寄名望素隆當敬體

皇太后

皇上宵旰之憂勤效何儆之公忠懲宋由袁安之導
 媚如果地方收成豐稔屆時奏報卽所以仰慰

宸廑

于此等庸劣官紳宜明曉以物理之常不足為異以絕其
迎合之私豈可侈為嘉祥據以入告原摺亦稱豈矜瑞應
明知之而故蹈之抑又何歟至于漁陽舊事乃其時民殷
物阜百姓樂張堪之為政而歌之直隸災患頻仍小民流
離可憫乃竟飾為瑞應上瀆 宸聽而又援據古人以

為比例陽為歸美于 朝廷陰實自譽其政績竊恐此端
一開地方官相率效尤務為粉飾流弊有不可勝言者溯
查同治元年 殿廷考試翰林院庶吉士嚴辰曲意頌揚
當奉 旨嚴飭中外同欽夫嚴辰草茅一新進耳猶
且明降 諭旨以戒將來况督撫大吏倡言祥瑞于治

道人心關繫尤鉅相應請 旨訓飭庶各省有所儆惕
不致長浮夸而荒實政天下幸甚臣爲預防流弊起見冒
昧直陳是否有當伏乞 皇太后 皇上聖鑒謹
奏

--	--	--	--	--	--	--	--	--	--

TZ

敬陳管見疏

給事中 劉毓楠

竊思唐虞之盛也君臣不忘夫都吁成周之隆也上下共
矢以勤恤誠以出治者君固宜惕於上而輔治者臣尤當
儆於下也本年五月二十二日恭讀

上諭御史賈鐸

奏風聞太監演戲請飭禁止用以杜漸防微典學之餘務
當親近正人講求治道儻或左右近習恣爲娛耳悅目之
事冒貢非幾所繫實非淺鮮著隨時查察認真嚴禁等因
欽此又本月二十五日奉

上諭從來致治之源端在

以古爲鑑凡用入行政之要治亂得失之源載在簡編足
資法戒諸臣採擇前史纂輯成書賜名治平寶鑑若將此

書講貫發明於治理尤爲裨益等因欽此仰見我 皇

上惕厲憂勤孜孜求治 皇太后典學修政正本清

源至意臣庶靡不欽服伏思虞書所載后克艱厥后繼以
臣克艱厥臣克艱云者正修德之實君臣儆戒所以宏保
治之謨也我 皇上冲齡踐阼 皇太后高居深

宮於用人之當否行政之得失難盡周知全賴議政王軍
機大臣等同心輔翊竭力贊襄可期日臻上理蓋議政王
處周公之地位望極崇軍機大臣等位同平章責任尤重
臣見議政王自任事以來日與軍機大臣等講求治道夙
夜在公可謂勤勞備至但性量固著其寬宏而風度尤期

於嚴肅在王大臣等虛懷謙德下士禮賢原藉博訪周咨
洞悉天下利病以挽頽敝而致隆平竊恐中外大小臣工
日久玩生難保無懷詐取巧之輩藉端干進遇事夤緣萬
一稍失覺察似不免爲人所悞此杜漸慎微防患未然臣
心所過慮者也可否請 旨飭下議政王軍機大臣等
各矢公忠破除情面互相勸勉宏濟時艱各部院堂官務
當振刷精神力求整頓庶上下交儆咸有一德唐虞成周
之盛治不難復見于今日天下臣民幸甚臣不揣冒昧披
瀝上陳無任惶悚之至伏乞 皇太后 皇上聖

鑒謹奏

--	--	--	--	--	--	--	--	--	--

11

敬陳管見疏

御史馬元瑞

竊臣見軍興以來各路軍營奏報獲一勝仗則曰斬馘甚多復一城池則曰殺賊無算而賊仍未淨盡者緣民之紛紛從賊也夫民具有天良豈肯甘心從賊緣職牧民者驅之從賊也今欲杜其從賊之路宜令各省大吏督率地方有司正本清源與民休息臣於應行事宜中擇其最要者四條爲我 皇上敬陳之

一薄賦稅以厚民生也我 朝定賦輕於前代卽不得已勸捐抽釐亦非強民以難堪之事無如經手各員額外需索祇知爲己營私不顧爲國斂怨雖經 皇上多方

誥誠而積習相沿弗思變計不知民至今日其困苦不堪
言矣兵燹之餘流離失業室家曠廢田土荒蕪而猶以已
竭之脂膏填無底之豁壑嗷嗷之哀鴻幾無生理况賊匪
之狡詐多端不惟脅民以威亦且誘民以利爲民則飢寒
莫訴從賊則衣食有資愚氓無知幾何不爲其所惑耶擬
請再行嚴禁地方各官不得於正供而外任意侵漁爲小
民開一線生路卽爲賊匪減一分來源所謂厚民生以正
民德也

一慎訟獄以平民怨也今之州縣往往自耽安逸於一切
詞訟委諸佐雜彼旣身在局外豈復出以審詳其貪酷之

輩又賄賂公行是非顛倒不知一人號屈萬眾寒心一旦風鶴告警或至乘機生變是豈民風之不古哉嘆息愁恨之心蓄於中者久矣嗣後大小詞訟責令親身研鞠無枉無縱蓋欲使天下無叛民必先使天下無怨民也

一善撫循而使民得所也國家設親民之官所以安民非所以害民也乃自軍興以來派兵車則四鄉皆擾立團練則私橐必盈無事任瘡痍之滿前而不爲設法有事恐餉需之累已而不爲請兵官之虐民也不一民之怨官也必深偶有不逞之徒一爲煽動往往聚眾抗官釀成巨案此其咎不盡在民也嗣後無論完善之地殘破之區責令悉

心籌畫俾小民得所則上撫字其民而民猶背叛其上有
是理哉

一勤曉諭而使民咸勸也昔黃霸守潁川選擇良吏宣布
詔令使民咸知上意遂致教化盛行盜賊止息今 朝

廷旰食宵衣勤求民瘼誠能家喻戶曉當無不感激涕零
者乃 皇上之恩綸屢下而州縣多延擱不行以其無
利於己也上下睽違情志不通職此之故嗣後濶緩

恩旨固令迅速刊布至一切 諭旨之關係民事者亦
俱令剴切曉諭俾窮鄉僻壤無不共聞庶民情固結而賊
匪之勢日孤矣以上四條請 旨飭下各省督撫潔已

率屬實力奉行其地方有司破除積習著有成效者准破
格保薦不次擢遷而仍蹈故習及奉行不力者予以嚴叅
將風聲旣樹轉移自速不惟賊氛可以撲滅而邇治自臻
上理矣臣愚昧之見是否有當伏乞 皇上聖鑒謹奏

--	--	--	--	--	--	--	--	--	--

一ナ

政期核實疏

御史 朱澄瀾

竊惟圖治之方不在紛更而在整頓我 皇上冲齡御

極仰賴 皇太后垂簾聽政事事率由舊章爲臣下

者尤宜義凜勿欺以實心徵實效茲就現今時務謹擬管

見六條爲我 皇上敬陳之

一薦牘宜核實也雍正四年六月欽奉 上諭爾等

大臣一人所舉多者不過二三十人爾等一人精神足以

貫注之平時訪察其行爲勸勉其廉謹儻居官不善卽行

叅奏不稍迴護如此則人人有所忌憚爭自濯磨等因欽

此仰見我 世宗憲皇帝旁求慎簡澄敘官方至意

邇來迭奉

皇上諭旨不准徇情濫保並令將才所優

爲已著實效者詳細臚陳各在案延攬自可得人也顧鹽
衡不爽賢聖尤難四岳薦伯鯨周公使管叔漢唐以來君
子悞用小人者甚多現值時勢艱難用人尤宜審慎夫人
心莫測有必當由表及裡自始至終而隨時查看者卽如
曾國藩前于革員李元度保舉于先復叅革于後彰輝無
成見益徵心地之光明凡在臣僚宜知則儆可否請

旨飭下中外臣工嗣後於業經保舉人員仍令原保者隨
時查察儻居官不善立卽奏叅或原保者先已致仕降革
例不應奏陳卽在步軍統領都察院等衙門呈請代奏以

慎登進而絕黨援

一軍律宜核實也乾隆五十三年三月欽奉

上諭

兵丁等奉派出征如果臨陣捐軀或爲賊所害不特應行賞卹並當將其子弟挑補兵缺俾資養贍如遇敵潰散查無從賊情節尙可貸其一死儻竟甘心從賊甚至助賊打仗拿獲卽當立行正法並其子孫等亦不准挑補兵缺以示懲儆等因欽此仰見我

高宗純皇帝信賞必罰

激勵戎行至意查恩威者行軍之要務延賞與拿戮立法尤周邇因各省兵單兼用鄉勇每多游匪糜餉殃民籍貫姓名均難稽考莠莠夾雜功罪混淆盡忠者或無人知悉

助逆者或無法拿懲此軍營之大弊近如僧格林沁帶蒙古兵會國藩等帶楚勇最爲得力惟由兵勇均係良民又能賞罰嚴明故也可否請 旨飭下各路統兵大臣及

各督撫等嗣後調兵募勇務用土著良民並查明有無親丁註冊存案至各營尤應揀派賢員專查打仗情形凡死事及助賊各兵勇除將本人議功議罪外卽咨交原籍地方官確查有無親丁恪遵乾隆年間欽奉 聖諭分別酌辦並先示諭各營以資奮興而肅紀律

一奏限宜核實也嘉慶十二年五月欽奉 上諭嗣後特交事件自原告到省之日起依限審結卽有因人証

難齊或該督撫有公出事件不得不稍爲展限亦當隨案聲明等因欽此仰見我

仁宗睿皇帝整綱飭紀令

出惟行至意又同治元年十月欽奉

上諭嗣後各路

統兵大臣及各省督撫于奉到通諭及飭議交查事件務于一月內卽行覆奏如有不能卽時覆奏者亦須先行聲明仍不過三月之限並着各該部科於行知各省諭旨另立冊檔稽查其密奉諭旨應辦事件卽著軍機處立冊稽查辦理等因欽此仰見我

皇上撫辰凝績日起有功

跪誦之餘曷勝欽悚查外省覆奏耽延每由事務煩多督催易忽顧彼失此以致積壓遲逾臣愚謂若再令其彙總

自行開單陳奏庶各省警覺提撕益知趕辦而部科軍機處據單校閱亦易從實查察可否請 旨飭下各路統

兵大臣暨各督撫等嗣後于欽奉 特交京控等案及

一切明奉密奉 諭旨應行遵辦等件凡未及覆奏者

均令先行聲明外再令按季彙奏一次將應由部科稽查及軍機處稽查分開二單註明起數暨展限緣由具奏交部科軍機處核對以儆玩愒而專責成

一捕務宜核實也嘉慶十八年十一月欽奉 上諭

嗣後各直省州縣官到任後先周歷村莊稽查保甲將境內有無邪教申報該管上司如訪有萌蘖立即查拿究辦

母稍玩泄等因欽此仰見我

仁宗睿皇帝鋤邪善

俗經正民興至意查捕務首在除叛民而叛民率多習邪教如粵匪有添弟會及擔子會情義會嘉慶二十四年欽奉我

仁宗睿皇帝諭旨飭令認真查拿在案乃該省地方官竟敢陽奉陰違養癰釀禍卒致教匪洪秀泉等謀爲不軌戕官踞城跋扈猖狂賊踪半天下國帑費及億萬帑民命傷及億萬家逆燄薰天至今未熄該地方官果能恪遵嘉慶年間

聖諭及早認真查拿何至如斯

潰爛可否請

旨飭下各督撫等嚴飭所屬妥辦保甲

力除邪教外並就各處情形速議捕匪章程期可認真查

拿由該督撫等奏請施行以靖閭閻而戢奸宄

一彈章宜核實也道光九年四月欽奉

上諭近來

各省大吏之於所屬非不留心察訪隨時甄別而亦有因
其事若實叅卽不止于斥革者遂以平庸疎率等語從寬
空叅僅予改降休致轉令被劾者有所藉口豈整肅吏治
之道等因欽此仰見我 宣宗成皇帝日月照臨秉

公勵治至意查外省就輕避重化有爲無止下通融借端
掩飾諸弊迭奉我 皇上特旨嚴行飭禁在案彈射自

無不當矣惟近有僅止四字或八字勘語而未將劣跡詳
陳者尙不足以儆官邪夫劾吏者必據實糾彈庶當局無

可支吾旁觀咸知畏懼如恐事由未確宜詳訪真情如果
欸跡已彰宜直陳罪狀否則上憲留恩私心易啟下僚反
噬訐告難防誠如 聖諭從寬空叅轉令被劾者有

所藉口也可否請

旨飭下各督撫等嗣後甄別屬員

務將劣跡查明實奏不得憑一二語空叅以杜挾制而昭
公允

一儉德宜核實也咸豐元年十一月欽奉

上諭通

政使羅惇衍奏請崇儉禁奢一摺著禮部查明道光八年
頒行簡明規條通行內外各衙門遵照刊刻出示通行曉
諭等因欽此仰見我 文宗顯皇帝保泰持盈納民

軌物至意查道光八年原任大學士富俊擬有規條五款
咸豐二年禮部增至規條十九款法至備矣欽惟我

文宗顯皇帝躬行節儉力挽時艱灑水衣冠益覩

堯階之樸陋鼎湖弓劍忍言

軒室之尊崇又頻

年來被兵省分物力彫殘抽釐竭萬姓脂膏之餉致三年
凍餒東南餓殍屍骨成山西北災黎肝腦塗地我皇

上孝思維則視民如傷邇因

先皇帝山陵未安百

姓瘡痍滿目迭經欽奉

皇太后懿旨黜華崇實爲

天下先海內臣民咸知遵守惟咸豐年間規條閱時已久
恐又視爲具文民遭兵燹疾苦顛連而完善地方奸商墨

吏仍復欺貧黷貨違例爭奢又賊氛旣靖爵賞酬庸將
驕兵罔知法度均宜頒垂準則俾能長荷生成卽書云慎
乃儉德惟懷永圖之意也可否請 旨飭下禮部查照

咸豐初年規條再加斟酌通行內外各衙門遵刻示諭以
端風化而辨等威以上六條臣恭讀 列聖綸音垂

型萬世煌煌

聖訓允宜永遠遵行我

皇上善

繼善述綱舉目張臣欽佩難名高深莫贊惟願中外臣工
實力奉行諸務自能日有起色謹就管見所及據實臚陳
是否有當伏乞 皇太后 皇上訓示遵行謹奏

--	--	--	--	--	--	--	--	--	--	--

1111

請及時防弊疏

御史王書瑞

竊東南各省肅清後已逾三年元氣未復興利較難規模
初定防弊尤急有目前未見其弊因循焉則弊已滋有目
前漸見爲弊勤求焉則弊自絕事原平易不在矜奇治貴
因時亟宜擇要謹就臣管窺所及臚列各條爲我

皇太后 皇上敬陳之

一保甲宜及時舉行也保甲之法詰奸宄遏亂萌從前地
方官果能實力奉行髮逆擒匪何由而起而從前地方官
行之頗憚其難者蓋因戶口多則稽查未能周徧公事多
則辦理又苦煩冗非精明強幹之員固才力有所不逮自

兵燹以後各府州縣其大者人數比從前十少五六其少者人數比從前十少三四人少則耳目能周稽查較易且人數既少一切公事亦因之而少苟非性耽安逸儘可從容就理此時果能認真妥辦卽將來生齒漸煩公事較多一切已有定章自不至於掣肘從此可以有舉無廢是則綏靖地方可爲久遠之計者也

一奸宄宜及時嚴防也現在軍務未竣而從前之從逆者皆蒙 朝廷寬大之恩准予自新不復究詰然此等從逆之人固有本非甘心迫於不得已者至若質性本非馴良從賊後又復耳濡目染視人命爲無足重輕往往肅清以

後經大吏訪聞民間控告竟以捐錢從公爲之寬免者彼方謂 殊恩可以倖邀銀錢可以贖罪怙惡不悛卒未回心嚮善且其從賊多年各有黨與聲氣相通尤多叵測縱可寬之於既往豈可不防之於將來地方官必須留心防範實力稽查於從前從賊之人曾經訪聞確實及控告有案罰錢充公者儻復不安本分或藉端滋事或形跡可疑立即從嚴究辦無稍寬容是則於寬大之中仍寓嚴密之意於解散之後仍防煽聚之虞固目前之要務也

一淫祠宜及時禁絕也民間迎神賽會婦女入廟燒香本干例禁承平日久民有餘積俗尙悻淫往往斂錢聚眾創

建廟宇名爲義舉結社燒香名爲善會此風一開竟有不僧不道入廟說法煽惑愚民傳習邪教地方保甲及衙門差役藉此可以收受錢財地方官漠不關心任其自然而不禁間有一二牧令欲求整頓而祠宇之設相沿已久風俗之壞比比皆然一旦欲掃除淨盡幾乎駭人聽聞深恐激而爲變不得不隱忍姑容自兵燹以後各城鄉市鎮廟宇佛像俱遭灰燼趁此申明例禁除社廟春秋報賽外概不准別建廟宇塑設佛像庶根株永絕無從借端生事又目前急要之務有關於人心風俗者也

一城垣宜及時修整也城垣之設原以衛民自承平日久

地方官輒視爲尋常任其坍塌而不顧迨軍務緊切力籌防堵竭蹶興工幸得完固及肅清後又復習爲恬熙不加保護誠恐日久因循又多傾圮將來卽議及修築必因工費浩煩難以設措試思從前變起倉卒籌畫維難正當趁此有基未壞之時於鬆懈處培之使堅缺損處補之使密庶工省而費少捍衛有資民心自固是亦地方之要務也一書差宜及時裁汰也地方官衙門書差原有定額書吏中有經承有貼寫差役中有班頭有散役各有一定此可以數計者也而其身後辦事爲之畫策奔走者卯簿上並無其人此則不可以數計者也若非於公事內營私舞弊

藉端訛索何以存活地方官豈能以一人之耳目隨時隨事而自察之現在地方甫就肅清民事較少銀漕正供又經減額徵收除身後辦事有干例禁者仍行嚴禁外於各科房中額設較多之書吏亦儘可酌量裁汰並詞訟簽差後不得更有添差改差名目至於徵收銀漕所有糧書漕總收記書吏及巡查等差俱應酌減不得再沿舊習是當戒於從前騷擾之弊而目前所宜急除者也

一釐捐宜及時整頓也自軍興多年無從籌款不得已而借資民力封疆大吏豈有不仰體 聖意者必謂釐捐

之無一非弊者謬也然竟謂釐捐之一無所弊則不可各

省釐捐在省局總辦者類皆司道大員固宜隨時慎重弊絕風清由省城而各府各州縣各鄉鎮各釐卡各有委員雖經各大吏擇人而任然其中已難保無喜事之人漁利之習自委員而下各局各卡各有司事自司事而下各局卡各有書差謂其中皆係安分守己實心辦事之人尤未敢信也釐捐之弊最忌偷漏於通津大路設卡抽收外各處支港汊河設卡殆遍謂如是而後可以收其利不知如是則適以滋其弊蓋所謂利弊者當通大局而計其得失非僅執一隅以杜其趨避也偷漏之原半由於司事書差之貪婪往往於正稅之外多方需索則情有不甘又出於

委員之意情遇有商船到卡不肯親自查驗任聽司事書差之留難而不顧竟有自朝至暮不能放行者則勢又苦其不便情既不甘勢又不便安得不思偷漏乎然則禁偷漏當先禁司事書差之需索委員之意情是所以清其源也不清其源但遏其流凡偏僻處所皆設卡以伺之一卡有委員有司事有書差則各有經費而偏僻處所一日所抽之捐不足以供一卡一日之用則仍於通津大路所設之卡支取接濟即使毫無偷漏而以目前添出之經費較從前漏收之商稅恐亦不甚懸殊矣且弊有法之所及防者有法之所不及防者商船往來日久與各卡司事書差


漸多熟識竟有彼此勾串以多報少至偏僻處所耳目所不及竟可以得賄放行合數十船之貨逐一抽之正額本屬無幾儻有一二船之貨私自走漏所得更不足以償所失至釐捐章程有漏稅者查出後或罰十倍十餘倍所罰之款除提出充公外悉賞給查出漏稅之人於是皆以爲利遇有商船叢集河道壅塞之時來舡不能徑至卡前先於市稍港口停泊聽候查驗而巡查書差捕風捉影假公濟私輒指爲漏稅以冀罰款之可以肥己夫多一卡多一費尙可忍也多一卡多一費並多一獎不可忍也罰十倍罰十數倍悉以充公尙可爲也罰十倍罰十數倍名爲充

公實則營私不可爲也爲今之計於各府州縣地方體察情形凡偏僻處所可以裁撤者悉令就近歸併以節經費而杜私弊並責令各卡委員於貨船到卡親自稽查不准稍有需索留難儻有勾串私放及意圖肥己指爲漏稅者從嚴懲辦至罰款務須平允酌減一律歸公不准另有賞給以絕營私再厘捐一項取之卽毫無弊端用之豈漫無節制錢糧正供俱有定額而挪移侵吞尙有流弊况於抽釐本無定數應令各卡於每月收稅若干經費若干逐款申報該管釐局卽將各卡出入清數按月申報省局於收支各款可否 飭下戶部明定期造冊彙報如有款目

不清收支各項前後大相懸殊者行文駁查並逾限不報者作何議處庶不致漫無稽考於捐務益昭慎重矣以上各條或深戒從前之非亟宜振作或恐貽將來之患急爲防維旣平易而可行貴及時而自勉臣前在籍年餘於地方情形就目見耳聞所及竭千慮一得之愚是否有當伏

乞

聖鑒謹奏



111

請除近日流弊疏

御史孫翼謀

爲請除近日流弊以求理財用人皆歸實濟恭摺具奏仰

祈 聖鑒事

一各省釐捐亟宜變通也釐捐之設原因軍務未蕺暫濟
餉需非以專利權也故設是局者必於通都大邑商賈輻
輳之區遴選公正委員斟酌權宜按章抽收益上不至於
損下乃近來捐納出身人員百計鑽營視爲名利兼收之
地如蠅逐臭如蟻附羶甚至外省無耻官親本地不肖生
監亦轉相援引濫充斯選並有游手之徒賄通局員給照
認辦分置卡隘權算錙銖偶有訛詐不遂胥役人等悉受

私規皆其羽翼倚勢肆法任意欺凌以致窮鄉僻壤搜括無遺負苦肩挑苛索不免物價日昂民生日匱爲害匪輕其實資軍餉者十之二三飽私橐者十之七八夫釐與稅固輕重相劑者也往來總道旣設稅局卽應分設釐局已足以便抽收如必港汊歧路節節稽查豈釐局恐民偷漏稅局獨不恐民之偷漏乎如必多派委員各項人等紛紛辦釐豈稅局之人足敷驅遣釐局之人反不敷驅遣乎委一官卽有一官之薪水增一役卽有一役之工食將盡取之於釐乎抑不盡取之於釐乎請 旨飭下各督撫擇誠實官員經管限定更役人數無得過多俾管局者易於

稽查其外省親幕及本地生監並包釐認辦之人概不准
充數除水陸埠頭市廛環集地方照例抽收外所有小徑
分設之局盡行裁撤以絕官蠹而順輿情抑臣更有請者
各省釐捐章程不一大約釐之正耗較常稅加重與其中
飽於官何如藏富於民且漏額之弊可除卽財用之源不
匱應令各督撫酌減章程條分縷晰榜貼通衢示民有信
使藉端需索侵吞入己情弊無所逞其奸庶易知易從而
民樂於急公好義矣

一各省捐例宜分別停止改歸在京銅局辦理也銅局捐
例開誠布公故報捐者源源相繼外省則官與民不相信

文其名曰勸捐按其實則勒捐也臣籍隸閩省稔知從前勒捐時每開一例卽遍傳殷實之戶及家僅小康者派定捐數始猶施之以禮繼則嚇之以威因之無力報捐者賄求免捐有力而恐多捐者賄托少捐捐數旣登簿籍仍有無力全繳者於是佐雜委員及官親幕友以五六折或三四折抵換移甲就乙謂之買報捐現在福建候補人員半由買捐來也且小民之畏捐亦有故今日勒捐明日卽按捐戶之名勒借藩司給與借票許其釐局當實銀搭交迨釐局委員收買借票時不免抑其價值是民旣虧於捐又虧於借積怨在民而得意盡在官矣捐款之外另有捐費

票本例每銀一兩費二分三釐防剿例每銀一兩費三分
二釐二毫隨官監每名費十二兩約計捐費不下數十萬
兩報銷之日聚而分肥何嘗於軍需少有裨益乎夫富者
斯民之元氣千金之家可養活數十人百金之家亦可養
活十數人自捐無遺力而田產變棄鋪戶關閉致貧民亦
無以資生賙恤之誼衰廉耻之良泯臣實痛之近聞廣東
屢行勸捐富民遷居陝西府州縣以辦捐修城紛紛擾民
各處用兵省分捐例亦未盡停止想民力已疲豈容再行
勒派而官場惡習大都假公濟私身處膏脂者斷不能無
所沾潤欲遏其弊必清其源前恭閱閣抄見山東巡撫閣

敬銘所奏道府州縣改歸京銅局報捐一摺內稱現辦軍務各直省均不專藉捐輸直東豫晉之餉出於地丁江皖湖廣之餉出於地丁者半出於釐稅者半粵閩之餉出於地丁鹽茶陝甘之餉出於地丁協濟川浙之餉出於地丁釐稅惟雲貴餉無所出稍貲於此該撫熟悉情形自必確有所見竊思捐輸既無大益何妨一律悉停至雲貴兩省應交該省督撫詳議可否另行具奏請 旨顧或謂各省捐輸均搭餉票捐輸既止餉票必不流通臣再四思維又有變通之一法聞各省近日情形報捐封典職銜貢監生者居多報捐實職官階者尙少擬請所有封典職銜貢

監生仍准聽民之便就近報捐照例減成收納此外實職
官階統歸在京銅局報捐庶閭閻不受抑勒章程悉泯參
差而其擔登躡屨赴京來捐者益見名器之貴並徵踴躍
之誠矣

A large rectangular table with 10 empty columns. On the right side of the table, there is a small tab-like shape protruding outwards. The table is enclosed in a thick black border.

11111

應 詔陳言疏

福建巡撫 王凱泰

竊臣恭讀邸抄本年正月二十六日奉 上諭在廷王

大臣及各省封疆大吏務當共矢公忠等因欽此仰見

皇上親政伊始孜孜求治至意臣忝膺疆寄未報涓埃

常切進思退思之忱愧乏嘉謨嘉猷之告然不敢以庸愚

一得輒妄於緘默不言也謹就管見所及擇時事之有須

變通者臚列六條爲 皇上詳陳之

一 停捐例以肅吏治史記司馬相如以貲爲郎漢書食貨志令民得入粟補吏捐納之制由來已久然必家有餘財而後輸將獻納固可抒報效之私又可爲進身之路此中

非無人才也乃自捐章折減以來持銀百餘兩而爲佐雜
矣持銀千餘兩而爲正印矣卽道府例銀鉅萬以上今亦
折算至三四千兩矣家非素封人思躁進或趨奏於親友
或借貸於商賈以本求利其弊可勝言哉况流品之雜捐
納尤甚近閱邸抄給事中盧士杰奏河南商城縣家丁李
天錫捐納身考一案此事之已發者其他未經敗露尙不
可知處今日而欲澄叙官方應以停捐爲急務或謂滇隴
軍事未清戶部度支未裕停捐則經費何出臣愚以爲法
久則變變則通變通之方固不容緩查同治八年間戶部
議覆前江蘇撫臣丁日昌條陳一摺內開京外捐輸款項

果能於稅釐較旺各省籌款彌補亟應將中外捐輸一律
停止京銅局捐項從中酌定每年以一百五十萬爲準等
語近年捐輸已成弩末恐尙不足一百五十萬之數儻於
釐金較旺之江蘇安徽浙江江西湖南湖北四川廣東福
建九省每年酌提數萬再於海關洋稅項下每關勻提數
萬以之彌補銅局捐款或可相抵至外省籌捐各局收數
雖難周知而閩省現辦甘黔皖捐自十年開辦至今收銀
不過數萬他省之不能旺捐可以類推以涓滴之微而害
吏治之大所得實不償所失可否請 旨勅下部臣核
議施行俾經費有可抵補而吏治庶望澄清矣

一汰冗員以清仕途近年捐納虛功兩途入官者眾聞部
寺各署額外司員少則數十人多則數百人衙門以內司
署爲之擁擠內城以外租宅爲之昂貴實則補缺無期徒
耗旅食若不設法變通京員日形苦累至於各省候補人
員更較京中倍蓰向來道員候補最少近則各省或多至
數十員府廳州縣以數百計佐雜則以千計每逢銜參之
日官廳幾不能容各省現辦善後捐釐均尙需人委用轉
瞬滇隴肅清各局裁撤僅有例派差使以人數計之十分
之二三已敷差委似此盈千累百之員徒形冗雜臣愚以
爲變通之方此時宜亟亟矣查例載各省試用佐貳雜職

已滿一年者視各項缺數多寡酌留十分之二補過一員
各取一員仍數十分之二之數又大挑一等人員學定省
分之後其名次在後者暫令回籍俟大挑班次補用一員
該省各取一員等語似可仿之辦理相應請 旨勅下
部臣核議將京外捐納軍功各班試用候補人員視其數
之多寡酌留二三成其餘飭令回籍聽候各取庶仕途無
人滿之患矣

一限保舉以慎名器軍興以來保案層迭開捐以後花樣
紛繁於是軍營之保舉藉花樣以爭先恐後各項之保舉
又襲軍營名目以紛至沓來名器之濫至今已極夫花翎

酬大功也今則不盡軍功皆保翎枝矣二三品崇階也今則尋常勞績亦以二三品頂戴加銜邀請 恩賞矣况

封典請至一品遞保何止兩層主事不能保道員俟補員外郎中後以道員用與保道員何異官員不得越級保舉乃知府俟補道員後加布政使銜與越級保舉何異其餘如京官應升之缺升用外官遇缺儘先補用此中捷徑取巧良多雖經部議限制章程猶有未免過濫者臣愚以爲仍應變通辦理可否請 旨飭下部臣核議簡明條欵通行中外嗣後保舉文員只准保舉以應升之階加以應升之銜其餘班次花樣一概刪除至一品 封典二

三品頂戴加銜不得擅請庶名器益昭慎重矣

一復俸廉以勸官常我 朝定制京官支給雙俸外官優

予養廉自咸豐年間軍用浩煩內外官俸搭用鈔票養廉
分別減放嗣鈔票停止京外俸廉復分別成數支給 朝

廷於籌維經費之中仍寓體恤臣工之意惟京員困苦州
縣疲累情形早荷 聖明洞鑒今日欲砥礪廉隅整飭

吏治似廉俸復額其一端也京官俸銀養廉部庫動欸不
能詳悉至各省文職養廉係支錢糧耗羨查同治八年戶
部議覆前江蘇巡撫臣丁日昌條陳一摺內開廉俸復額
必須各省錢糧耗羨徵收足額始可抵放應令各督撫就

各省每年收支數目詳細酌核將徵數能否加增放欵能
否加成據實奏覆等語現在各省已否覆奏尙未接准部
咨查閩省文職額廉十五萬餘兩內扣缺養廉一萬數千
兩每年應支銀十三四萬兩核計現年徵數本省公費支
抵尙屬有盈除督撫藩臬養廉較厚毋庸議外其道府以
下各員似可照額全支相應請 旨敕下部臣查核將
中外俸廉改復舊額抑或加成支放俾辦公力裕而官常
益飭矣

一重學額以勵士風溯自軍興以後各項用費賴捐輸以
接濟是以鼓勵人心有加廣中額學額之制顧 恩施

則浩蕩靡涯而人才則優拙互異竊思一省之大人材衆
多三年一試中額猶無慮濫竽也至一州一縣文風本有
不齊三年兩試學臣照額取進敷衍充數勢所必至夫秀
才爲多士出身之始乃以文理淺陋者濫廁其間人才固
不足觀人品尤不可問往往幸得一衿包攬詞訟武斷鄉
曲流弊不堪指數且以近日士風言之聰明有用之才或
投筆從戎早膺薦剡或挾資干進亦博功名其伏處鄉閭
者轉多迂腐故今日之秀才愈取愈多今日之文風實愈
趨愈下臣愚以爲學額若不變通士風何由振作可否請
旨敕部核議嗣後外省捐輸各案只准照章請加中

額無庸請加學額以示限制並請 敕下各省學臣酌

核各屬文風將捐輸加廣之額某屬可以足額某屬不能
如額分別開單奏明立案其不敷之額俟他日文風向上
再行奏請照額取進庶乎士子知所勉勵矣

一立練營以修武備髮捻滋事以來剿平劇寇肅清地方
所得力者湘淮各勇耳 國家歲糜帑金千百萬以養綠
營之兵而未嘗得一兵之力收一兵之效其故安在蓋營
兵生長本籍各有室家月餉僅足以養一身而不足以贍
八口勢必另習手藝兼營負販其力既各有所分其人自
不能常聚每逢操演之期不過奉行故事校閱甫畢隊伍

旋散設有征調往往兼旬累月始克起程治裝固難安家
尤不易且暫時抽調成營不獨兵與將不相習卽兵與兵
亦不相識人各一心猝然應敵能操必勝之權耶若勇則
不然募自外籍孑然一身厚其餉而無待他謀聚於營而
羣相親習朝聞令則夕拔隊敵當前則士皆奮夫非猶是
人耶何以兵則無用勇則有用得失優絀之間較然易見
矣臣愚以爲變通之方則有化兵爲勇之一法往年江甯
克復以後臣上書原任兩江督臣曾國藩備言江甯綠營
之制應稍變通以現存得勝之勇改充額兵設營分部可
洗綠營舊習會國藩未及議行旋調直隸卽設練軍蓋亦

采用臣說而又增練軍之費也陝甘督臣左宗棠前在閩浙任內奏准減兵加餉就餉練兵洵爲救時良策乃餉已加矣兵已練矣而仍不敢言確有把握此無他在籍之兵終不若在營之勇可否請 旨飭下各省督撫臣以減兵加餉之法以所減之餉加於戰兵計得戰兵若干著設練營若干仍按湘楚營制五百人爲一營以備弁爲哨官將官爲營官提鎮統領之擇要分扎隨時互調俾卒伍皆離原籍不至散處廛市練一營之兵卽抵一營之勇餉不另增兵有實用庶幾化兵爲勇而武備可恃矣以上各條臣愚昧之見是否有當伏乞 皇上聖鑒訓示謹奏

積穀練兵疏

贊善 徐申錫

近因天時亢旱 皇上詔求直言申錫雖無言責而世受 國恩難安緘默不揣冒昧敬獻芻蕘以備採擇伏思目前所最亟者莫如積穀練兵二事京師糧價日增秋成已有不及播種之勢以後更不堪設想竊聞江浙諸省尙屬豐稔米石值銀不過二兩與京中市價懸殊擬請 飭令該省督撫寬籌經費採買糧食由海運津分撥京師及附近歉收之處平糶以糶價之贏餘作爲轉運諸費自必有盈無絀收回糶本仍赴該省買運源源接濟該省及隣近省分有應解京餉並請買米解運一面招商販運

准免關稅以期踴躍似此轉移補救公帑既無所虧民食亦不致乏似屬兩便京師勝旅不下二十萬人時勤訓練固已精熟然自咸豐年間餉項未足兵丁每多饑疲

皇上念其勞苦加成給餉而當此百物踊貴之時各兵生計仍艱竊謂兵之得力在精而不在多擬請汰其羸弱裁減額數以所裁之餉優給存兵俾免私家之顧慮得以盡力於行間然後課其技能申以紀律仿明臣于謙團營之法分班輪駐各門以資保衛一切訓練事宜悉照戚繼光紀效新書練兵實紀中條目一一行之不數月間可收有勇知方之效抑申錫更有請者數月來雨澤未覃每見濃

雲密布風輒吹散似爲羣下不能宣布

德意故示此

象竊謂設官本以養民而今之州縣惟事腴削道府必庇
護屬員大吏卽欲整飭而耳目所限未易周知申錫前者
家居十餘年無歲不有蠲緩 恩詔乃從未見張貼牆

黃牒混徵收侵蝕罔忌自髮逆亂平以來民生凋敝已極
迭荷 高厚天恩減免錢漕乃小民完納時受累依然
如昨 朝廷有曠典而遺黎不蒙其福可勝痛恨夫人品
不一各具天良何至今而絕少奉公潔已者哉推原其故
實官多之弊也方今各省候補人員動以千百計得缺難
期淹滯歲月一切日用應酬所費積累日深一旦得處脂

膏之地雖自好者亦不免以屢空之後取償於民而不肖者不待問矣州縣之賢否惟道府爲近而易知今之道府大半由京職補放而京官亦復太多大率三十年始得外任當其部院行走時境况無不苦累多有授徒自給者身心旣分公事已虞曠廢胥吏因而舞弊者有之及其外轉則不能不仰食於州縣而徇庇勢所不免矣且守令必久於其任方能周知地方利弊從容展布稽諸史冊漢時循吏最多實久任之效也今乃以候補人多之故上司憫其困守從而調劑之紛紛委署不過一年輒復更易彼此皆存五日京兆之見自私自利無復他圖縱有心存利濟者

亦迫於時而不及爲有不隨時委靡哉至實任之佐貳襍職等亦太多卽如申錫本籍平湖縣方五十里之地有官凡十餘人其分防者尙有地方應辦公事然非甚要之處已屬可省若同城之丞簿坐糜廩俸生事擾民而已况多一官卽多設胥役人等若輩非魚肉百姓更安所得食乎擬請 飭下廷臣會議將候補人員酌留年久者差遣外餘悉令其回籍俟序補到班時再行咨取其實任者酌定年限章程無故不准遷調至佐雜等缺有可刪者悉行裁汰將見仕路澄清與民休息太和可召屢豐可卜矣愚昧之見不知當否伏乞 皇太后 皇上聖鑒謹

奏

四

懇停賜親王雙俸疏

恭親王

竊臣分屬天潢才庸識淺久叨

倚畀之重愧無尺寸

之功咸豐十一年十月間仰蒙

兩宮皇太后

皇上渥沛

殊恩賞食親王雙俸非分之榮常深悚懼

屢欲具疏力辭祇以

溫諭諄諄未敢再三竇請本年

江甯克復紅旗報捷復蒙

恩綸下逮

加恩賞一

貝勒令臣子載澂受封並將臣次子載澐三子載濬分別

錫封爲公髫齡襁褓圭組同膺深維

寵遇之隆

彌切滿盈之戒聞命以來夙夜徬徨罔知所措伏念古人
有言德未爲衆所服而受高爵則使才臣不進功未爲衆

所歸而膺厚祿則使勞臣不勸况臣誼屬懿親職司輔翼
豈可貪冒榮遇自蹈愆尤方今金陵雖經攻克而湖北江
西賊氛尙熾陝西雲貴餘孽未平軍餉浩煩庫欵支絀

皇太后

皇上軫念時艱

宮廷之內力行節儉

爲天下先然且在京王公諸臣之俸糈八旗兵丁之月餉
猶因帑金不足減成支放未能遽復舊章而臣則王公貝
勒萃於一門旣忝高爵復膺厚祿若猶不痛自抑損仍照
舊支食親王雙俸不獨滿則必虧徒增咎戾且何以副

知遇之隆而塞天下之望爲此披瀝竇陳伏乞

皇太后

皇上俯念愚衷明降

諭旨將臣支食親

王雙俸之處卽行停止俾臣得稍免清夜之慙益矢涓埃
之報感戴 鴻慈實無旣極所有微臣敬陳下悃請停
雙俸緣由謹繕摺具陳伏乞 皇太后 皇上聖
鑒謹奏

懇收回成命疏

閩浙總督

左宗棠

竊臣於十月十八日准兵部火票遞到同治三年十月十一日內閣奉 上諭閩浙總督兼署浙江巡撫左宗棠督師入浙恢復浙東各郡縣進規浙西攻克杭州省城及湖州等府縣肅清全浙等因欽此跪誦之餘感激涕零罔知攸措復念臣家世寒素耕讀相承數百年來並無貴仕微臣遭際 聖時仰蒙 文宗顯皇帝特達之知拔自草茅置之卿列自領偏師轉戰江西皖浙之間不數年迭蒙 皇上天恩游擢疆圻重任寸功未建 異數頻加凡茲曠世未有之遭逢實屬夢寐難期之 恩

遇茲復以
何能濫叨
慎固封守
公亦只藉
師之力嘉
吏民之力
更荷
稍安愚分
皆戴德之
皇太后

懇收回成命疏

江西巡撫

沈葆楨

竊臣於本月二十日伏讀

上諭沈葆楨着加恩賞給

一等輕車都尉世職並賞給頭品頂戴等因欽此自天聞命無地容身在

君父之恩有加而無已然臣子

自問必求其所安伏念臣告養道員

簡授巡撫不次

之擢曠代所稀祇以時事孔艱未敢固讓而智力淺短奉職無狀至今耿耿於中茲以大慙就檢

天施下逮凡

此異數皆統兵大臣親歷行間十餘年身經數百餘戰所不敢希冀者臣何人斯乃安坐得之臣抵任時江西閭境肅清以臣籌備無方致遭蹂躪迭請嚴加議處從重治罪

皆蒙 恩貸下私慚感刻弗去懷今與蘇皖浙之全省
淪陷疆臣闕草披荆克復舊物者一體論功自顧駑庸何
以堪此當賊氛四逼臣未出省門一步兼以韜畧不如諸
將一切調度未敢遙制悉令前敵統兵大臣相機辦理血
戰累月僅足相持又經會國藩左宗棠不分畛域分以不
貲之餉濟以決勝之師轉危爲安始有今日而主客諸將
奔馳於炎風烈日之中晝夜不得休息弁勇傷亡殆半裹
創血戰扶疾以行且餉輒逾期師無宿飽病者缺醫藥亡
者遲殮墓其被擾各郡縣百姓焚殺之酷流亡之慘目不
忍觀耳不忍聞稍爲完善之區又皆竭其脂膏以充兵餉

然而主客各軍
奮勉圖功輸將
以爲利之心故
賑卹莫展一簣
軍民退無後言
賊尙據鄰封時
大局殊非淺鮮
測然天無私覆
君父之前
鑒合無仰懇

准收回成命俾軍民得以共諒臣心

高厚生成永戴

無極冒昧瀆陳伏乞

皇太后

皇上聖鑒訓示

臣不勝惶恐待命之至

陳請終制疏

山東巡撫閻敬銘

竊臣於同治元年九月在湖北署藩司任內丁本生父憂
奔喪至晉衰絰之中迭承

臣以衰毀餘生迫切懇辭未蒙
俞允仰荷四次

溫旨諭臣移孝作忠責臣以安民戢盜臣感戴
聖明

知遇之恩未敢始終固執跡涉畏蕙自維金革不避雖未
諳軍旅竊願附執干戈之列勉竭駑駘干犯名教冒昧從
戎以求上答
朝廷稍寬罪戾自本年四月到任軍事

方殷團逆踞於淄川教匪擾於兗郡東昌降衆勢漸燎原
而山東營規久弛將不知兵晝夜焦思運籌恐悞幸僧格

林沁勁旅東來先克淄城旋清鄒嶧移師堂冠併力驅除
臣雖駐軍在外實無尺寸之功悚慚交集前因督率無方
自請交部議處復荷蒙 恩綸不加斥罷格外優容臣
上無以慰 宵旰之宸衷下無以對凋殘之百姓徒虧
名義何補涓埃此實臣自問自咎非敢飾詞於 君父
之前者也臣知短才疎於此可見亦由自遭親喪弟又繼
亡五內摧傷心氣日耗軍事孔棘不敢言私中夜輾轉恒
不能寐追念服官京外將近二十年莫遂一日烏養之私
既不能盡孝於生前復不盡禮於身後何以爲子何以自
容今者四境已清軍旅已息若猶忘親戀棧日久因循實

負我 皇止以孝治天下之意更慚名教臣之獲戾百
解莫辭臣夙夜難安因憂增病惟有顛懇天恩開臣署缺
俾臣回籍終制稍伸罔極之思臣受 特恩不次擢用
終制畢卽當泥首 闕廷求賞差使不敢自耽安逸自外
生成臣不勝悚惶之至謹將微臣因東省漸次肅清懇請
回籍終制緣由恭摺具奏伏乞 聖鑒訓示謹奏

額

恩開缺疏

兵部侍郎

彭玉麟

竊臣於本月初五日欽奉

諭旨署理兵部右侍郎又

蒙

賞給紫禁城內騎馬當卽具摺陳謝並將傷疾未

痊一時難以到任情形具

奏奉

旨知道了欽此伏念

臣一介諸生從戎鄂皖幸仗

威福江面肅清微臣濫

廁其間曾無寸勞之可錄迺蒙

聖恩曲逮異數頻叨

臣之愚忱已難圖報此次進京陛見又荷

天語褒嘉

迭畀寵榮自顧何人膺茲

恩眷自當糜頂捐踵稍酬

高厚之恩臣自幼讀書粗知忠義誠如

聖諭何

敢固辭惟是臣之苦衷有不得不披瀝于

聖主之前

者臣自十餘年來帶兵江上風餐露宿右手右足積受重傷每逢春夏之交肝氣發動血不歸榮稍一用心遂至神識昏迷舉動失措本年奉

命巡閱長江事竣入覲沿途復喀血數次因至狼山略作休息始行就道是以臣於啟程摺內卽陳明陛辭後回籍養疴迨蒙

召見復又陳請現在秋涼氣爽幸尙可勉力支持轉瞬冬盡春來舊患必然復發臣于部務本未通曉加以素性褊急遇事不能含容迨至饋事之餘卽治臣罪而悞公已屬不小與其履而知艱不如量而後入且臣初到軍營自知才短不能服官與軍士相約不任職守是以咸豐年間歷拜浙江金

華府知府廣東惠潮嘉道並廣東臬司之 命俱未履
任迨 皇上御極畀以漕運總督安徽巡撫亦俱具摺
固辭仰荷 生成鑒其愚懇不忍拂其初志 曲允
所請今以衰病之餘忽忝卿貳之列是臣之始終不能一
轍上不免有欺于 君父下無以對江上各營前年臣
請開缺回籍渥荷 恩綸許不畀臣以員缺臣之私計
仍欲籲懇 聖鑒俯踐 前旨准開署缺俾赴江浙
一帶就訪名醫取道回籍或者枯朽之餘仰託 矜全
將來長江水師如有廢弛需臣整理之處拜奉 詔書
卽刻就道斷不敢稍有遷就推諉以期仰副 宸廑臣

渥受 兩朝知遇犬馬餘生一息尙存此身無所愛
惜惟願保辱軀而報 國非敢辭高位以沽名若其求田
問舍適志山林以爲娛老之方臣亦恥之區區微忱敢邀
慈鑒所有微臣傷疾未痊請開署缺緣由謹繕摺瀝
陳伏乞 皇太后 皇上聖鑒臣不勝惶悚屏營
之至

同治中興京外奏議約編目錄

卷二

整飭仕途疏

順天府府尹

卞寶第

請整飭吏治疏

御史

周恒祺

慎用牧令疏

御史

王道墉

請飭議保案疏

御史

郭從矩

請考核羣吏疏

御史

梁景先

請表彰激勵循吏疏

大學士

邢禛藻

奏仕途日雜請

飭考核裁汰疏

袁方城

請慎重選擇州縣片

湖南巡撫

惲世臨

請 飭議部選道府章程疏

御史 李德源

請道府州縣無庸減成疏

山東巡撫 閻敬銘

請禁書吏保知縣疏

通政使 于凌辰

職官不准捐流寓省分疏

四川總督 駱秉章

奏開復人員不宜發原省疏

四川總督 崇 實

請定降捐限制疏

御史 陸仁恬

請禁止奪情疏

御史 王朝榮

請裁河督疏

河道總督 喬松年

整飭仕途疏

順天府府尹 卞寶第

竊政治之要在於擇大吏大吏之要在於選牧令蓋天下州縣之積也一縣得人則一縣治縣縣得人則天下治設非爲長官者秉公持正察核賢否分別舉劾明示勸懲則中材何以奮興吏行何以修飭也竊觀今之州縣類多習爲鑽營不務公事考其詞訟則積案有百起有二三百起者有經年不結有經數年不結者小民守候拖延廢時失業考其錢糧則任意虧挪於應解正款頻催罔應考其緝捕則盜賊肆行巡防廢弛此等州縣一省之中幾居其半積習相沿絕無儆惕皆由上司曲徇人情不問政績於升

調缺出或培植私人或得受情托大畧爲地擇人者少爲人擇地者多甚且隱其劣蹟弗列彈章飾以令名轉膺薦牘上下視爲固然奔競遂成風俗而吏才日壞事理日紊似此而欲天下之治未有見其能治者查各省升調人員類皆以空洞考語保題殊非核實之道可否請 旨飭下直隸督撫府尹於保題人員將其本任有無積案及欠解錢糧承緝盜案等事於疏內聲名俾資考核其有積案五十起以上承緝盜案五起以上及徵解錢糧不及七分者均停升轉如該管上司徇隱匿飾含混具題別經發覺嚴行議處似此數者立格中材尙可勉致非屬苛求升調

不至濫邀藉期觀感或可挽回積習於一二也臣爲世風
吏治起見是否有當伏乞 皇上聖鑒訓示謹奏

請整飭吏治疏

御史

周恒祺

竊自軍興以來民生之凋敝已極各省籌兵籌餉日不暇給吏治不無廢弛現在中原底定而散勇降賊猶隱伏於各州各縣之中則所以辦理善後諸政不可不實力講求也謹抒管見六條爲 皇上敬陳之

一曰重

詔令以肅紀律人君之所以整飭四方者惟

此令出之惟行耳或察酌時宜或修明舊制凡見之通諭者無一非斟酌盡善關係地方利弊之事若奉行者一一致之於民夫奚政之不舉亦何弊之不除乃 朝廷勵精圖治不啻三令而五申而究其指歸仍不免視爲具文空

言塞責卽如清積案行保甲等事屢經 聖諭諄諄試

問各省之積案保甲究清焉行焉否耶上以實求下以名
應臣恐良法美意之莫能下逮也可否請 旨飭各省

大吏凡接奉通諭事件務必嚴飭所屬破除積習實力奉
行不得以一紙官文敷衍申覆仍復不時訪察儻敢仍前
延玩立予嚴參蓋上司之精神多周到一分則屬員之精
神多振刷一分頽風挽斯法度行天下之耳目一新矣
一曰核名實以舉人才事無鉅細得其人則經理裕如求
才誠目前之急務惟器必試而後知其利鈍馬必駕而後
知其駑良用人亦復如是也若聞其才而不試以事試以

事而不考其成。一列薦章卽予超擢。臣恐朝廷逾格之恩。適爲巧宦鑽營之計。可否請旨飭下中外大臣。凡保舉人才。必舉其一二事以實之。或品堪式俗。或勇足治軍。或潔己愛民。或片言折獄。舉凡操守詞章。以及理煩治劇諸類。必實有一節之長。方授以相當之事。一二年後。誠能實與名副。不妨破格超遷。若所行與所舉相違。舉之者亦難辭咎。庶上收得人之效。而下無倖進之心矣。

一曰惜名器。以待有功。品秩官階。固不可以濫厠。則一命之榮。一級之賞。亦所以錄微勞。乃近來軍營保舉人員。往往於實官上。並加升銜。而州縣一途。爲尤甚。推原其故。州

縣官階雖卑利權較重求保者欲攬其利權之重而又嫌其官職之卑於是無人不求陞銜頂帶刻下各省候補實任人員不下數萬而求其五品之州七品之縣寥寥無幾等處莫辨何以崇體制而勵人心至於佐雜微員每先謀一五品六品之功牌於報捐時填入照中冒爲軍功保獎更非慎重名器之道可否請 旨飭部核議軍功之升銜如係保官後另案加保或自行加捐者准其隨帶若一案中官銜並得者則銜可註銷佐雜之升銜如係到省後加捐特併者准其隨帶若未得官前之銜亦可註銷庶人知爵賞之貴而交相鼓勵矣

一日減捐納以肅官方科甲人員雖未必盡屬廉潔而自念讀書考試歷數十年之辛苦偶得一官一旦因貪去職則所得不若所失之大卽不肖偶萌貪念亦有所顧忌而不敢爲若捐納州縣不過費一二千金得之原易一旦出膺民社無不肆其掊克之謀以爲取償之計迨宦囊旣飽卽以其餘捐升府道大員較之爲循吏而以車異待升不更便捷乎縱令發覺嚴參而彼己爲富家翁矣從前軍餉浩煩 朝廷實爲不得已之舉刻下軍需稍減釐金可以補苴地方旣平京餉漸能全解似宜權輕重而酌去留且查近年銅局一歲所入統計不過百餘萬兩其間報捐道

府州縣者尙不及半少此數十萬金於庫欸當無所損可
否請 旨飭部核議將道府州縣之最關吏治者亟行
停止其餘事例不妨暫留所去者止一時之小利所持者
實圖治之大原關係實非淺鮮也

一日綜釐局以徵實數恭閱邸抄釐金一項曾蒙 諭

令各督撫體察情形酌留大宗撤去分局零星雜販概免
抽釐此誠 聖主體恤商民之至意惟 恩必期于

實逮政不可以虛行可否請 旨飭令有釐金省分將

從前所設之局悉數開陳奉 旨後已撤者某局共計

若干處暫留者某局共有若干處報部以便稽察所有應

捐應免之貨物亦必詳細開列刊刻告示徧貼各局之前俾商民共見共聞以免委員差役含混私收之弊仍不得分卡於外避其名而存其實庶善政可期廣被矣

一日省差徭以紓民困河南直隸山東等省差費甚重嘗有稅錢一兩而差費派至制錢五六串者緣軍興已久所有過境兵車及協濟車輛爲數煩多地方官不得不借資民力也乃查河南等省陋習凡州縣官之子弟親友無不擅用差車上站出一印帖或發溜單下站卽如數應付甚至家丁之丁幕友之友儼然乘傳往來相習成風實屬不成事體相應請

旨飭令各督撫嚴行禁革如地方官

有發印帖溜單擅用差車者濫發濫應之員均科以應得之罪至於正項差事應用車輛亦必嚴禁丁役藉端多索訛詐勒捐等弊官減一分之擾民卽受一分之恩是卽培植地方之一端也以上六條臣愚昧之見未必有補高深而用人行政察吏安民實目前之急務是否有當伏乞

皇太后

皇上聖鑒謹奏

慎用牧令疏

御史王道壻

竊維治世莫要於安民安民必先以察吏察吏之方自州縣始州縣之賢否天下治亂之基也邇來時事艱難盜匪充斥固由督撫之措置乖方將弁之攻剿不力而追溯釀亂激變之由未嘗不起於州縣今之州縣流品混雜一曰捐班其中非無幹員也然多有市井之徒借報效之美名售貪婪之巧計報捐只千餘金耳所捐者少而所願者奢一曰握篆遂以爲商之法爲官侵牟漁奪有難盈其溪壑者矣一曰軍功其中非無能吏也然亦有武健之夫勇於戎行未必長於吏治一旦得缺遂以治盜之法治民束縛

馳驟有妄行其嚴酷者矣更有幕友一流揣摩最工窺捐輸之徑捷則附入捐輸伺保舉之途寬則鑽營保舉一旦得志遂乃串通各署把持多方大吏受其欺朦小民遭其凌虐此則捐班軍功之中爲害滋甚者矣由是吏治日壞民志日漓抗官之舉從賊之謀固有激之使然者而髮匪捻匪教匪回匪遂致勾結蔓延而天下幾無完地臣愚以爲方今時務如久病然剿賊以治其標尤必安民以培其本安民之道非牧令之得人不可欲牧令之得人非澄清流品不可相應請 旨飭令京外各捐輸非舉貢文生概不准以州縣請獎以杜倖濫而重民社其州縣以外凡

非親民之官均聽其照常捐納於捐例仍不相妨至於軍營勞績非舉貢文生亦不准保舉州縣如有實在出力宜膺厚賞者儘可保以府佐同通等官何必予以州縣始爲優獎臣竊思州縣與教職其秩皆不崇而一則職司民牧一則表率士林於天下之吏治民風皆大有關係謹查捐例教職非廩生不能捐卽論軍功教職非文生不能保獨至州縣則漫無限制豈教職重而州縣反輕乎且州縣案牘煩多吏胥朦混事事皆須稽查豈不必讀書明理者亦可茫然爲之乎臣不敢謂舉貢文生之爲州縣果皆賢才也但念國家慎重名器之心與鼓勵人材之意必當澄清

流品而後人思自奮或可收保障繭絲之效也臣愚昧之
見是否有當謹奏

請飭議保案疏

御史 郭從矩

竊臣前奏玉牒館保舉太優曾經降旨令惇親王等妥議具奏已於十五日欽奉 上諭照所擬給獎矣但臣近聞宗人府知照各衙門則仍係保舉無論題選咨留傳說原議乃係援照道光二十七年咸豐七年兩案爲據臣查道光咸豐年間所保前案並不聞部員捐班中曾有何人同保無論題選咨留是前案原不至如此之濫况卽成案在前何不可變通於後乎又聞以分別字數爲勞績臣查謄錄寫字勞績幾何何至破格獎賞乎又聞照銅局分缺先聞銀數從優議敘臣查分缺先聞之上從優則有分缺

問前再優則有分缺先前再優則有遇缺儘數卽優而又
優何遠至無論題選咨留乎此事似小臣言似微然關於
用人行政之道則甚大不敢不爲 皇太后 皇

上再陳之 國家之開捐非得已也但官職可捐舉劾斷
不可捐今無論題選咨留乃保舉非官職也若保舉可捐
豈賢勞才能尙可捐乎從來士氣屈而學術卑學術卑而
政事壞此乃不易之理 國家設科取士必以庶常進士
分部學習所以重政事也自推廣捐輸以來各部選咨留
缺已全歸捐班占補庶常進士或至二十餘年不能題升
卽中獨賴題缺一項定例專補科甲一線之防猶爲今日

通經致用之路今查各部漢額郎中等官題缺少者止有兩缺一旦而令投效捐生搶補者至有數十人不知正途人員尙有何缺可以補用 朝廷以此優獎捐生獨不當慎重部務而爲正途計乎且實缺郎中二年俸滿截取知府既補題缺照例可於京察一等應得 簡放京卿道府是部曹乃清要之秩一轉卽爲崇班致治之道全在用人今內而公卿外而督撫偶出一缺 朝廷臨軒而擇未嘗不嘆人才之難顧今日之大員卽從昔日之五六品官而來苟不端其始進則人才何由而得總之用人行政事無大小言無先後但宜從長而斷不宜遷就爲安臣見識

迂拘備員諫職不敢因言既不從遂不再竭愚悃相應請
旨飭下吏戶二部再行核議是否有當伏乞 聖

鑒謹奏

請 飭考核羣吏疏

御史 梁景先

竊惟吏治之廢興視乎守令之賢否然必先覘其內蘊而後可驗諸施行比歲以來仕途益雜徃徃有身膺民社目不識丁者全在督撫大吏認真考核尙可補救將來近閱雲南撫臣岑毓英考核屬員奏疏凡府廳州縣佐貳雜職之由廩增附監俊秀文童捐納軍功出身者面試論策定列等第分別停委回籍休致者不下三四十員並聞解部試卷有鄙俚不堪傳爲笑柄者此等人員使之表率僚屬理民詞訟有不沸騰物議貽悞地方者乎查雲南爲邊遠省分又兼軍務甫平濫竽充數者如此之多則他省之較

爲完善者其輻輳雜沓更可想見相應請 旨飭下直

省各督撫查照滇省現辦章程於道府以下各官之出自
捐納軍功者破除情面認真考核嚴定去留以裁冗濫而
清治源至正途出身及試過文理通順各員或有性情偏
執不洽輿情官聲平常不講操守者仍應隨時甄劾不得
稍涉姑容似於吏治民生不無裨益臣愚昧之見是否有
當伏乞 皇上聖鑒訓示謹奏

請表彰激勵循吏疏

大學士祁寯藻

竊臣伏讀十月初二日 上諭左宗棠徐宗幹奏故員政績卓著懇請宣付史館一摺已故署福建按察使汀漳龍道桂超萬前在藥城等縣任內潔已愛民已故分發浙江知縣徐臺英前在湖南華容來陽等縣輿情愛戴該二員皆循聲卓著遺愛在民著國史館咨行湖南直隸各督撫詳摭該故員等生前政績編入循吏列傳以資觀感欽此仰見 聖朝振興吏治表彰激勵之至意臣聞國史館循吏傳自嘉慶年間編輯後久未續纂近年封疆大吏似此奏請者亦甚罕見且自軍興以來征兵籌餉幾視吏

治爲緩圖不知地方果得一賢有司平日弭盜安良化民成俗實足以消患於未萌其曲突徙薪之功不在敵愾捐軀者下現在守城陣亡各員均蒙隨時賜卹或奉特

旨宣付史館此等地方循吏功在無形譽傳衆口若不及時表彰致令沈沒何以昭激勵而勸後來應請 旨飭

各省大吏加意訪察政績官聲遺愛在民者奏明並咨史館編入循吏列傳以資觀感臣更有請者竊見各直省州縣供軍需辦團練不得不藉資民力其假公濟私拂衆斂怨者無論已卽一二潔清自好者亦不過罷勉辦公先其所急設卡抽釐方慮聚衆滋事練團築堡又虞負固抗糧

救過方且不違於民生疾苦地方利弊勢更不暇兼顧苟非至誠之心兼濟變之才安能用民財力而民不怨畔故至今日而言循吏操術爲至難用心更極苦也其已故者固應特予表揚其現任者尤宜亟加褒勉俾得殫竭心力以衛民生應請 飭下中外大臣保舉循吏確核品行臚列事蹟奏備簡用其有伏處之士潛修力行堪應循吏之選者如確有見聞亦准一體保奏現值大計之年各省府廳州縣卓異人員請並 飭各督撫將其政績實據詳細咨送吏部於引 見時開單進呈以備量材擢用近來賊勢日漸潰散而民生已極凋敝地方官如何招撫

流亡如何稽察奸
舉人員未必盡於
品錯雜尙待甄別
緩急可恃臣愚竊
也至保舉流弊須
凜然具在苟有天
爲吏治民生起見
鑒謹奏

奏仕途日雜請飭考核裁汰疏

御史 袁方城

竊自軍興以來變通捐例凡俊秀監生但捐銀一千數百兩便選實缺州縣由是屠沽市僧溷入其中賄賂夤緣爭先鬪捷而吏治遂不可問矣夫州縣爲親民之官民生之休戚所關亦卽國家之安危所繫當此瘡痍未復卽以明體達用之儒治之尙恐不足以勝任而况以屠沽市僧濫廁其間安望其勸農桑而興禮讓哉然使其畧涉詩書稍通文理則平日覽古鑑而慕良法讀律例而體人情觀感興起之餘或猶可加以教誨若其胸中暗昧或且目不識丁則一切文移案判勢必倚仗他人地方公事將何賴

焉顧捐例旣不可停卽此輩亦難盡革計惟有嚴行裁汰
臣不揣冒昧謹陳考核之法凡由俊秀監生捐納知縣無
論實缺署事候補擬請 旨飭下各直省督撫面加考
試以論一篇判一道如其文理清順判斷明晰方准與正
途人員一例升轉補用如其文理荒謬或竟目不識丁卽
以原品休致在若輩捐官之始所費無多卽使休致而頂
帶終身儼然在縉紳之列爲榮多矣但考試之時各督撫
必須嚴密關防無任代倩傳遞庶不至有名無實至於居
官之勤惰行己之貪廉則不惟捐納人員在所當嚴卽正
途人員亦不容少忽是又在各督撫之隨時察看秉公舉

劾而已臣爲甄別流品起見是否有當伏乞

皇太

后 皇上聖鑒謹奏

臣

臣

The image shows a large rectangular frame containing several vertical lines. These lines are evenly spaced and run from the top to the bottom of the frame. The frame itself is defined by a thick black border. The interior of the frame is mostly white, with some minor noise or artifacts from the scanning process. The overall appearance is that of a blank page with a grid-like structure.

150

請慎重選擇州縣片

湖南巡撫 譚世臨

再州縣爲親民之官億萬生靈環而託命自應慎重選擇以免貽誤地方竊觀近日各省捐輸減成漫無限制勸捐者惟務以減價爲招徠報捐者遂相率以一官爲貿易聞有由俊秀捐納知縣指省分發試用而所費不及千金者名器褻則仕途因而日雜不獨地方可惜亦於 國體非宜擬請 敕下各省及各路軍營嗣後減成捐輸止准收捐雜職虛銜其自州縣以上則除部定減二成遞減一成之外均令呈繳實銀不得再行議減庶於籌畫軍餉之中仍不失慎重名器之意卽隱寓澄敘官方之道又查

例載曾任實缺人員在部投供候選奉 旨發往各省

以州縣用或佐雜人員由軍功獲盜保奏以州縣補用者均歸於候補班補用此外尋常勞績均不隸歸候補班誠以候補班次最優一經到省遇有題調署缺悉隸補用其升調遺病故休致中簡缺以及丁憂叅劾之缺亦占缺最多用是特重其選所以獎有功戒躁進法至善也軍興以來保舉漸濫近來部臣深知其弊申明舊例奏定新章而從前得保之員早已徧於各省且籌餉新例凡得有應升人員隸其指項加成捐歸候補班雖定以三年之限而減成銀數僅得十分之二三佐貳雜職得有升階三年之後

捐銀四五百兩作爲候補班知縣即可補缺非如大挑教習教職拔貢各項正途人員尙須扣滿一年分別去留也湖南候補班知縣積至四十五員之多其心地明白者固不乏人而年輕識淺者亦復不少甚有不通文理閱視公牘並不能成句讀者湖南如此恐各省亦大畧相同此種人員論班次則皆係應補論才具則多不可用應請

旨飭下吏部妥議章程各省候補班除曾任實缺得有軍功保奏及奉 特旨發往以州縣補用者仍照定例辦理外其餘無論何項勞績保舉均照正途試用之例學習一年期滿由各督撫考核奏明堪歸補用班者照例敘補

其歷練未久尙堪造就者再察看一年以定去留若實係庸劣無能卽分別降革或亦澄清吏治保全地方之一法臣愚昧之見是否有當謹附片縷陳伏乞
聖鑒謹奏

請飭議部選道府章程疏

御史 李德源

竊查吏部則例內開在省道府缺出應請
旨簡放及
應歸部銓選者均不准外省扣留督撫違例保題例有處
分立法至嚴且密誠以題調之缺專歸外省升補月選之
缺專歸部銓選內外各不相妨部選之缺不准外省扣留
與外補之缺不准部中銓選其理一也乃各該督撫于應
歸部選之缺往往以該省候補有人奏請扣留擬補道光
二十九年給事中曹履泰以外省留缺過多請復駁缺
歸部之例並請將應歸部選之缺定爲一外補一部選部
議准復駁缺歸選之例而於一補一選之議未經准行及

咸豐十一年十一月以來迭經前大學士祁寯藻順天府尹蔣琦齡御史曾協均先後條陳選法皆請勿令外省扣留選缺爲疏通正途之計部議將捐升迴避保舉開缺留省補用四項遺缺不准外省扣留其餘升調遺病故休丁憂參劾終養改教等項遺缺遇有應歸部選之缺均准外省扣留現時奉行條例惟部駁捐升迴避保舉四項遺缺專歸部選不准扣留在部臣以爲有此四項歸選之缺銓政已屬周密內外已臻平允無庸再議更張夫果有四項遺缺爲疏通候選人員地步豈不甚善無如四項遺缺皆屬有名無實雖有歸選之條迄無出缺之日臣請詳言其

故查部駁章程不一如無故延擱凌躐請補者駁又外省
題咨擬補到部適擬補之員有撤任之事者駁又督撫將
試用期滿在後之員甄別題補者駁又丁憂起復人員擬
補到部文選司付查稽勳司尙未准起復者駁試思外省
缺出方扣留擬補之不暇擬補時亦必按依次序斟酌請
補豈有無故延擱凌躐請補之理外省擬補之員必係上
游交重之員豈有一面擬補一面撤任之理卽或擬補後
非該員本省上司參劾撤任亦係罕有之事甄別試用人
員皆查到省年分豈有先後倒置之理應得擬補之員如
有服滿報部之案本員孰不豫先布置督撫亦必先行詢

問豈有業經督撫擬補尙未呈報起復之理部駁章程臚列多端求其人以實缺不過百中一二設竟有該督撫仍將以其次應補之員題咨擬補逾限復准先行咨部展限部中永無駁缺無從開選此駁缺歸選之有名無實也官至道員無從再行捐升保舉開缺以按察鹽運使候補者百不獲一至實缺知府捐升道員試用及保舉開缺以道員候補者舍實缺而就候補亦屬寥寥此捐升保舉兩項遺缺歸選之有名無實也迴避人員非經捐免卽係對調罕有缺出此迴避遺缺歸選之有名無實也不准外留專歸部選之缺只此四端按之皆有名無實而在部候選人

員由道府同通州縣以至佐雜各項班次不可勝數員多
缺少竟有皓首投供不得一缺者臣愚以爲方今外省多
事用人之途不一而足必欲盡復舊制凡應歸部選之缺
概不准外省扣留此不識時務之談必不能行設狃於現
章不加裁酌各缺多爲外省侵占外重內輕選法壅滯于
用人行政亦多關係再四思維如照前給事中曹履泰之
議將例歸部選各缺改爲一選一留最爲平允抑或將升
調遺病故休丁參終養改教十項部選之缺酌改數項令
外省留補酌留數項歸部中銓選務令內外持平兩無偏
重伏乞 飭下部臣秉公核議庶於銓政有裨臣爲補

救銓政鼓勵人材起見是否有當伏乞

聖鑒謹奏

請道府州縣四項無庸減成疏

山東巡撫閻敬銘

竊惟捐例之開藉以籌備京外餉糈原爲朝廷萬不得已之政而行久弊滋不但無補軍精抑且暗虧國計伏見我

皇上御極以來時以澄敘官方爲念於大學士祁寯

藻順天府尹蔣琦齡之奏下疏通正途之議於給事中郭祥瑞之奏嚴甄別捐納之條於湖南巡撫惲世臨之奏加實交免保之例仰見

聖明洞鑒至悉至詳但流品之

雜名器之濫諸臣皆詳切言之而流弊之極至於侵

帑病民生者則言之未詳夫

國家立賢無方正途出身

者未必皆賢輸納出身者豈盡不肖然捐輸原爲籌餉計

臣請卽以籌餉言之外省自道府以至佐雜等官皆隄捐
納丞佐雜職尙無民社之責道則巡察數郡府則表率一
方州縣一官則寄以地方寄以百姓寄以城池府庫寄以
錢糧征收責任尤重自古未有不慎選牧令而能治天下
者也卽以納資階進亦不宜視之太輕今計各省捐輸減
成章程合以籌餉定例直東兩省離京不遠報捐章程與
銅局相等豫省以餉票折收加一成現銀約居十成之二
湖廣川浙約居十成之三江西兩廣約不及十成之三雲
貴約居十成之二安徽全收餉票約居十成之一其餘各
省均無過於三成者計由俊秀捐納州縣至指省分發不

過千金至捐免保舉一成長收實銀亦僅增數百金耳持
千餘金之本儼然爲數萬生靈托命之官宜其只計及州
縣之有錢糧未必計及地方之有百姓以臣所見收納錢
糧而計山東一省大縣五六萬兩小縣亦萬餘兩不等彼
以官爲貿易者則於其間畧一侵吞已逾原捐之數卽令
嚴查重究叅革查抄而所侵之項已歸無著 國家所賴
者惟正欸之錢糧捐輸不過補助於萬一若如此明效輸
將暗虧帑項通盤籌計是得於捐輸者少而失於帑項者
多卽爲籌餉計亦不宜減成輕予人以州縣也道府爲督
率州縣之官州縣旣須照例加成道府亦應歸一律惟有

仰懇 皇上飭將道府州縣四項官職仍按籌餉定例減二成章程呈繳實銀均在京銅局報捐不得以鈔票現錢繞算庶救做補偏而於京餉亦大有裨益或謂現在部定章程凡捐納人員到省後均由督撫甄別立法慎密察吏不明督撫之責也不知巧宦行徑每善彌縫到省之初類能謹慎一經受篆日見可欲遽易其操迨至上官查出糾叅於事已爲無及卽於此項人員到省嚴爲考試胥子停委停補旣非朝廷示人以信之義亦無以激輸公報效之忱且停者此輩安必來卽勝於前待之太輕人不自惜棄置若器政體非宜臣愚以爲徒齊其末不如力遏其源

也或謂同一捐資未必捐項多者皆可用之才捐項少者盡不肖之輩不知從前捐納州縣一官不下萬金非家道殷實及自度才器尙堪任使者必不敢冒昧呈捐其父兄亦不令其子弟躁進卽任官後經手錢糧思欲染指自揣身家甚重亦不肯嘗試爲非所以我 朝屢開事例權濟一時均無大弊獨至今日不然者實因捐一州縣所費無多有力者子弟相沿爭爲壘斷無力者借貸而至易於取償官不安於末秩士不安於讀書衆志紛然羣趨於利欲其自愛其可得耶非開捐之爲害而減成之爲害昭昭然矣或謂各省軍務未平需餉正殷京師八旗營餉待用尤

急遽議加增或恐捐生觀望致餉項無出不知現辦軍務各直省均不專藉捐輸直東豫晉之餉出於地丁江皖湖廣之餉出於地丁者半出於釐稅者半粵閩之餉出於地丁鹽茶陝甘之餉出於地丁協濟川浙之餉出於地丁釐稅惟雲貴兩省餉無所出稍資於此然合歲而計所入無幾究亦無益軍資今僅將此四項官職改歸京局其餘仍許照例減成報捐則各省均可補苴毋庸過慮惟京餉所需甚急何敢不愼加計議臣在農曹詳知銅局每月所入出於封典職銜貢監生者十之七出於實職官階者十之三此四項在實職官階中尙不能及三分之一卽使上兌

者少於捐務原無大損况擬收新章照籌餉例定銀數收
納實銀以多補少捐一名仍可抵從前之三四名且外省
不得報捐則此項必盡歸銅局京局亦一律不准減成則
捐生無所希冀人知名器可貴自更樂效輸將京餉將日
見其增而無所損此臣所以急請變通辦理也前准部咨
議覆湖南撫臣惲世臨之奏擬俟軍務稍平再行更正部
臣綜計盈虛實爲慎重軍餉起見臣之所請非敢不利害
兼籌實見此四項官職減成收捐並無益於軍糈而反有
傷於國計故敢冒瀆 聖慈妄獻末議愚昧之見是否
有當伏乞 皇太后 皇上聖鑒訓示謹奏



RTA

請禁書吏捐保知縣疏

通政使 于凌辰

竊惟知縣一官刑名錢穀實有專司撫字催科皆宜盡善我朝設官置吏以來首嚴茲選非科甲官廕明經正途出身者不得濫授邇因軍饑浩煩暫開捐納一途原屬權宜萬不得已之計復恐其賢愚錯雜有害百姓故立甄別之法以防之慮深遠矣至於書吏在該衙門當差十數年後而始得充經承經承役滿後其能幹者僅得從九未入職銜而亦不能卽選其已登仕途者非永無升轉之例或經督撫保舉亦必其曾任佐雜佐貳論貲計俸著有能聲方准升轉從未聞有以尙在本衙門當差之書吏並未充

過經承亦未選過從九未入而卽驟選知縣實缺者有之
實自近來之保舉遞加始查書吏派充各項差使非必事
務繁多轉勞於本衙門也亦非必自備資斧甚苦於本衙
門也赴差有口費住差有津貼較在本衙門已偏得多多
且又非若軍營差使並無所用其奇才異能試問所司者
何事亦不過供奔走管書記耳以書吏爭趨之捷徑卽保
以佐襍佐貳已不爲不優矣而保者竟遞保至正印選者
卽銓選一實階殊與慎重名器之道未甚允協且各衙門
書吏久慣作奸作僞非精明上司靡不墮其術中是以每
恭逢 恩詔蠲租減賦賑災救荒凡有關民瘼者

天語煌煌必切誠毋任吏胥舞弊仰見 朝廷洞燭靡遺
刻刻防杜至意若一旦而令若輩驟膺親民之任故習復
萌勢必多方掊克以謀飽其私橐何暇爲國何肯爲民書
吏縣令斷非小民福星况當此兵燹之後地方半多凋殘
何堪再事朘削全賴爲司牧者廉明公正愷惻慈祥以與
民休息至如何安集如何撫綏更如何而始可以爲民父
母在書吏平日旣未討論講求臨時必至錯置顛倒縱使
督撫不時舉劾其間愛惜功名者亦所或有然求什一於
千百之中竊恐官方之日壞而民生之日蹙也縣令一官
所關實非淺鮮可否請 旨飭下該部按冊逐一檢查

將書吏由保舉層層遞加至銓選知縣一條永行禁革其
已選知縣實缺並已經指省分發試用知縣或由得保舉
知縣後加捐者概行撤銷另爲酌核獎敘更擬請嗣後除
銅局捐輸軍營保舉外凡係派書吏差使永不得層層遞
保至正印官階以示限制而杜冒濫庶於國體官方兩
有裨益臣爲慎名器抑倖進起見據實直陳是否有當伏
乞 皇太后 皇上聖鑒謹奏

職官不准報捐流寓省分疏

四川總督駱秉章

竊查捐例內載指省分發一條原以俯順輿情而廣登進所指之省其捐生並非該省之人於官常原無妨礙且入仕之人必先呈明原籍並服官省分不准置買田產均例有明文所以杜漸防微之意至爲深遠乃近來各省有自其祖若父流寓數十年託業是邦寓居眷屬其子弟生長已與土著無異乃貪圖便利竟以原省籍貫報捐卽指發流寓省分是雖爲客民已在部民之列一旦混入寮案與地方官相抗甚或所捐官職較大居然以勢分相凌不惟遇事諸多窒礙且驟使之臨民其平昔同居里巷之人必

生藐玩而其親戚故舊多係本省夤緣請託既難破除情
面且寓居既久閭閻瑣細無不周知藉故搜求挾嫌羅織
尤所不免求其奉公潔已裨益地方百不獲一是與服官
原籍者理實無殊而較置買田產者更多流弊現在川省
不乏其人他省諒亦不少臣愚昧之見擬請嗣後指省分
發之員先令呈內申明並同鄉官出具印結亦添註所指
省分並非向來流寓及其祖父並非託業斯土方准分發
俟到省後仍由督撫確查如係隱匿從前流寓朦混指捐
卽行奏叅嚴加議處至前此指發流寓省分各員悉令呈
明改發別省毋庸另繳指省分發銀兩以示體恤臣爲慎


重官方起見是否有當伏乞

行謹奏

皇上聖鑒飭部核議施

臣

等



The image shows a large rectangular area with a thick black border. Inside, there are 10 vertical lines creating 10 empty columns of varying widths. On the right side of this area, there is a small, dark square marker.

--	--	--	--	--	--	--	--	--	--	--

111

奏開復人員不宜仍發原省疏


四川總督崇實

竊維 國家無絕人爲善之心而人臣有執法不移之義所以澄敘官方政歸畫一也查各省官員既有三年考績之典復有隨時甄別之條此等人員一經罷斥例不錄用近以軍興需材孔亟往往破格仍予開復然須示以限制方成政體廼臣近見該革員等有赴軍營投效經各路統兵大臣暨各省督撫以勞績保舉開復原官者有赴京局呈請加倍捐繳銀兩准其開復者往往奏請仍歸原省補用在 朝廷寬大爲政不追既往許其自新以觀後效原與隨時叅劾之例並行不悖惟令仍歸原省則於治理大

有關係蓋此等大計及甄別人員如無十分劣跡不過止於降調尙可容留原省至於竟行罷斥多係聲名狼籍衆所指摘之員若准仍歸原省則大吏彈劾之權幾成畫餅而貪士梯榮之路巧於轉圜且旣經開復卽當委用而劣跡彰著通國皆知百姓傳言以爲口實前之屏棄幾成虛設况仕路甚寬何地不可托足而必戀戀於原省者苟非欲售其故技卽屬自便私圖種種鬼蜮不問可知臣以爲此等人員雖准開復斷不可仍歸原省如係立功軍營保舉者卽令其服官於立功之省如由京局捐復者卽應歸部銓選儘遇原省亦應改掣如此辦理似於廣爲延攬之

中尙寓力分涇渭之意俾舉錯益昭慎重而政體仍屬兩全臣伏查四川一省既有此等人員諒各省當亦不免相應請 旨敕下部臣除因公呈悞奏請開復人員不在此例外若遇有身被計典及由督撫特行甄別斥革者卽使有勞可敘並加倍捐繳銀兩皆不准仍發原省其已經發往者均查明改歸他省明定章程示以限制庶於吏治不無裨益矣臣愚昧之見是否有當伏乞 皇太后

皇上聖鑒訓示謹奏



請定降捐限制疏

御史陸仁恬

竊維被叅各員前因捐復太濫經吏部議以不准捐復各條辦理已有定制惟捐復雖不能行尙無不准降捐之例是以近日呈請捐復者除實犯贓私人員不准捐復原官亦不准其降捐外其餘或因案情重大或經督撫以卑污貪酷昏庸乖謬叅劾降革者雖不准其捐復而該叅員或請降捐到部部臣仍行核准伏思此等人員雖與實犯贓私者有間惟案情與叅語旣覺太重則其人之不足愛惜可知若令復登仕版難保不故態復萌至降捐之後得有實缺將來或請捐復或請捐升卽不再核原案以定准駁

一經得志何所不爲貽害地方尤非淺鮮且此輩恃有降
捐之條雖被嚴叅亦不知畏安望其洗心滌慮奉公守法
乎擬請 飭下部臣嗣後不准捐復人員遇有案情重
大及叅語過嚴者非特不准捐復並不准其降捐則人知
自警官方益見澄敘矣臣愚昧之見是否有當伏乞

皇太后 皇上聖鑒訓示謹奏

請禁止奪情疏

御史 汪朝榮

竊惟人臣致身之義與孝子愛親之忱二者相因所以陳情乞養者寬其歲時守制終喪者著爲今典自軍興以來需才孔亟帶兵大員暨各督撫或以全局所關資其鎮撫或以重城新復賴其維持我 皇上顧念疆圉往往

特旨奪情是爲變通權宜之計誠非得已至於道府州縣各官及隨營人員關係較輕才具優長者亦正不乏人豈得貪驩虞之小補毀名教之大防乃近來外省道府州縣各官及隨營人員一經聞訃百計營求爲奪情之舉各督撫輒爲具疏代懇隨營人員則以防剿喫緊爲詞守土

人員則以紳民愛戴爲詞於是奏留之後薦牘屢登州縣等官有不數年而保至監司大員者是以哀痛之身爲梯榮之徑不知古人墨經從戎出自君民之挽留並非出自私意之營謀也此等天性涼薄之人而欲望其移孝作忠其可得乎相應請 旨飭下各督撫除軍務省分帶兵人員防剿喫緊未便遽易生手准其奏請奪情仍俟軍務告竣再行回籍守制外其餘隨營糧臺文案各員及並非軍務之省分道府以下各官一概不准代懇奪情如有聞訃之後營求奏留遲延不卽回籍守制者卽着據實奏叅治以不孝之罪以爲有忝倫理者戒臣爲維持風化起見

是否有當伏乞

皇上聖鑒謹奏

--	--	--	--	--	--	--	--	--	--

11111

請裁河道總督疏

河督 喬松年


竊維設官分職總在因時制宜事有必須專任者舊雖無官可以增設事有易於兼領者舊雖定缺可以議裁查河南山東河道總督一缺從前事體煩重因黃河經由河南山東兩省所轄黃河堤工共十四廳而又有運河六廳且全漕數百萬石糧船絡繹北上人夫眾多宵小易於溷跡濟甯爲山東門戶亦須大員彈壓是以設此總河駐於濟甯以其專治兩省黃河又治運河兼催漕運事固煩劇非巡撫所能兼也迨咸豐初年河決銅瓦廂之後河南黃河工裁去五廳山東黃河工全行裁汰是黃河工惟有河南

現在之七廳其運河工惟以捕河所屬自戴廟至張秋鎮一段爲最要因彼時河臣防河駐於豫省捕河運道遂改歸山東撫臣就近派員隨同運河道辦理循爲成案是運河之事亦大減于昔年矣河運之米不過十萬石視從前祇三十分之一船小而人亦無多無復有匪徒藏匿其內則彈壓亦不須大員矣是以河臣常駐開封誠以黃河工爲重也然黃河卽在開封城外距城只二十餘里河南撫臣極可兼顧且撫臣本有兼理河務之責若將河南河工交河南撫臣兼辦山東河工交山東撫臣兼辦於事理極爲允協不至有鞭長莫及之慮臣初履任時卽思維及此

時因東省方有治河之議果其興工則事關兩省誠須有大員督辦是以未敢遽卽請裁此缺今旣未舉大工再三揆度總河實非必不可少之官莫如裁汰以期省費省事臣披閱舊牘見同治元年御史劉其年卽有請裁總河之奏二年親王僧格林沁亦有此奏奉 旨交議經前河南撫臣張之萬以詳加體察再行奏請覆奏以至于今臣揣張之萬之意亦祇因山東河勢未定撫臣或不能兼顧耳今又閱數年臣詳加體察目前東省臨黃皆係民堰已無官工並運河皆可歸於巡撫兼管豫省黃河距省極近亦可由巡撫兼管山東撫臣丁寶楨署撫臣文彬皆在山

東多年於河工極爲熟悉河南撫臣錢鼎銘講求河務利弊已及三年與臣同心併力克奏安瀾以之兼辦運河黃河皆綽有餘裕斷不至於貽悞夫總河雖不爲冗員然分併其事於撫臣而不至於貽悞則亦不必定設此總河之官縱慮將來山東仍有黃河工程或非巡撫所能兼管顧其事尙遠目前總可暫裁但關防不必銷毀封存藩庫如果數十年之後情形又復不同仍設總河亦甚易也臣去年曾有添設泉河通判之請今乃請裁總河兩事似爲不類因泉河分隸十七州縣散而無紀必須有專員以責其成是以增設通判黃河運河本分兩省公事少於昔年改

由兩省撫臣兼辦洵爲簡易是以擬請裁汰總河皆係酌
度時宜不敢逞其臆見可否仰懇 飭下吏工兩部會
議如臣言可採荷蒙 允准施行所有河工候補人員
應如何分撥河標各營應如何分隸及未盡事宜容臣另
行會同兩省撫臣妥議具奏所有敬陳管見緣由理合恭
摺具陳伏乞 皇上聖鑒謹奏



111

同治中興京外奏議約編目錄

卷三

請籌費移屯兼舒國用疏

山西巡撫 沈桂芬

請定天津水田章程疏

通商大臣 崇厚

請變通旗民交產章程疏

直隸總督 劉長佑

查修黑地章程疏

大學士管理戶部 倭仁

請查辦虧短各稅疏

御史 朱澄瀾

維持根本疏

御史 杜瑞瀾

請籌費賑饑疏

四品京堂 彭祖賢

直隸辦賑疏

通商大臣 崇厚

請飭招商販運疏

太僕寺少卿 彭祖賢

議籌捐義塾粥廠經費疏

通商大臣 崇厚

請變通奉天運糧章程疏

給事中 陳鴻翔

請飭禁崇文門稅務需素疏

內閣侍讀學士 鍾佩賢

請裁撤權宜之政疏

左都御史 全慶

請裁戶捐鋪捐片

給事中 王憲成

荒產宜設法杜弊疏

御史 朱澄瀾

請免軍需造冊報銷疏

大學士管理戶部 倭仁

請戶部慎選司員疏

御史 許廷桂

請籌費移屯兼舒國用疏

山西巡撫 沈桂芬

竊維我朝定鼎燕都居重馭輕八旗禁旅悉入環衛每歲糜金錢數百萬兩以贍其身家計至深也無如二百餘年來戶口日煩縱使軍旅不興歲入如故隱銷坐耗上與下均岌岌有不可終日之勢歷朝謀國諸臣已逆知經費之難繼與旗人生計之日艱屢次條奏實已准行者如清查入官地畝分撥拉林地方移住雙城堡屯田外官准帶親族隨任所以調劑之者至矣而屯邊之法旋以安土重遷事寢不行近復准出外謀生而去者寥寥固由人情憚於跋涉亦以各旗兵丁之願去者欲貿易則無本欲耕種

則無具欲遷徙則無資也臣官京師時親見旗民生齒繁
庶不農不商除仰食錢糧外別無生生之策自園法變更
南漕不繼一丁所領之糧不敷供一丁之食其强者悍然
爲非每陷刑網弱者坐以待斃轉於溝壑我 皇上視
民如傷四海之內一夫失所猶深軫恤矧以八旗世僕勲
舊子孫近在輦轂忍令饑寒顛覆不爲之計乎從來以一
人養天下恒苦其不足使天下自爲養常覺其有餘臣竊
以爲今日安插旗人其上策無如移屯邊方中策則聽往
各省而已夫移屯於豐盈坐享之日人情孰不好逸而惡
勞移屯於凍餒交迫之秋人情又莫不辭饑而就飽此今

日移屯一議較之昔人事半而功倍也臣請先言聽往各省之法卽就從前武隆阿英和諸臣所奏而推廣之無論馬甲養育兵閑散其願出外謀生赴各廳州縣者准其徑呈本旗都統前往照商籍軍籍例編爲旗籍戶婚田土命盜案件歸地方官管理生子隨時呈報督撫年終彙咨部旗綠營守戰馬糧及各營將弁亦令一體考拔並許用旗籍應府州縣文武試及鄉會試欲應繙譯試者照各省駐防例凡降革休致官弁及舉貢生監與各省駐防願移者均聽之此移之內地人所樂從其資給概從其省也至若移屯邊防之法臣請

欽派廉幹大員爲屯田大臣隨

帶司員查照舊檔於奉天吉林一帶及獨石口外紅城子開平等處與張家口外之興和新平等城昔年富俊孫家淦諸臣所勘定舊地歲計可開若干頃並建造房屋城堡添製農具牛種及軍裝器械酌定成規宅中駐扎始終經理其事再由八旗都統剴切勸諭旗戶願移口外者照道光初移屯雙城堡舊例由戶部當堂發給治裝銀三十兩沿途官給車馬到屯後每戶官給房屋四間農具牛籽皆備三時務農之際講武刑罰教養之事皆屯田大臣主之十年以後地畝照下則升科征收之糧糶運於口內而積銀於屯所每年卽以屯糧所糶爲次年京旗移屯與屯所

各項之用無事再動庫帑此移之邊防事極艱難其資給不得不量從其優者也然議者必謂口北寒冷不宜粟麥糴食無出流離遠徙易傷臣僕依戀之心不知昔年迭次移居雙城堡及拉林地方旗戶至今長養子孫稱爲樂土若非耕種何以自存至孫家淦勘地原奏亦將地方之寒暖穀種之所宜與日用之水火煤薪旗民之相安蒙古旗廠之無擾以及山場之可牧平原之可獵條分縷晰非徒托諸空言况人氣日聚地氣亦開天氣卽爲日暖旗人不過一遷徙之勞永可豐衣足食較之株守在京饑寒無策告貸無門相去遠矣臣所謂恤旗民者此也議者又必謂

邊屯太多禁軍單薄恐非強幹弱枝之道不知 聖朝
開國之初人心甫定不得不藉資勁卒鎮輔京畿今則薄
海黔黎胥歸天籍自軍興以來收復郡縣殄除渠魁大都
綠營兵勇及蒙古與東三省兵力居多旗人生長京華習
於豢養偶有調遣未聞得力若令移屯口外練習風霜耕
種牧營生資勞苦氣體必見充實再能督帥得人訓練有
素無難上復 國初驍健之風十數年後環邊之地東
西開闢繇亘不斷北可震攝強鄰南亦以拱衛京邑設有
征調緩急更爲可恃臣所謂足邊防者此也特以移屯諸
費昔年猶以爲難今日帑藏空虛更安得此閑款臣嘗私

心計之八旗現放兵餉除二成大錢外實放銀四成人口
噉噉朝不謀夕各省軍務告歲必應循例照八成舊章以
裕兵食竊謂救八旗一時之窮困其惠小貽八旗無窮之
贍養其利長當未減之時而忽議減其勢逆而難行迨已
減之後而量爲增其勢順而易節請於定復八成兵餉之
年暫給六成酌留二成每年約可得銀一百餘萬兩治裝
銀兩與房屋種具每戶以八十兩計之加以屯所修城堡
製器械及一切費用每年至少亦可移數千餘戶俟屯田
升科後移屯有資京旗兵餉仍復八成之舊如此則目前
經費毋庸另籌日後正供永無不足臣所謂舒國用者此

也昔臣佐理度支籌之至再而軍旅方亟未暇上陳今雖
出爲疆吏不敢緘默自安所幸僭僞削平東南漸臻底定
寰宇民生皆蒙休息似宜及時預籌本計勿責旦夕之效
冀開樂利之源 國家億萬載之丕基可於是而益固
矣是否有當伏乞 皇上訓示敕部核議施行謹奏

請定天津水田章程疏

侍郎通商大臣 崇厚

竊維水利爲農桑之本田疇乃衣食之源直隸拱衛神
京瀕河濱海溯自宋元明以來何承矩虞集徐貞明汪應
蛟左光斗諸人講求水利曾於京東京南及天津河間府
等處先後試墾水田我朝雍正年間直隸大水怡賢親
王周歷畿輔大興水利開墾稻田六千餘頃閱今百數十
年漸有荒廢而沿河州縣尙多種植秔稻永享其利士民
慨其遺踪至今稱道咸豐九年間 欽差大臣親王僧
格林沁督兵大沽海口以海河兩岸舊有水田日久廢棄
倡勸捐資在於鹹水沽營田三千五百四十畝葛沽營田

七百五十畝挑溝建閘引用海河潮水以資灌溉就地招
集農民發給資本認種其時臣隨辦海防親見相度規畫
遂使斥鹵之區成爲沃壤今已四載歲獲有秋於是附近
鄉民咸知水田之利卽有泥沽等村自行開墾稻田多頃
聞風興起確有成效上年夏間僧格林沁將前開稻田奏
奉 諭旨交直隸督臣派員經理臣飭委天津海防同知
姚經陞就近經理在案臣覆查水田藝稻其利甚溥自北
直鮮田疇之利致運粟於南方果能不憚煩勞不計近功
因地之宜順水之勢相機營治則開得一畝卽得一畝之
益洵於 國計民生實有關係臣往來海口嘗見沿河荒

地一望無際高者爲茂草窪者爲沮洳荒而不治深爲可惜查大沽協都司鄧啟元前於僧格林沁創開稻田之時卽係該員隨同勘辦情形熟悉臣復派該都司前往將前開地畝現在情形詳細履勘茲據鄧啟元姚經陞面稟前開地三千五百四十畝近年有佃認種者二千七百九十畝此外地畝因地勢高下不一距水遠近不同收成未能一律佃戶賠累難支因而佃逃地荒該委員等詳細查勘其中尙堪招佃承種者二百四十畝下餘五百一十畝非滲漏不能儲水卽鹽碱不能滋長實由地勢使然尙非耕耨不力必得添開進水溝一道則前項荒地留有二百畝

可以招佃承種並於溝旁荒地可開闢七百五十畝一律引水種植共計收復並新開地一千餘畝俾已成之田尙不致仍復廢棄而水利可推廣至各該散佃除咸豐九年所募者經僧格林沁給與資本外其新招之佃並現議開墾之地佃戶均應發給資本春借秋還歲以爲常俾得及時播種並擬購屋十數間以資安礮囤米之用統計建築橋閘挑開溝渠並佃戶資本置房價值共約需京錢一萬五千七百餘吊秋後仍可繳還永遠作爲籽種資本之用查天津道庫歷年收存租米變價據該道李同文聲稱除因公用外尙存銀一千五百餘兩又上年新收租米約可

變價銀二千兩以之儘數動用現計不敷一千四百餘兩擬在於洋藥釐捐項下暫時借墊俟收有租米糴價卽行還款至僧格林沁原定開墾章程每地一畝初年交租米三升三合次年五升三年一斗八升俱按海口市斛交收此後永以爲例並無增減又每地一畝五分交稻草一束計重五十斤現在各地啟征租數應卽照例辦理惟據各佃聲稱地土有肥磽卽收成有豐歉每年秋禾登場除交租米所餘無多不敷一分人工之用賠累難支懇請量爲減租臣詳加體察除葛沽稻田係交營兵承種原定每畝交租一斗二升本不爲多且土脈肥饒收成豐稔毋庸置

議外其鹹水沾地佃多係力作貧民若不稍事變通竊恐
佃戶逃避使已熟之田荒而不治應照原定租數改爲每
畝收倉斛一斗八升則較之海口市斗已有減少至總佃
副佃所種之地應交租庫酌免十分之三以示體恤而免
藉口臣爲力保已成水田並論廣水利起見如蒙俞允臣
卽飭天津道督飭該員等責成總佃招募誠實農民認種
一面將應修各工趕緊照估妥辦嗣後稻田收穫租米除
變價發給資種並歸還借墊暨歲修溝隄外所餘稻米卽
仿照義倉社倉之例由天津道妥爲經理存儲以答 皇
仁而垂永久是否有當謹恭摺具奏伏乞 皇太后

皇上聖鑒訓示謹奏

--	--	--	--	--	--	--	--	--	--	--

程照案辦理庶旗民有無均可相通於八旗生計不無裨益等因奉 旨依議欽此各行到臣當經飭司通行各屬遵辦在案嗣據調任布政使王榕吉呈稱據前任清苑縣知縣朱溥稟稱遵卽出示剴切曉諭並傳集鄉地予限查報如各村民人買賣旗產互相捏飾匿不稅契升科間有屯目社書稟出某村某戶隱匿旗地數畝或數十畝若據稟紛紛傳質人數繁多不免擾累咸豐二年弛禁後查辦陞科一無成效此次准令旗民交產奉文日久查辦仍無頭緒其藉端生事之輩反得有所藉口而肆其指控案牘日見煩多糧租毫無實濟利未能興弊不堪舉與其任

請變通旗民交產章程疏

直隸總督 劉長佑

竊照同治二年四月准戶部咨議覆御史裘德俊奏請仍
准旗民交產一摺抄奏內開咸豐二年會議令順天直隸
等處悉准旗民交產照例稅契升科奏奉

諭旨准

行嗣因弛禁後各州縣請報陞科者甚屬寥寥而盜賣隱
佔之案層見迭出雖有升科之名並無納賦之實復於咸
豐九年奏請規復舊制仍禁民人典買旗地遵奉在案茲
據御史裘德俊以旗籍生計艱難請復旗民交產之例應
請准如所奏順天直隸等處無論老圈自置亦無論京旗
屯居及何項民人俱准互相買賣照例稅契升科一切章

法而不能行曷若變通辦理使農田稅課兩有裨益悉心酌議不必責成鄉地人等按畝查造畫清地界冊籍凡有置買旗地無論遠年近年卽以同治三年爲期按村出示曉諭飭令民人自赴州縣呈明地段畝數有原契者檢同原契查核相符立時查照章程分別酌定應征錢糧數目卽自同治三年起征粘發旗產契尾給領收執毋庸等候覆勘再議科則以期迅速既不許差役下鄉藉端勒索亦不煩弓手人等赴地勘丈所征糧銀按季造報俟一律報完彙歸旗產奏銷冊內報部如其有意故違逾限延不呈報一經查出或被告發卽將地畝入官兼治以隱匿不報

之罪如此酌量變通既與原奏章程並無窒礙且可速收實效至咸豐二年查辦案內間有已經報出地畝尙未議定科則旋即奉文停止此時若仍令按年補征未免向隅况九年以前民欠糧銀曾有奉豁明文此項事同一律應請卽以此次查辦爲始統自同治三年起征以紓民力等情由司具詳經臣咨部核覆旋准戶部咨覆此案章程酌量變通應由臣奏明辦理等因卽經飭據前署布政使李鶴年覆核詳請具奏前來臣查民人旣准置買旗地自應照例稅契升科未便任令隱匿延不首報該司等所議變通辦法係爲稅契升科不致有名無實起見擬請准如

所議分別辦理謹恭摺具奏伏乞
上聖鑒敕部核覆謹奏

皇太后

皇

查辦黑地章程疏

大學士管理戶部 倭 仁

竊照黑地升科一案前於咸豐十一年

欽派臣寶

鋆臣董恂等會同直隸督臣順天府府尹督率各該地方
官查辦嗣因前任昌平州知州潘燾查出地四百四十餘

頃經臣等奏請

恩獎賞加道銜並請

旨飭令

直隸總督盛京將軍順天奉天各府尹飭屬一律辦理又
將查辦文卷奏交戶部照章接辦在案自同治元年六月
通飭遵辦以來迄今已逾兩載惟寶坻縣報升科地十一
頃六十餘畝其房山縣報首地一百二十二頃有零香河
縣報首地一百一十四頃有零均未據造冊送部經臣部

催令造送以便給照升科此外首報並無一案豈果各處竟無黑地特以利之所在弊隨以生有不能不詳細指陳者各處旗圈迷失地畝冊檔案卷牽扯混淆自非細心剔釐不能剖白其山隅河閃所開荒地多係畸零偏僻呈報以後又非親飭查勘不能清丈各州縣畏難苟安其弊一也私墾地畝遲報一年卽隱糧一年愚民何知自必觀望以私其利地方吏役知某戶有私墾之地某地爲墾熟之田勢必以查辦爲名私向墾戶訛索墾戶亦遂畏懼納賄以致扶同欺隱地方官或失於覺察或雖已覺察而不肯究辦其弊二也近更風聞有一種無賴游棍在京外各處

假充委員查辦黑地公然設局用戮橫行鄉里隨有就地游民幫同指引恐嚇得賍分用地方官以臣部前曾委員出京不敢盤詰及事後稔知其假又或以滋事爲戒並應查之地亦不敢查其弊三也兼此三弊黑地雖多升科無日臣等悉心商酌假充委員之弊請嚴定章程以杜絕其源查自通飭遵辦之後臣部以事已責成有司從無委員出京之舉即使將來必須委員查辦亦必先期咨明總督將軍各府尹一面札付該委員以憑前往應請通行直隸盛京順天奉天等處嗣後遇有查辦黑地之委員准着地方官詳細盤查如無臣部先期咨會及隨身札付卽屬棍

徒詐冒立即按名嚴拏押解至省由總督將軍府尹等奏
交盡法懲辦庶幾弊絕風清無所隱匿至州縣畏難苟安
之弊請申明賞罰以激勵之凡查出隱地二十頃以上者
照例給予優議其勘辦升科地畝最多之州縣卽援照昌
平州潘蔚成案隨時奏請 恩施查定例入官旗地州
縣於奉文日起限千畝以上限三個月百畝以上限兩個
月不及百畝限一個月查勘取租儻有逾限請照公事稽
遲例從重議處其明知地戶私墾吏役詐贓不卽查辦別
經發覺者從嚴參究經此次諄飭之後地方官仍復因循
不辦請卽以溺職參處庶幾懲勸並行各州縣咸知振作

不致日久弊滋現直冬令田閑野曠之時亟宜乘時查辦以裕國課相應請 旨飭下直隸總督盛京將軍順天奉天各府尹通飭所屬州縣遵照臣部奏定章程嚴絕游棍假充之弊信賞必罰以隨其後庶地方官認真查辦黑地升科日有起色矣臣部爲興利必先除弊起見是否有當伏乞 皇上聖鑒謹奏

100

請查辦虧短各稅疏

御史 朱澄瀾

竊惟數年來收復地方迭經欽奉

恩綸蠲征薄賦寬

免攤賠各款變通軍需報銷舊章務期弊絕風清事歸實
際于 渥沛恩膏之會仍寓慎重帑藏之恩仰見

聖天子仁至義盡欽佩難名近聞被擾省分虧短正雜等
稅經外省奏請減成賠繳或暫緩開征者每奉部議核准
施行在案惟邇來四方多事商賈歇業其有稅額毫無而
尙未奏明者恐亦不少臣愚謂此等虧短緣由其今昔形
勢固宜詳查而經手各員才幹有優劣心術有公私尤應
嚴辨或未請減緩而地方早已蹂躪則征額斷難照常也

或既請減緩而地方旋就肅清則征額仍宜足數也或頻年雜掘其拖欠實非無因則短絀應另議俾免向隅也或藉事侵吞及權收實有未善則短絀應罰賠且當究治也如果戎馬頻來舟車絕跡市廛關閉傭販遁逃致稅務虧空累萬盈千雖有幹員亦難畫策爲大吏者方深憂餉需支絀庫項空虛外盼協濟而徒勞內懼兵民之立潰於是悉索賦稅急救燃眉明知課額艱難何暇爲屬員率請寬減者第當干戈事竣虧稅愈多若竟概令賠償恐操持廉潔者必已資財蕩盡無力措交卽勒限嚴催亦不過以查抄監追照例敷衍塞責仍于國帑裨益無多轉不足爲

良吏勸此誠督催之未便概嚴者也他若現已克復地方諸物多時壅滯今忽商民雲集暢行暢銷稅課盈餘利或數倍雖不必再加稅額亦必令照數完交不得以請減請緩業已奏明在先仍令永遠欠課其或幸地方多事而昧良樂禍乾沒稅銀設法開銷任情攫取更或因稅務已壞而詭稱彌補益肆侵那掩耳盜鈴悉盈私橐種種弊竇尤宜防範加嚴又有秉性糊塗縱令幕友家人等朋比爲奸致屬官課亦屬溺職悞公並應分別嚴懲俱不准藉口時艱率請寬減庶足以儆貪墨而裕度支此尤督催之務宜從嚴者也以上各情似均應責成各督撫等將孰應豁

免孰應追賠孰應叅治各員無論從前會否奏明均仍詳查前後形勢嚴辨事爲之優劣公私隨時分案酌辦據實具奏再交部核議施行方能處理公平而帑藏亦不致有名無實該督撫等受 恩深重自必能各顧考成悉心籌畫尤當破除情面力戒黷項用以上體 宸慈下清稅弊臣管窺蠡測深虞無補要需可否請 旨飭下部臣統籌中外稅務情形將是否可行之處或綜核名實另籌平允章程一併妥議具奏臣愚昧之見伏乞 皇

太后 皇上訓示遵行謹奏

維持根本疏

御史杜瑞聯

竊維政貴有恒尤貴有要 朝廷一日萬幾何在不關要
務輕重緩急之間自有次第蓋固本之計先民食而後軍
儲安民之經由根本以及枝葉變通補救之方不可不急
講也臣謹就管見所及分爲三條爲我 皇上敬陳之
一八旗生計宜急設法接濟也京師者天下之根本八旗
又京師之根本我 朝以武功定天下八旗兵丁拱衛

皇極誠至計也然必厚恤其身家始可重用其筋力自
軍興以來所放糧米迭經裁扣當十大錢復不及制錢三
文之用以致啼饑號寒日益困乏間或流爲匪類尙望其

勤操演備禦侮平查同治元年順天府尹蔣琦齡奏
請恤旗僕一條意在屯墾閑田並寬出外之禁任其自爲
謀生曾經奉 旨交議然至今辦理尙未得有端緒臣

愚謂時處艱難宜爲暫濟目前之計可否 飭下戶部

通盤籌算無論何項銀欸苟有可以節省者或爲那移抽
撥卽如現今李世忠散勇交卡兩淮鹽課所收每月必多
數萬或卽專提解京添補八旗兵餉俟錢滿定額再行照
舊支放則溫飽有資而精壯可用雖外患亦可潛消矣

一漕徵本色宜急設法改復也根本之計漕糧最爲大宗
軍興以來紛紛改折以致京通各倉大半空虛似此情形

何堪持久應請 飭下有漕督撫將各省應征本色酌

量改復舊規卽不能尅期足額然每省但得十數萬石或數萬石積少成多陸續接濟每歲所入先儘八旗兵米支放是則無銀有米亦可資飽煖而練技藝或曰漕征折色以濟餉也今若改征本色兵餉豈不更匱臣愚以爲均則無貧此理可以確信現在軍營之冒領糧臺之冒銷歲不知幾何矣誠使各路統兵大臣暨各省督撫嚴杜冒濫力圖樽節且不遽令全行解京第于各營應得漕銀中劃出數萬石本色之糧以爲保衛根本之計旣無礙于兵餉而大有益於八旗各大臣公忌體國當必有所以兼濟之策

也

一錢局鼓鑄宜設法加增也今日銀米俱短但得錢鑄如額亦可補銀米之不足乃近來錢局所鑄甚屬有限曰無銅也無銀買銅也臣謂銅本自有專款特因司農支絀爲別款所那用遂致正款無著耳應請飭下戶部劃出銅本一款其欠在各省者酌量情形分別催提其已解部庫者另款存放以便隨時採買銅斤增益鼓鑄卽不能十分足額然儘其所鑄添放八旗兵餉當亦不無小補或曰需用之項甚多豈能顧此失彼然兩利相權取其重兩害相權取其輕以今日內外情形皆苦錢缺是雖抽提別項

以資鼓鑄以資經費猶將勉強爲之况銅本係錢局正款
乎至于採買之弊在乎勒索鼓鑄之弊在乎盜竊久爲錢
法之蠹則專司採買鼓鑄之員尤須慎選廉能勿循保送
部員之常例則可得其人以剔其弊也 以上三條總歸
一事其收效不爭旦夕其定計難緩須臾伏乞 飭下
部臣詳確議奏妥定章程持之以久行之以漸則于本計
庶不無裨益矣抑臣更有請者治國之道養與教並重伏
見八旗舊設官學教習半屬虛應故事應請 旨飭下
六部九卿詳議所以整理之方自古學術正而後有人心
心術正而後有人才則衣食旣足力崇教化尤本務中之

最要者也臣愚昧之見是否有當伏乞

皇太后

皇上聖鑒謹奏

請籌費賑濟疏

四品京堂

彭祖賢

竊本年春夏久旱順天直隸所屬境內麥收未熟赤地千里糧價昂貴迄今節候已交夏至得雨仍未霑足秋稼雖經播種而微雨含滋卽繼以旱風烈日竟無萌蘖之生災荒甚重民食維艱近聞黃河以南捻匪肆擾與大名僅一水之隔竊恐畿輔饑民十百爲羣以均糧爲名藉端攘奪漸至聚眾滋事若不急籌賑恤則老弱轉乎溝壑壯者卽流爲盜賊雖乘荒搶刦律有明條但嚴定其刦奪之罪而不予以存活之路恐挺而走險誅不勝誅惟有發賑安民足以潛消勾結預杜亂萌竊思荒政之要所謂極貧賑濟

次貧糶賑稍貧之民宜賑貸者一切大綱細目有張伯行救荒事宜及魏禧救荒策等篇成法具在均極周詳變通而增損之則在辦理得人耳所難者急須先籌經費然後可以舉行計順天直隸二百四十餘州縣被災太廣籌款維艱非預備銀數十萬兩不足以資給賑且饑民宜散不宜聚應令被災各州縣各賑其本屬之民不致流離他往方爲善策若專在京城放賑恐遠方饑民聞風而來轉多窒礙謹陳管見三事伏乞

聖明採納焉

一捐輸宜推廣也從前捐賑只在援照樂善好施之例議敘虛銜恐不足以廣招徠現在順天直隸籌賑方殷必須

在予優獎用昭激勸除大吏捐廉倡率不敢仰邀議敘外
紳民商賈均請查照山東捐賑章程銀穀並納聽民自便
凡貢監虛銜封典實職班次並分發指省概在收捐並請
旨飭下戶部奏明條款期於京師銅捐天津礮捐兩
無妨礙頒發空白執照由省城派員設局廣爲勸導並分
別各州縣等第酌量發給執照於各城鄉市鎮一律勸捐
隨時請獎

一外省宜協濟也救災恤隣古人有告糴之義竊查道光
二十九年東南七省被水會發帑銀百萬兩賑濟江浙各
省之民天下一家 聖恩廣被今畿內亢旱日久輦轂

之下萬口嗷嗷當部庫支絀之時不
湖北安徽本年同屬旱荒毋庸協賑
曷時若查江蘇釐金除江北淮揚等
鎮四屬牙釐捐局上海松滬捐局兩
十餘萬兩浙江釐捐以湖州之絲捐
之時捐務必起色雖現在捻踪屢
爲天下根本歲歉民饑尤關係要廑
撫於江蘇釐捐項下提銀二十萬兩
銀十萬兩趕速解京以資撥給想該
溺同憂必能不分畛域妥速籌辦以

一經費宜借動也救災賑饑急於星火古人矯詔發倉良以遲緩須臾卽民不堪命方今畿疆望賑已急若待江浙協賑之銀解到順天直隸捐輸收齊再議放賑恐已塗有餓殍不及早瘡 恩澤若由直隸藩庫籌欸墊辦又因曹州捻氛已熾省南防務亦緊餉需孔急庫藏已空更無閑欸可挪擬請 旨飭下戶部在捐銅局收捐項下先行借動銀二十萬兩天津礮捐項下借動銀數萬兩由順天府尹直隸總督酌量州縣多寡分定成數陸續支領以應急需仍俟江浙解到協賑及本省積有捐輸銀兩隨時奏明歸欸如此轉移則部帑可期有著而貧民可免流亡

以上三事臣以畿疆荒政重大籌款維艱特於無可籌畫之中勉爲設法以應急需而安民心惟各州縣辦賑情形尤以得人爲難應如何妥議章程慎簡賢員不假胥吏之手預杜中飽之弊請 旨飭下順天府尹直隸總督頒發定章通飭各屬嚴絕尅扣侵漁等弊並酌派廉幹紳士委員或會同商辦或密爲查訪如有辦理不善致滋弊端者一經查出立予叅撤其有始終勤慎潔已奉公實惠及民者准其事竣酌予獎勵以昭激勸臣愚昧之見是否有當伏乞 皇上聖鑒謹奏

直隸辦賑疏

侍郎通商大臣 崇 厚

竊查本年入春以來直省一帶雨澤稀少麥秋甚爲歉薄
節交夏令迄今未得甘霖水田難以播種糧價逐日騰貴
民不聊生時已入伏立秋在邇旱荒之象已成况目下捻
逆近在山東鹽梟擾於本境饑民遍野各州縣抗糧之案
已層見叠出民情甚爲浮動轉瞬秋成無望若不設法補
救實有不堪設想者臣現准戶部來咨以亟宜多籌儲蓄
議辦米捐令卽查明天津米商是否輻輳如米石騰集開
捐可收實效卽參酌成案酌擬章程奏明辦理等因奏奉
諭旨依議欽此查南省稻米並無商賈販津售賣只

有奉省由海船進口內以小米高糧爲大宗無如通省所食均資於此隨到隨賣並未見有囤積是以日行騰貴誠如部臣所慮恐因捐輸而糧價愈貴轉於荒政無益若專收粳秈不收稞糧以期招徠商米則須將米價作大以銀錢統算方可踴躍實恐於銅局章程有礙此米捐未可辦理之實在情形也臣伏查鄉民專以稞糧等項爲食多集粳秈僅可作京城之儲蓄於民食所補者有限方今之急通省農民乏食爲重必先有以全其命而後可以安其心且旱荒非水荒災荒可比雖 聖恩優渥發帑截漕籌辦賑務必期普被均霑然被災州縣待賑者不下十之六

七卽倉庫充裕之時勢難普遍况現在庫款未充卽竭力
籌維所救者不過十之二三臣目覩情形莫名焦灼日夜
籌思於辦賑之外尙有數事可以救荒與賑務可相輔而
行敬爲我 皇上陳之

一曰平糶減價蓋放賑則庫藏之力有限平糶則轉輸之
力無窮卽如附近之奉省去歲大熟本年雨澤霑足禾稼
茂盛糧價甚賤而商販來津者均因由海運涉險而來相
率居奇若能設法籌款由海路運奉省襍糧源源而來層
遞減價售買則市價不能不隨之遞減糧價漸平民心卽
可稍安惟本年内河水淺船隻不通內地販運海糧均用

車運現在糧價騰貴職此之由應如何逐漸轉運使一律
皆平須妥議章程辦理

一曰分糧勸賑直隸地土雖非沃壤然甫遇旱荒富民尙
有蓋藏因野無青苗存糧之家均存避荒之念不肯出糶
專恃外來之糧販運糧愈少而價愈增貧民愈無生計必
致聚眾搶掠則同歸於盡若由地方州縣各就本境查明
存糧之家剴切勸諭令其量所藏之數分出若干或給予
獎敘或官爲借貸俟收成時歸還卽以一州縣富戶之糧
分賑一州縣之貧戶則其力惟均惟勸賑獎勵向不甚優
現在必須定明優獎章程隨時奏請 恩施不可稍事

延攔

一曰採買儲備本省荒歉糧缺若官爲採買即使庫款可籌而糧價必致愈形騰貴誠爲有損無益仍須設法採運南省稷秬等米方爲有益若由部指定款項由江浙兩省督撫妥爲採辦由海路運津轉運京倉計本年封河以前尙可趕到冬令需用之時亦可救急

一曰以工代賑查直隸各州縣城垣半多殘缺河道亦多淤塞因庫款支絀久未請帑興修本地勸捐又以城工獎敘未優率多觀望當此救荒急務莫若就本境應辦各工程或修築城垣或疏挖河道責成該地方官勸諭紳商富

戶竭力捐輸將應辦工程次第舉辦庶使各境災黎強壯者皆得趁僱度日工程愈大活人愈多而城垣完固則保障可資河道疏通則轉輸有利誠爲一舉兩得之計惟此次勸捐工程係屬以工代賑非尋常捐輸可比所有各捐生獎敘限定日期核准工程免其造冊報銷

一曰施粥濟貧各府城如保定河間天津通州凡係商賈聚會之處多有逃荒饑民老弱攜男負女前往乞食目下已經如此秋冬之際逃荒者更多若不設法以處之儻有奸匪溷跡其中是亂萌卽伏於此應由各該地方官設法勸捐多設粥廠每日散放使流民不致失所並可稽查奸

細然必須各處一律舉行若僅止一二處辦理則貧民必
屬聚就倉經費不資轉致滋事以上各條於救荒均有裨
益辦理得宜實可消未萌之患當此時勢各地方應仰體
皇仁實力講求不可假手胥吏稍有弊竇分別輕重
設法稽查慎選委員一切詳細章程應請 欽派熟悉
情形之大員會同戶部悉心妥議以期行之無弊實惠及
民臣再四思維查有太常寺卿石贊清正直樸誠關心民
瘼在直隸服官年久洞悉情形民情愛戴籌辦一切爲能
事事合宜不爲衆說播動庶救荒大政可獨任其難臣目
擊時艱敬舉所知伏候 聖明裁酌所有接到部文米

捐難以籌辦並辦救荒敬陳管見各緣由謹恭摺具奏

三六

請 飭招商販運疏

太僕寺少卿 彭祖賢

竊本年直隸亢旱成災幸秋初得雨轉荒爲歉而補種雜糧未爲豐稔民間米價日昂每石須銀四兩以外臣聞江蘇新穀登場市價每石不過一兩左右委因兵燹之餘戶口較少民情拮据艱於蓋藏小民終歲勤種而收穫之後糶價值錢無幾是東南穀賤傷農而畿輔重地米價昂貴似應亟籌調劑之方以裕民食伏查本年七月間右贊善徐申錫條陳積穀奉 旨飭令江浙督撫籌款採買米石由海運津一切經費准其作正開銷仰見 皇上軫念窮黎無微不至臣竊思 國家經費有常發帑採買恐

難源源接濟該督撫等於軍餉之外能否另行籌款亦尙無把握因思商人權子母之利利之所在無不爭趨現在南北糧價相去不啻四倍洋人火輪夾板等船已有販運之津者天津米價稍平而中國商船未間接踵而來只以向來禁出洋內地商船不敢私運沿海地方官亦未經剴切曉諭可否請 旨飭下兩江總督江蘇巡撫轉飭蘇


松太道督飭沿海州縣出示招商凡沙船衛船及甯波閩廣商船均准其在上海等處運米出口前赴天津售賣隨時給予護照所過關卡免其納稅捐釐到津之後聽其轉運京城各處自行銷售並嚴禁胥役刁難勒索如此則南

糧無壅滯之患畿輔亦無艱食之虞如蒙 俞允並請

明降諭旨飭下該督撫等欽遵辦理毋得視爲具文

臣愚昧之見是否有當伏乞 皇太后 皇上聖

鑒謹奏



擬籌捐義塾粥廠經費疏

侍郎通商大臣 崇厚

竊維教化乃士習之本賑濟爲勸善之源京師人煙稠密爲首善之區學校之外有力官紳向有捐設義塾以教無力讀書旗民子弟又於冬間捐設粥廠拯救饑民以補官設飯廠之不足均係樂善之家董司其事捐資辦理洵善舉也正陽門內舊有願學堂義塾原係杜姓創建延請塾師教旗民子弟百數十人授以滿漢文經書分齋課讀後因捐募經費不敷遂致廢弛本年春間經大學士倭仁戶部尙書羅惇衍等倡議捐資復設以繼善舉惟需費較多捐數不敷暫設四齋尙未能復舊設程規又正陽門外朝

陽閣僧廟暨崇文門外玉清觀道廟各有施粥廠一處亦
係辦理多年需費時形短絀臣於上年會捐廉助辦並於
東海關監督山海關監督長蘆運使天津道等衙門勸捐
共捐銀七百餘兩作爲施粥之費竊念京城旗民生計維
艱人口不免於饑寒子弟更遑云教誨我 皇太后

皇上矜念民瘼教養人材如饑如渴凡在臣下體

宵旰之憂勤廣 皇仁之博濟自當勉求裨益仰副

宸懷所有義塾粥廠同爲實惠濟民之舉亟應妥爲
經理查義學一處粥廠兩處統計每年經費需銀二千數
百兩其修整房屋另行勸辦除臣衙門並東海關等處接

年認捐共有七八百兩仍於現需經費所短尙多因思若於南洋各海關等處勸其量力捐資以稅課之多寡酌定捐資之數目約可集三四千兩之數不特願學堂義塾與朝陽閣玉清觀兩粥廠均可按年舉辦如有盈餘尙可於東城朝陽門西城德勝門外各添設粥廠一處更可惠濟窮黎推行我國家保惠黎元之至意擬請飭下大學士倭仁尙書羅惇衍會同總理各國事務衙門妥議辦理臣爲推廣皇仁實惠濟民起見是否有當伏乞

皇太后

皇上聖鑒訓示謹奏



111

請變通奉天運糧章程疏

給事中 陳鴻翔

竊惟舊章莫患乎紛更而積弊必期於裁革易曰窮則變變則通通則久自古及今治法胥準乎此也現在直隸督臣奏請變通奉天米豆運津章程已經 飭部議覆矣

臣於上年七月曾將奉天辦運遲延各情詳細瀆陳請將補運粟米及本年正運之米趕緊並運以濟賑需迨至冬間兩運米石仍未能備齊交兌該省將軍府尹並有寬免各州縣處分之請是其疲玩情形亦可概見臣伏思牛莊正運米石歷經遵辦似未可遽議更張若錦寧廣義初運次運似可變通辦理以除積弊查此項米豆本係年前征

收次年起運當小民交納之時該州僅止兌收本色百餘石其餘概收折色且一石之米須交兩石之價方能完納此收米之弊也征收之後該州縣並不及時買米存倉迨次年起運屆期現買價賤之米頂補貽累商船此備米之弊也商船赴奉天起運四月卽須出口十月始得駛回守候日久糜費難堪該州縣每藉口於船未到齊不行開兌甚至河凍空回次年再行補運此兌米之弊也至由津運通官吏之驗收挑撥駁船之偷漏攙和勢難禁絕此交米之弊也到倉之後糠粃相雜霉變居多終至不堪食用卽使按成搭放究屬有名無實此放米之弊也上年五城各

廠賑米屢請更換是其明徵以有用之銀錢易無用之米
豆良可惜矣臣愚以爲欲除其弊莫若卽令奉天錦甯廣
義各州縣改交折色較爲簡便或云官價有限若改折色
爲數無幾然若令其按時價折扣官民似亦兩便再以所
得折價就近在通州採買交倉又省許多周轉卽有弊端
亦尙易防所有海程及外河內河各水腳以及奉省各州
縣運費並押運各委員薪水等項省費甚多亦可貼補改
折之不足也且南省漕糧改辦折色者甚多卽山東上年
漕米亦改折色是改折亦變通盡利之一道可否 飭
下戶部將奉天錦甯廣義四州縣之米豆改收折色與直

隸督臣所請一併核議儻能杜絕弊端永遠遵行則米豆
庶可歸實用矣臣愚昧之見是否有當伏乞

皇太

后

皇上聖鑒謹奏

請飭禁崇文門稅務需索疏

內閣侍讀學士

鍾佩賢

竊維征收稅課向有定則本不隄例外苛求伏讀道光二年
上諭御史許乃濟奏請嚴禁崇文門稅局需索
蠹弊一摺所奏甚是崇文門稅局於尋常行李往來不論
有無貨物每衣箱一隻勒索銀二兩四錢至八兩之多或
偶然攜帶常用物件不知應稅科則一經查出輒以二十
倍議罰卽有照例開報納稅者又以輸課無多仍百計刁
難否則押赴官店守候不隄放行京師爲萬方輻輳之區
乃經書役任意婪索苛及行旅若此不可不嚴申禁令着
該監督遵照定例於崇文門及分口巡查之蘆溝橋東壩

板橋海淀等處一律添設木榜仍著順天府刊刷科則定例每年頒發俾眾咸知並責成巡視五城御史隨時前往認真稽查如有濫行需索擾及行旅情事卽據實叅奏不得日久視爲具文務期革除積弊以懲關蠹而便商旅欽此

聖訓煌煌允宜永遠遵守臣聞近數年來崇文門於應征稅課之外遇有送務車輛雖無貨物亦必索銀若外任及出差回京官員不論有無稅貨亦不論行李多寡輒量其缺分差使之肥瘠勒令交銀若干名曰報效卽候補候選之微員進京亦皆不免夫稅局之設有貨則納稅無貨則放行遵例納稅何得謂之報效報效云者蓋本

無應納之稅而強令輸銀之謂也在官員果有餘資報效亦固其分但崇文門並非捐局納稅並非捐輸報效二字已非稅局所宜言然尙未聞擾及會試公車也近日竟有會試士子進京除隨身行李外別無一物並無衣箱到務後再三懇求查驗堅不允從仍每人勒索銀十餘兩及四五兩不等方准放行稍不遂意卽置之官店更可異者甫抵城門而門上官役先勒取多金方許送務各該士子本多寒素跋涉數千里來京又當賊氛未靖時慮道梗或先期數月趕到候試或中途聞警繞道前進川資旅費已屬不易何堪復受此擾累且 國家掄才大典多士踴躍觀

光而若輩敢於 輦轂之下肆行婪索於政體大有關
繫臣訪聞既確不敢緘默應請 飭下崇文門監督申
明定例嚴飭官吏巡役人等凡遇送務車輛只有行李並
無貨物者立予查驗放行如敢留難勒索意需索查出
按律懲辦其各城門向無收稅之責訛詐銀兩情殊可惡
尤應一體嚴禁仍遵照道光二年 諭旨責成五城
御史認真稽查如有前項情弊隨時叅奏至稅局惟應按
則收稅嚴查偷漏報效名目亦宜革除以杜影射侵欺之
弊臣爲剔除關蠹起見是否有當伏乞 皇太后

皇上聖鑒謹奏

請裁撤權宜之政疏

左副都御史 全慶

竊自軍興以來餉需浩煩不能不借資民力故捐輸之外復行畝捐釐捐名目不一皆一時權宜之計也然商賈輻輳之區辦理釐捐未嘗無補至於僻處偏隅復設分局抽釐之數除去開銷所存無幾在民間已多窮困而釐局務盡錙銖萬一滋生事端所得不償所失求利反害其弊顯然四川省藍李二逆其始因抗釐聚眾滋擾彌年遂至蔓延數省是其明証蓋釐局之設或用紳董或用委員任事者固有其人中飽者尤復不少至吏胥訛索包攬更不待言我

皇上體恤民隱洞悉弊源於內外臣工奏參各省

釐局舞弊迭加 訓飭不啻三令五申而其弊未能盡

革者以軍務未竣得所藉口也今仰賴 天威金陵業

經克復兵勇可以陸續凱撤軍餉即可陸續節省鹽關可
以逐漸足額釐局即可逐漸減裁從前湖北江北釐務經

御史朱文江丁紹周先後條奏奉 旨交查迄未裁減

自爲籌濟軍餉起見今日軍務情形與去年迥異自宜分
別辦理臣聞江西廣東兩省抽收釐金接濟江南頗形掣
肘久在 聖明洞鑒之中又聞上年廣東有高州紳士

前往廉州府城勸捐抽釐因委員辦理不善致該紳被毀
幾釀人命莫得主名至今案懸未結其餘佛山石龍蘆包

等廠於咸豐九年曾經滋事所抽釐金逐年有減無增走漏侵吞弊端百出臣前在道光年間曾任廣東學政周歷各府察看情形查雷廉瓊三府素稱瘠土逼近海陬既非通衢又鮮殷戶卽開局抽釐所收有限而民風强悍滋事實屬可虞無益於軍需有害於大局殊非良策也竊思廣東一省如此他省諒可概見擬請飭下戶部通盤籌畫將各省報設釐局詳查酌核實係通都大邑商賈輻輳之區如直隸之天津山東之煙臺江南之上海湖北之漢口江西之河口九江福建之廈門浙江之甯波等處歲入可得鉅萬者酌留若干處權准照舊抽收以爲辦理善後

之用俟善後辦竣再行酌量情形陸續裁汰至其餘各省
僻壤偏隅分設釐局如廣東雷廉瓊等處之素稱瘠土者
無論會否奏咨有案併請概令裁撤嗣後不准再行添設
如有私立釐局者重治其罪可否明降 諭旨嚴飭中
外務以愛民休養爲先不得條陳言利以恤閭閻而固根
本庶幾上格天心下孚民望而餘氛不難迅掃矣臣愚昧
之見是否有當伏乞 皇太后 皇上聖鑒訓示

謹奏

請裁戶捐鋪捐片

給事中 王憲成

再軍興以來需餉浩煩設立各項捐輸名目其取之民者若釐捐若戶捐若鋪捐幾於竭澤而漁今江省肅清而瘡痍滿目子遺之民尙未復業要在去其疾苦而予以生機故近日廷臣有裁撤各省分設釐局之奏夫釐局分設卡座星羅棋布害及行旅害不及居者也若戶捐則計畝捐錢鋪捐則挨鋪捐錢委員旁午期限促迫無不受其害者在軍務吃緊之時勢非得已且地方未遭兵燹民力尙可勉強支持若經賊竄擾之後農田多半荒蕪牛種均須措辦而猶計畝捐錢析及錙銖窮民其何以堪是戶捐不可

不裁也至于蕩析離居之眾甫歸田里屋宇草創開設鋪面生意甚微如仍挨鋪捐錢多方剝削諸物益加昂貴民間度日更覺艱難是鋪捐不可不裁也蓋戶捐鋪捐之當裁更急於釐捐矣可否 飭下部臣核議以蘇民困伏候 聖裁臣愚昧之見是否有當謹附片具奏

奏荒產宜設法杜弊疏

御史朱澄瀾

伏讀同治二年十一月欽奉

上諭著各該督撫於新

復各處督飭各該州縣確切查明實在逆產入官其荒廢地畝有原業主者卽行給領尙未查得業主者卽著暫行造冊登記俟業主續歸再行給還等因欽此仰見我

皇上軫念窮黎無微不至跪誦之下淪浹難名查無主荒田原應暫爲官地俟業主續歸時領還亦必辦理得宜方能無弊現飭各督撫妥議章程自能悉心籌畫茲就管見謹擬防弊四條爲我 皇上敬陳之

一呈報宜寬予歲時也各省道途梗塞文報遲延若期限

過嚴恐各業主或流落遠方未能趕到或逗留僻壤不易
卽知必有因逾期而勢難給領者且恐長留難訛詐之風
欲除此弊似不必預定日期凡業主續歸領田者俱俟到
籍後限半年內具呈報官卽令里鄰親族或佃戶及從前
取租人各取切實保結並聲明呈報有無遲悞緣由再由
該管官妥速催勘申詳將田批給各業主存案不准藉端
滋擾以恤流離

一認領難盡憑冊契也外省田畝較多之業主半係祖產
留貽或且窮鄉窳遠更多有托人照管者故地段四址田
主每未能盡知所恃者惟糧戶冊及買田紅契耳地方遭

兵後糧冊田契類已遺亡尤恐有同姓者竊獲頂名捏造者奪真攬利欲除此弊仍不必盡憑冊契惟各取切實保結並聲明現在有無冊契緣由再由該管官確查後卽行另立冊給契以絕紛爭

一逆產與非逆產當嚴辨也逆產例應入官特恐貧劣各員幸民田入官爲易於分肥計將賊所強據賊所取租及與賊稍有毘連交涉或毫無瓜葛各荒田訛斷入官田主不敢自明必多失業欲除此弊惟於逆產入官時亦各取切實保結聲明實無誣逆情弊再由該管官確訪得實方准永遠入官庶荒田不敢概行籍沒矣

一田主與僞田主必密查也荒田尙無業主恐有詭充業主者租戶之侵吞土豪之兼并均可虞也官或悞信於前勢必飾非於後原主續歸曰其懦弱者畏見官司每致鳩據鵲巢莫由分辨欲除此弊凡業主領田時俱令取切實保結卽當時已有原業主者亦必合聲明實無私占與假冒情弊再由該管官確驗給收如有占冒者從重治罪庶荒田不致互相竊取矣 以上四條除嚴禁吏胥人等毋庸干預擾民外均責成里鄰親族及各人証切實作保再嚴飭地方官秉公認真查辦儻劣員或奸徒有徇隱侵漁把持婪索者卽飭該管上司官查拿懲辦以儆其餘並先

通行示諭軍民人等知悉俾不敢營私霸產預弭刁風臣
愚昧之見可否請 旨飭下各督撫歸入現議章程一
併妥議具奏伏乞 皇太后 皇上聖鑒訓示遵
行謹奏

121

請免軍需造冊報銷疏

大學士管理戶部

倭仁

竊惟軍需支用欸目冗煩鹽糧米折事隸戶部弁兵員名製造丈尺事隸兵工兩部開支多寡各有定章此軍需報銷必以則例爲斷也而其間制變因時亦有未能悉遵之處破格懸賞支放旣難緩須與循例開銷造冊則皆非實在是名以則例爲斷而未必皆支用之實也自洪逆倡亂以來蔓延十數省滋擾十餘年捻教回苗乘機迭起生民塗炭宵旰憂勞仰賴皇太后皇上至誠感神天心厭亂巨逆就殄東南漸次蕩平西北可期待定惟肅清之日從此始而報銷之事從此煩歷年以來各省

軍需承辦既非一人轉戰動經數省且則例所載征調但指兵丁而此次成功多資勇力兵與勇本不相同例與案遂相歧出在臣部引例核案往返駁查不過求其造報如例而止要不能於已支之帑項再求節省而各處書吏藉此需索真屬防不勝防糧臺委員藉以招搖甚至費外加費費無所出則浮銷苛斂之弊興浮銷云何勸捐歸補所由影射也苛斂云何私設釐卡所由取給也 聖人在上方將登斯民於衽席忍令於大功告成之後復留此病國病民之政而不除乎此軍需報銷一事所急宜變計者也顧或者謂需索招搖等弊宜思所以懲之至報銷章程

遵行已久何可因噎廢食不知此次軍需歷時太久各省財力俱竭兵勇饑苦情形屢見章奏則軍營之已無餘裕可知於此而嚴飭報銷其造冊按例定之數不溢一絲而陰將款目浮開鉅萬者與例既符即在准銷之列其以實用之數登之銷冊而並無絲毫浮冒者例稍未符即難核准應駁之款或數十萬或數百萬甚且著落賠償勞臣戰將酬庸於前而追呼於後無論力有未逮恐亦非國家厚待勲舊之心然則報銷一事即能弊絕風清而實數不准銷准銷非實數虛文相襲甚無謂也臣等公同商酌所有同治三年六月以前各處辦理軍需未經報銷各案擬懇

天恩准將收支款目總數分年分起開具簡明清單
奏明存案免其造冊報銷如蒙 俞允應由臣部知照

兵工兩部各衙門一體欽遵辦理並請 飭下各路統

兵大臣各直省督撫永禁勸捐歸補名目並將私設釐卡
實力查叅裁撤以期案牘無作偽之情中外無虛糜之費
而書吏之舞弊地方之騷擾皆可不禁自除至東南剿辦
餘匪及西北辦理回務自本年七月起一應軍需凡有例
可循者務當遵例支給其例所不及或製備採買有應隨
時隨地酌量變通之處先行分別奏咨備案事竣之日各
歸各起一體造冊報銷不得以此次 特恩妄生希冀

以杜浮冒而符舊章臣等愚昧之見是否有當伏乞
皇太后 皇上聖鑒訓示遵行謹密封陳奏請

旨

280

100



請戶部慎選司員疏

御史 許廷桂

竊自軍興以來各省督撫因餉需不給變更成例知畝捐
津貼釐捐以及丁漕等款類皆違例徵收苛擾閭閻民不
堪命我 朝歷代薄徵平賦良法美意已蕩然無存矣現
值各省肅清肅州一隅聞已合圍不日卽當告捷自應與
民休息力拯窮黎臣維承平之日明罰勅法惟恐天下有
冤民責在刑部兵亂之後休養生息惟恐天下有窮民責
在戶部戶部行一令立一法核議一章程關繫億萬姓生
靈之休戚非若刑部之每案出入不過一二人已也故戶
部之責任尤重我 皇上親政以來勵精圖治旰食宵

衣禱雨祈晴刻刻以恤民爲念而各省虐民之稅政未盡
革除不可謂非 聖明之累相應請 旨勅下戶部
每司掄選諳練公事者數員將各省現行之畝捐津貼釐
捐及徵收丁漕違制者分別緩急輕重次第奏請豁免規
復舊制以蘇兵燹後災黎之困以仰體我 皇上法祖
愛民之至意天下幸甚至若軍需報銷關 庫款盈絀動
輒數千百萬亦宜認真稽核並請 飭下戶部慎選廉
謹之員總司其事凡有不遵定例捏造章程希圖冒濫者
卽逐款駁斥不准開銷如查有貪得部費將不應銷之款
朦混核銷者卽據實嚴叅以昭炯戒臣爲蘇民因而杜弊

端起見是否有當伏乞

聖鑒訓示謹奏

臣

謹

同治中興京外奏議目錄

卷四

籌議漕糧疏

倉場侍郎 宗室延照

請嚴禁漕糧浮收疏

御史 崔穆之

請聲明升科例限疏

太僕寺卿 彭祖賢

酌定錢漕科則疏

江蘇巡撫 丁日昌

核減總屬浮收錢糧疏

閩浙總督 左宗棠

請停東省畝捐疏

山東巡撫 閻敬銘

米運艱難疏

四川巡撫 劉蓉

陳明河運艱難疏

兩江總督 曾國藩

請整頓鹽法疏

御史

劉毓楠

收回淮南引地疏

兩江總督

曾國藩

整頓淮南鹽務疏

曾國藩

整理淮北票鹽疏

曾國藩

請北新關暫緩開設疏

閩浙總督

左宗棠

循舊放給卹賞等款疏

江西巡撫

沈葆楨

請飭禁抽收賭款疏

御史

鄧承修

籌議漕糧疏

倉場侍郎宗室延煦

竊照有漕各省歲輸糧米數百萬石上供京師爲官兵俸
餉所必需自南氛不靖徵運維艱俸餉減成者垂二十年
現在官員俸米開放五成已覺太少至於兵米僅放二成
焉能足食在軍興之時迫於時勢減成原非得已所冀東
南平靖漸復舊章今各省肅清將及十年而有漕省分惟
江蘇江安浙江三道屬徵運本色又以民氣未復不能足
額計歲輸不過百萬上下加以山東粟米二十餘萬石照
現章開放每歲所餘無幾不能輕議加增設遇各省偶有
蠲緩更恐有絀無盈如此年復一年兵丁困苦竟無可蘇

之日臣等職掌倉儲不敢安於緘默惟有請

旨飭下

現辦折漕之江西湖南湖北河南各省督撫體察地方情形悉心籌畫自今年冬漕爲始或酌徵本色或籌辦採買雖不能一時足額總須極力圖維多多益善儻得該四省奏集三四十萬石一律入倉則兵米便可議加於京師亦大有裨益其轉運之法或雇覓民船與江北同辦河運或用招商局輪船由江達海應由各省督撫函商直隸督臣奏明辦理至於江浙二省近辦漕糧均能極力籌增現在民氣漸復年穀順成復經戶部奏催督臣撫臣自必力求足額無庸臣等再行竇請除將海防省分例徵額數另繕

簡明清單恭呈
御覽外所有臣等籌議緣由理合恭
摺具奏伏乞
皇上聖鑒訓示施行

請嚴禁浮收漕糧疏

御史 崔穆之

竊惟國以民爲本民以食爲天民情之安危與國家之休戚相關我朝二百餘年深仁厚澤雖在艱阨之秋不聞有加賦之舉所以維邦本而固民心者深且長也州縣爲親民之吏當此四方多故宜如何激發天良勤恤民瘼以防患於未然者乃徃徃蒞任以後不問民情之安危先計錢糧之多寡藉公飽私侵吞無數卽如山東一省有漕州縣遵照定章者絕少徵米之數按官斗之外每斗輒浮收數升並立有樣盤名目藉口看認米色又縱容蠹役格外剝去若干民間視以爲苦只得聽其折價完納比按斗折

錢則合市價計之其浮收之處仍與完米之增至數倍者無異時或經該管上司減成定價出示申禁發交各州縣該州縣並不張貼仍然照常徵收前巡撫閻敬銘曾暗差戈什哈等帶定告示赴各州縣僻遠鄉區親爲張貼聞州縣中亦間有遵照者其膽大肆行照常徵收者仍復不少東省如此想他省亦可類推總之入於正供者無多漁於貪官者無算以有限之脂膏充難盈之谿壑閭閻奚罪豈堪如此剝削伏思近來各處兵燹未靖起衅之由未嘗不在於此小民何知原不過僅爲目前身家計迨徵賦屢困凋敝日深已有疾首蹙頞之勢偶有狡獪之徒乘間肆意

阻撓漕務籠絡民心藉言立團禦賊有從之者交資充用而錢糧可抗而不納彼蚩蚩者亦遂樂爲其愚迨至黨羽日盛官不能制勢漸猖獗天下所以多匪抑思匪亦猶是民耳民之變而爲匪官實激之耳苟牧民者潔已奉公愛民如子漕糧按照定章取諸民者不害於民民豈無良孰甘於爲匪又孰忍於爲匪者浮收之弊貽禍可見相應請旨飭下各省督撫轉飭所屬州縣痛除積弊恪遵定章不得任意再行浮收如有怙過不悛卽由該督撫指名嚴叅按律懲辦庶民困蘇而亂萌可杜矣臣愚昧之見是否有當伏乞 皇上聖鑒謹奏

--	--	--	--	--	--	--	--	--	--

請聲明升科例限疏

太僕寺卿

彭祖賢

竊自東南肅清皖南之徽甯池太廣江南之蘇松常鎮太
浙江之杭嘉湖等屬荒地尙多現在安徽停止漕運皖南
州縣未盡開徵江浙雖辦海運而近年起運漕米額數不
及十分之七推原其故被兵以後向之膏腴盡成榛莽小
民流亡甫復耕牛農具一概無存墾田之欸大半出於借
貸其被兵較輕之區資本稍省開墾尙易無如各該省新
墾田地即使起徵間閭勤苦終年稱貸未償催科又迫愚
民無知以爲多所賠累不若聽其荒蕪於是瘠區廢壤用
力較難措資更絀者雖經招徠無人承種是急陞科之期

而新墾者有限罹陞科之累而不墾者無窮也臣查戶部則例內開各省報墾田地水田六年陞科旱田十年升科詳譯例意深知試種之艱難故展其陞科之期限况於兵燹之餘正宜優加體恤臣愚以爲江浙財賦所出固不宜任其久荒卽江淮之間凱撤遣勇亦必人盡歸農庶可各安其業計惟緩其陞科使之樂於開墾應令各督撫詳加體察督飭所屬剴切曉諭除業經陞科不計外嗣後有願認領荒地開墾者無論土著流寓悉照定例緩以期限水田試種六年以內旱田試種十年以內錢漕概不起徵儻州縣違例升科書役藉端需索一經查出卽由督撫嚴行

參究有此寬政農民無不踴躍從事將見草萊盡闢而正
供可漸期足額事關田賦應請 飭下戶部議奏臣愚
昧之見是否有當伏乞 皇太后 皇上聖鑒訓
示謹奏

--	--	--	--	--	--	--	--	--	--

酌定錢漕科則疏

江蘇
巡撫丁日昌

竊惟州縣爲親民之官必一言一動皆可使百姓共見共聞內外旣不隔閡膏澤方可宣布蘇省田地科則多至二百有奇業戶只知田畝多寡不知科則重輕每至征收地漕書差據爲利藪又花戶完納銀米所資於糶穀賣絲往往以所得之洋銀錢文零星繳柜書差陰持其柄洋銀可以短估銀價可以高抬而且正供之外尙可勒索串票腳費小民之脂膏有限書差之欲壑無窮種種弊端殊難枚舉臣去年在蘇藩司在內曾經通飭各廳州縣於易知由單之外刊刻簡明告示註明某都某圖科則幾等每銀一

兩折錢若干每米一石隨耗幾斗不准淋尖踢斛洋錢每
元時價若干其冊串紙張書役卒飯一併註明由官給發
不准絲毫需索如有於告示所不載之處浮勒分文准其
控告於開徵前數日將告示徧貼城鄉使愚夫愚婦一目
了然書差不能高下其手並飭將示式通報查考實足以
杜弊端而禁欺朦故上年收成雖未皆豐稔完數尙稱踴
躍本年上忙開征訪聞各廳縣張貼前項告示者固多而
匿示不貼者亦復不少皆因此項告示一經到處張貼則
書差無所施其浮勒之技是以從中沮撓州縣不免爲所
疑惑經臣督飭蘇藩司嚴飭各州縣遵照舉行並一面嚴

查如係一時疏忽先行記過儻若有心玩悞卽分別撤參
仍恐各州縣始勤終怠日久玩生合無仰懇 聖慈俯

念此項簡明告示係爲杜絕浮收起見准臣通飭蘇省各
廳州縣嗣後永爲定章庶窮鄉僻壤長戴 聖仁而猶

吏奸胥無從中飽矣是否有當謹會同大學士兩江總督
一等毅勇侯臣曾國藩恭摺具奏伏乞 聖鑒謹奏

A large rectangular table with 12 empty columns. A small triangular marker is located on the right side of the table, approximately halfway down. The table is enclosed in a thick black border.

核減紹屬浮收錢糧疏

閩浙總督 左宗棠

竊浙東各屬地丁南米經臣上年奏明應一律核減並將
温州府屬先行減定在案茲查浙東八府錢糧征數以紹
興爲最多浮收之弊亦以紹興爲尤甚山陰會稽蕭山諸
縣完納錢糧向有紳民戶之分每正耗一兩紳戶僅完一
兩六分至一兩三四錢而止民戶則有完至二千八九百
文或三四千文者以國家維正之供而有紳民重輕之別
以閭閻奉公之款徒爲吏胥中飽之資官司以賠墊爲苦
民戶以偏重爲苦若不明定章程刪除浮費弊累日甚其
何以堪孟子論治以經界不正井田不均穀祿不平爲深

憂者此也臣於上年核定溫屬地漕後卽飭奏調來浙差遣候選知府戶部郎中顧菊生前赴紹興會同該管道府將歷年官征民納實數及向來流攤各款逐細清查分別裁減茲據顧菊生等稟稱紹屬八縣六場正雜錢糧有照銀數完納有照錢數完納殊與定例有乖現擬統照銀數征解其一切攤捐名目及道府各屬陋規概行禁革並擬於正耗錢糧之外仍視各縣舊征多寡每兩酌留平餘以爲各該縣場辦公之用開送征解留用數目清冊前來臣細加覆核除正耗仍照常征解外紹屬八縣額征地漕等款並蕭山公租竈課銀五十四萬三千四百七十四兩零

除新昌一縣征數業經勒石毋庸議改外其餘七縣共實
減去錢二十萬五千一百零六千文南米額征本色米七
千餘石折色米一萬五千二百六十七石零減去本色耗
米三百六十一石減折色耗米錢一萬二千零七十二千
文六場竈課額征銀一萬四千三百八十九兩又蕭山牧
租額征錢一萬三千九百十六千文實減去錢四千二百
四十二千文計共減去錢二十二萬一千四百二十千文
米三百餘石但能永遠遵守大小戶一律完納以十年之
數通計之民間即可多留二百餘萬千之錢三千餘石米
矣既無須損上以益下民力自見其有餘亦無須哀多以

益寡貧戶不憂其不足官之征收有定章則上下之交肅
民之完納有定數則胥吏之弊除此次定章之後臣等飭
令各屬一體勒石遵守如有官吏陽奉陰違於定章之外
添設名目多取分文者定卽立予撤叅如大戶不遵定章
完納致官有賠墊之虞民有偏重之苦者亦必核實懲辦
以昭儆戒所有核減紹興府屬錢糧緣由理合恭摺具陳
伏乞 皇上聖鑒訓示再紹屬錢糧減定後戶部郎中
顧菊生已飭令前赴甯波一律查辦合併聲明謹奏

請停東省畝捐疏

山東巡撫 閻敬銘

竊查僧格林沁於咸豐十年冬間統軍赴東剿辦土捻各匪親歷各地方察看情勢知皖亳捻股闖入山東多由曹單一帶舊隄竄越彼時曹屬按團丁出力已有防隄之舉因隄路縣亘人數眾多自衛桑梓卽所以保衛地方不能不籌給口糧以期得力奏請於本省按畝捐資每畝制錢二十文爲防隄經費在案嗣於同治元年四月御史陳廷經奏請各省停止畝捐奉 旨允准又經僧格林沁會同前撫臣譚廷襄體查當時情形因防隄防河緊要需用浩煩卽概行停止俯請將曹州府七屬濟甯等四州縣充

州府八屬沂州府七屬分別辦理各等因奏蒙 恩允

並欽奉 上諭務使捐無苛派餉不虛糜以期事歸實

濟俟軍務稍平卽行奏請停止等因欽此仰見 聖慈

體察閭閻勤恤民隱之至意臣覆查曹單一帶迭年被擾
民間曠廢農業四出遷移是賴辦理防隄一二地方恃以
無恐當時因屢遭蹂躪蠲緩者十常八九正供已屬無多
而各圩派費辦團又皆斂諸田畝是與其捐由民辦不如
官辦畝捐尙可抑豪強而助經費原因軍務未戢一時權
宜之計僧格林沁仰仗 天威掃清羣醜皖亳各匪悉
就殲除東省地方庶可民守耕鑿竭力維正之供若仍攤

派畝捐不但民力未逮且征多征少難於稽察徒爲官與團中飽之私卽時價格林沁因大營需用草料飭令各屬分投協採有畝捐者准其動用畝捐現查各屬所辦畝捐草料銀錢解交糧臺數目未能盡見踴躍日久弊生實所難免今據藩司貢璜充沂曹濟道盧朝安會稟現在股匪削平畝捐一項無補軍需而難責民間兼完正賦擬請一律停止前來臣當據詳函商價格林沁均屬意見相同自應體察目前實在情形欽遵前奉諭旨自同治三年正月爲始將充沂曹濟四府州所屬畝捐概行停止以廣皇仁其應征地丁正項應卽責成實力催征民間裁

除捐項專納錢糧自不至再存觀望至僧格林沁移軍駐
皖所需軍餉臣惟有竭力圖籌源源協濟不致貽悞總期
事歸實濟上紓 聖懷謹將東省停止畝捐緣由理合
恭摺馳奏伏乞 皇太后 皇上聖鑒訓示謹奏

米運艱難片

劉蓉

再軍行必先籌糧人情急於謀食餉項偶乏已覺難於支
撐米粟不充必立見其譁潰故聖門論政足食在足兵之
先而去食在去兵之後臣自早歲從戎經歷數省勞辛艱
苦亦既備嘗而糧食之艱從未有如川北一路之甚者乃
知漢臣諸葛亮統兵北伐屢以糧盡引還地勢使然今古
一轍查川北城太通南昭廣江平各州縣荒山瘠土穀產
不饒本年秋潦歉收民已艱食通南一帶山高徑仄每夫
一名僅能負市斗米二斗由縣城達西河口等處防所遠
者六七百里近者亦四五百里巴州產米較多由巴至南

計水程三百餘里河狹灘高每船一隻裝米不過二三十石時須盤灘起載且係逆流挽運約十餘日始能趕到廣元一帶河道行船較大山路稍寬而武字定武長勝各軍駐防經年不獨廣元搜買一空卽附近昭劍等處亦已無可採辦勢須由重慶順慶保寧各屬收買計水程遠者千四五百里近者千里七八百里不等自朝天關達甯羗州陸程尙百八十里沿途添設短站節節轉運統計每米一石運腳至十餘兩之多米價應由勇丁月餉扣還而運費則苦於無著臣前在川藩任內詳請督臣駱秉章委員於南通各縣採運厥後屢辦屢停皆因艱於運費所致然軍士

從征日久斷難枵腹荷戈約計防剿各軍除駐防城太之振武軍由署綏定府知府唐炯自行籌解接濟外其通南廣元各路連兵勇長夫合計日需市斗米一百六十七石漢南各屬自被賊擾米糧毫無可籌均應由川採運接濟兵家所謂千里齎糧士不宿飽一有缺乏饑譟堪虞臣與駱秉章往返函商通籌熟計不得不籌墊運腳以恤軍士而利遄征該督臣體國公忠署藩司啟芳等亦深顧大局現先由司庫籌墊運腳銀八萬兩飭委成縣龍茂道鍾峻出省督辦該道才識明練極耐艱辛趕赴順保各屬責成地方官分途採辦酌量道路遠近按月分解辦理已有頭

緒查糧臺出力人員前准部議不准越級保升奉 旨

遵行自係慎重核實之意惟川省此次辦理糧臺萬分喫力該委員及地方官紳設法轉運共濟時艱實非尋常糧臺出力可比合無籲懇 天恩俯念軍米緊要將來漢

南事竣該委員及各州縣官紳採運接濟無悞軍行可否由臣會同四川督臣駱秉章擇尤酌保用示獎勵而昭激勸之處出自逾格 鴻慈所有米運艱難由川省派委大員督辦緣由理合附片由驛具奏伏乞 皇太后

皇上聖鑒飭遵謹奏

陳明河運艱難疏

兩江總督 曾國藩

竊九年分江北冬漕遵照部議仍辦河運臣於十一月十二日專摺陳奏在案伏查八年分江北漕米於九年河運赴通節節阻滯水陸兼運直至十月杪始能蒞事一切經費雖由糧道王太經格外撙節不至過鉅而人事之艱時日之久較之海運難易懸殊該糧道交米事竣赴部引

見現已馳回江甯臣面詢情形證以臣出京時由運河南下所見者其言多屬相符若不預爲籌畫恐下次又蹈覆轍據稱本屆承辦河運在事六月之久中間處處阻滯歷歷可數如嶧縣境內之大泛口該處爲山水經由之所



遇暴漲則迅流急湍迨水退之後則沙淤停積今年漕船經過該處水深不及二尺河底碎石縱橫最礙舟行必須由山東認真興挑挖深四五尺並將近灘石堆剷除與河底配平方利行駛自大泛口而北則有滕縣境內之邨山口該處爲入湖要道淺而且窄又微山湖內之王家溝滿家口安家口獨山湖內之利建閘南陽湖北之新店閘華家淺石佛閘南旺閘分水龍王廟以北之劉老口袁口閘處處淤淺或數十丈或百餘丈亦須由山東逐段勘明一律挑深方可無阻此未渡黃以前阻滯之處宜預爲籌辦者也議者謂早日開兌早日過湖即使費力尙不愆期

不知濟甯以南淺處已多濟甯以北運河尤爲乾涸總須
守候伏汛盛漲方足以資浮送至黃水穿運之處漸徙而
南自安山至戴家廟三十里自戴家廟至八里廟二十二
里運河舊有之堤盡被黃水衝破缺口極多黃水湍悍而
勢急漕船載重而質脆斷難破浪而行需用划船下旋以
立之根然後由漕船繳關步步上移否則浩蕩急溜之中
無復收泊之處而十里鋪姜家莊道人橋等處又極淤淺
似須由山東設法一面於淤阻處極力疏濬一面於運堤
各缺口排釘木椿貫以巨索俾漕船經過有所依傍牽挽
不爲洪溜所吸倉猝失事此渡黃時艱滯情形宜預爲籌

辦者也及至渡黃以後若在伏汛未落以前或易爲力若
伏汛已過等候秋汛卽屬杳茫不可必之數九年在八里
廟守候兩月之久可爲前鑒自張秋至臨清三百餘里河
身有高有下其疏導之法須量河身之高下高者開挖宜
深下者開挖稍淺庶可高低相等一律深通再於黃流已
長未落之時卽下閘板蓄水以免消耗或就平水南閘迤
東築一挑水壩引黃入運皆多方設法力圖斡旋之策此
渡黃之後運道易涸宜預爲籌辦者也山東水勢長落無
定或先長而後忽落或先小而後復大漕船經由東境一
千數百里向歸嶧滕魚臺濟甯東平東阿各州縣封雇船

隻以備起剝之用而地方官相距甚遠兼顧不遑九年所
雇剝船不免臨時逃散擬請酌改章程責成東省管河廳
員雇備剝船小者裝米三十石大者至百石爲止一遇漕
船淺阻斟酌起剝由糧道按石給發飯錢以免枵腹至開
夫亦改由河員招集歸其約束一併由糧道給予工食庶
不缺誤此又畧改舊章宜預爲籌辦者也東平州運河之
西有一鹽河倚山爲障爲東省鹽船所經要道漕船若由
安山左近繞入鹽河至八里廟仍歸運道計程二百餘里
較之徑渡黃流上有缺口大溜下有亂石樹椿者其難易
懸殊是以商船率多避黃而趨此路上年因非運漕正道

未敢試行十年行抵安山時如遇黃流勢猛自宜變通改道惟自安山三里堡入鹽河之路亦須預先勘明何處平順先立標竿爲誌免致臨時周章此又渡黃改道宜預爲籌辦者也以上五端皆河工應辦事宜又皆在山東境內從前糧船運北沿途修閘築壩挑河過剝均由南河東河兩督臣治黃治運注意專在漕務事事各有考成處處不惜重費故能駕輕就熟事無不舉今則黃流橫決運河失修河員之經費大減河運之米數極微欲以江北一隅數萬之漕而責山東以全力治河治運未免獨爲其難然部臣所以不肯竟廢河運者亦因成法不可輕改圖事不可

畏難具有遠慮丁寶楨見義勇爲力顧大局亦必不因米
數太少之故而忽視沿河應辦之工糧道王大經躬肩重
任旣已經歷險艱茲令再試危途不得不預爲綢繆免其
遲誤現在欽奉 諭旨飭派漕臣張兆棟前往山東會勘
築堤束黃事宜可與東河督臣蘇廷魁山東撫臣丁寶楨
面商一切相應請 旨敕下該督撫等通籌運道全局
建可久之宏謨並將臣此摺所指興工之處分投興辦利
目前之漕務臣當飭催該糧道等趕緊兌米及早開行仰
慰 宸廑所有河運艱難設法預籌緣由謹會同漕運
督臣張兆棟江蘇撫臣張之萬恭摺由驛馳陳伏乞

皇太后

皇上聖鑒訓示謹奏

六

請整頓鹽法疏

御史劉毓楠

竊兩淮鹽課爲皖省軍餉大宗皖營現當攻剿喫緊之時全賴北鹽暢銷課銀充裕方資接濟查淮北票鹽初行歲銷四十六萬餘引加江運數萬引征收正雜課銀幾逾百萬奏銷年清年款良由立法精用人當也近年歲銷不過二十萬引或十餘萬引乙卯丙辰兩綱尙未運清票商則完納無資場竈則晒掃失業漸成渙散之勢推其故皆由該管官吏經理不善祇知牟利營私不知恤商招販以致引滯課絀皖營守提軍餉累月經年貽誤大局所關匪細是以前任運判許惇詩陳照均經原任漕運總督袁甲三

舉劾去任奈鹽官積習相沿專尚夤緣奔競更多闕冗庸
劣之輩求其正本清源實心任事百不獲一淮北潰敗已
甚必得有爲有守之員方足以資整頓而籌課餉查運使
兼轄兩淮現蒙 皇上簡放新任必能破除情面任用
賢員惟淮北利弊所在恐難周知臣愚以爲得人則法自
立除弊則利自興謹據平日聞見所及酌目前因革所宜
敬抒管見六條爲我 皇上敬陳之

一裁釐捐以裕引課也查西壩爲淮北票鹽總滙之區湖
南由壩運經各岸途經高良澗正陽關臨淮關三河尖等
處現俱設有釐卡每處按包抽捐制錢六七百文或一千

一二百文均係各營弁勇管理交納稍遲鞭笞立至商販畏懼裹足不前引課日絀實由於此且釐捐向無定額不肖營弁往往征十報一各營仍有缺餉之虞是釐捐有名無實已可概見擬請裁撤釐卡招徠商販以期額行全復軍餉日饒 國計民生均有裨益

一禁私鹽以廣銷路也自來整頓鹽法首重緝私而官中之私尤宜嚴加禁止淮北提鹽抵課以來營弁捆運餉鹽買私帶運包庇梟販漏卡闖關一引餉鹽數引私鹽其勢不可以窮詰且票販赴場買鹽經漕運總督委員每運一引於例定鹽斤之外加帶二十餘斤集零成引運交漕局

不征國課名爲餉鹽實則私鹽且令場商賠鹽斤票鹽賠包索舡行賠販腳百端騷擾怨讟沸騰徐州糧臺餉鹽向在西壩採買今則海州運判親屬代辦赴場買鹽尅減價值拘拿車船夾帶私包莫敢如何應請將營鹽夾帶諸弊認真剔除並將漕局徐臺之鹽概行停止

一汰冗員以免擾累也鹽官之設各有專司淮北從前運行綱鹽過淮改捆是以設有淮北監掣同知一員專司改捆同知一員淮北批驗所大使一員白塔河烏沙河巡檢各一員專司改捆等事迨改票以後北鹽徑運西壩出湖舊道全徙官行徒設該同知等員有官無職罔不謀署他

缺應卽裁缺以省俸廉再票鹽改章之始板浦中正臨興
三場設立四局新關大伊山五丈河順清河等處各設一
卡均由運使委員稽查乃日久弊生竟有挂號請秤查艙
裁角諸名目每引黑費輒至制錢數千該委員等勒索陋
規徒爲商販之累應將局卡各員卽行裁撤所有秤掣查
驗事卽責成三場之官實心經理

一減經費以輕成本也淮北票鹽舊有經費一欸隨同正
雜課銀征收爲數甚鉅嗣因轉輸不及改運四成鹽包核
計正雜課銀不及三成經費等欸已在一成以上凡經費
所提鹽包存壩變價官民互市搶售勒索殊屬不成事體

又壬戌年請運較旺海州運判於例提鹽包之外每百引加征現銀數兩是年請運二十餘萬引加征幾至二萬餘兩是否稟詳上司有案應令嚴切根究以禁苛派並將經費應提鹽包速行停止酌留舊制經費十成之二征收現銀則官吏無分鹽爭售之弊有現銀辦公之實票販成本較輕亦足以廣招徠俟壩銷暢旺並將鹽課提包章程停止仍征現銀以杜弊端

一定鹽價以恤竈丁也淮北改票以後丁竈鹽價駁價每引例定九錢嗣後屢減屢復變更不已每一運判到任必先詳請運使核減鹽價恐嚇商民迨至賄賂滿囊始行詳

復舊制是以前任各運判均經減復駁價有案價減則產廢產廢則鹽缺鹽缺則課懸課懸則餉虧弊之相因有如此者况淮北屢遭捻匪焚掠亭疇池井大半荒蕪丁竈流離晒掃失業亟宜保固池鹽以裕課源應仍查照票鹽定章每引定爲鹽價駁價九錢永遠遵行該管官不得擅行核減致滋擾害

一疏河道以利挽運也海州運鹽河道潮汐時通常患淤塞商販舊有河費捐款每引捐銀二分足額年分捐銀八千餘兩向例存儲海州運判庫內以備隨時挑河乃自咸豐元年以來從未興挑現在河身淤墊日高乾涸時形挽

運多阻近來銷數雖絀十餘年之久捐款已逾數萬商販
累請挑河該運判輒謂庫存無款置若罔聞應令確切查
明速將捐存款項發給與挑以利捆運又聞淮北商捐全
係官爲經理乃捐倉穀則義倉如洗捐勇糧則練勇無多
應令一併清查以杜侵蝕以上六款皆關淮北鹽務利弊
臣訪聞較確不敢壅於 上聞應請 旨飭下兩江
總督遴委清正大員會同該運使徹底清查毋得瞻徇隱
飾以清積弊而裕課源臣爲整頓淮北鹺務起見是否有
當伏乞 皇上聖鑒謹奏

請收回淮南引地疏

兩江總督 曾國藩

竊照楚省本係淮南引地定額最多銷鹽最廣從前淮綱盛時歲徵各岸課銀甲於天下徵諸蘇省者不及十之一徵諸江西安徽者不過十之三徵諸兩湖者則居十之六是淮綱之興替全視楚岸之暢滯爲轉移軍興以後長江梗塞淮鹽不能行楚經楚省督撫奏明借食川鹽原屬權宜之計臣於同治二三年間整理鹽務維時淮南卽以收復楚岸爲請祇因引地被占十有餘年行之旣習爲常禁之未便太驟是以暫將鄰鹽釐稅酌量加重原冀川私本重而日衰淮鹽漸進而日旺不謂川販巧於遷避百計漏

三
釐每運兩引之鹽僅完一引之稅臣訪知其弊上年曾派
委員至宜昌會同楚省委員公同掣驗本年又減淮鹽之
釐期收敵私之效非不多方補救乃查鄂湘兩局積壓淮
鹽不下十餘萬引存數極多銷數極滯而川私紛至沓來
較前尤盛推原其故總由鄂省利食川鹽雖有掣驗之名
而明讓斤兩近聞宜昌抽收川稅仍不過六七折以致川
販成本太輕來源愈旺是前此繞越而偷行者今更肆行
而無忌川鄂官商幾忘引地之應屬何省請舉淮之受害
於川者數端爲
皇太后
皇上陳之淮鹽逆流
上駛歷長江洞庭之險每船至少須裝千餘包船笨載重

計自瓜洲開行非四五個月不能達湘非六七個月不能達鄂偶遇暴風山磯立時淹沒巨萬本銀悉歸烏有川鹽則自川江順流而下勢等建瓴雜用小船便捷異常計程途則淮遠而川近論舟行則下易而上難此運道捷於淮者其害一也淮南之鹽以餘東呂四兩場爲通場之冠俗所謂餘呂眞梁者也從前暢行楚岸其鹽色之潔由於商力充足本年所產之鹽堆至次年始行開售堆愈久則滷愈淨近年垣商疲乏隨收隨售鹽色不無稍減川鹽則自行楚以後廣開井竈其色甚白其質甚乾川販因之而居奇淮岸因之而日廢喧賓奪主莫斯爲甚此鹽色之勝於


淮者其害二也淮鹽定章以五百引起票係有鑒於道光末年改辦票運不拘引數聽商稟認厥後承辦數千引之大販皆爲一二引之小販搶運所誤故新章定以限制一以杜無本冒充之弊一以驗有力承運之資計請鄂湘引票五百引非現銀六七千兩不辦川鹽則計斤不計引集資數百千即可辦運鹽皆散裝旣官私之莫辨釐不預納亦來去之自由此籌運之巧於淮者其害三也鄂湘兩局售鹽皆以到岸之先後定出售之遲速鹽不到輪不准搶賣近數年來銷雖極疲商未跌價深得整輪之益當在船守風抵岸守輪計一檔之鹽非一年之久不得脫銷川鹽

則到處可售得價卽賣銷路廣則窮鄉僻壤遍地皆私賣
價輕則鋪戶行家非川不鬻此籌銷之便於淮者其害四
也有此四害淮何能與川敵川鹽一日不停淮鹽一日無
暢銷之望議者謂川鹽停止於川省業鹽人等有礙殊不
知淮南通泰二十場垣商煎丁以及鈎損細忙人等不下
數百萬戶兵荒年久困苦顛連爲從來所未有滿望江路
通行規復引地徐圖轉機不料鄂湘最暢之岸盡爲川私
所占西岸亦爲粵私闖私所占場商倒歇之家固眾而煎
細各役失業之人尤多比之川省業鹽者何止數倍凡認
淮引之商屢赴臣衙門呈遞稟詞請堵川私幾無虛日譬

之家有田產任客民多年佔據爲尊長者恐視子弟之啼
饑號寒而不爲之救有是情乎至湖北軍餉原以川釐爲
大宗刻下髮捻俱滅軍事大定鄂省存營極少餉項足敷
周轉况淮鹽內亦收鄂釐淮銷果暢鄂餉卽因之而增此
時堵止川私核與前准部文俟淮運暢行應卽申明舊章
嚴禁鄰私毋任侵占等語相合相應請 旨敕下四川
湖廣各督撫停止川私行楚以復昔年之舊制而收經久
之利權臣職司鹺權歷有歲年所徵課銀因軍餉緊要未
能多籌解京私衷抱歉耿耿於心今雖交卸鹽篆猶思籌
異日之有餘補近年之不足我 朝鹽法沿明舊制畫分

引地係大經大法一成而不可易今南北軍務告竣而不
力爭以圖規復則二百餘年之憲典自臣而隳其拂逆商
情斂一日之怨厥咎猶輕敗壞成法貽後世之譏厥咎更
重用是縷折具陳如其蒙 諭旨准禁川私應如何分

立限期漸減漸停加何巡緝粵私潞私浙私閩私不復抽
收鄰稅統由新任督臣馬新貽核議章程奏明辦理所有
請禁川私行楚收回淮南引地緣由會同兩江督臣馬新
貽恭摺具奏伏乞 皇太后 皇上聖鑒訓示謹奏



整頓淮南鹽務疏

兩江總督 曾國藩

竊臣於上年九月二十二日覆奏京倉需米摺內曾將籌辦南鹺情形略陳大概在案伏查淮南鹽課甲於天下自長江梗阻引岸廢弛迭經前督臣於咸豐四年奏辦就場抽稅販戶下場細鹽收課甚微又於七年奏改設局征税合水販就棧採買稍有成效但每年所征課銀較全盛時尙不及十分之一總因楚西引地未通鹽無去路是以課無來源現在江路肅清運道暢行無阻所有楚西各岸自應趕緊設法運鹽濟售力圖整理而籌辦之難大端有二一在鄰鹽之侵灌太久西岸則食浙私粵私而兼以閩私

楚岸則食川私粵私而兼以潞私引地被占將及十年民
既藉此以濟食官亦藉此以抽釐積重難返久假不歸勢
不能驟行禁絕一在釐卡之設立太多淮鹽出江自儀徵
而金柱關而荻港而大通而安慶而華陽鎮以達楚西層
層設卡處處報稅均以鹽釐爲大宗諸軍仰食性命相依
勢不能概行裁撤臣博訪衆論核定新章按切今日之時
勢仍倣昔年之成法大致不外乎疎銷輕本保價杜私四
者請爲我 皇上粗陳其略白鄰鹽侵佔淮界本輕利
厚淮鹽不能與之相敵江楚百餘州縣徧地皆是查之不
勝其煩堵之且恐生變計惟重稅鄰私俾鄰本重而淮本

輕庶鄰鹽可以化私爲官淮鹽亦得逐漸進步現已咨明湖廣江西各督撫將鄰私釐金酌量加抽聽鄰鹽與淮鹽並行不悖譬之田產被客民佔據田主初歸姑與客分耕而食待至淮運日多銷路日暢然後逐佔田之客申鄰私之禁此疏銷之略也近年楚西之鹽每引完釐約共在五兩以上所分濟者下游爲都興阿之餉馬子材之餉李世忠之餉上游爲臣與官文部下之餉皆萬不可停者臣與各處咨商鹽釐不能全停未始不可暫緩除揚鎮兩防宜照舊額外其餘未始不可少減酌定新章前之逢卡抽收者今改爲到岸售銷後彙總完釐分解各軍前之收十

五兩有奇者今改爲楚岸每引抽銀十一兩九錢八分西岸每引抽銀九兩四錢四分皖岸每引抽銀四兩四錢既減釐以便商又先售而後納此輕本之略也商販挾資求利無不願價值常昂保而勿失然不由官爲主持往往見小欲速跌價搶售其始一二奸商零販但求卸貨而先銷不肯守日而賠利其後彼此爭先愈跌愈賤如風捲潮退雖欲挽回以保成本而不可得官與商俱受其害現於楚西各岸設立督銷局派委大員駐局經理鹽運到岸令商販投局掛號懸牌定價挨次輪銷時而鹽少小民無食貴之虞時而銷滯商賈無虧本之慮此保價之略也鹽法首

重緝私大夥私梟明目張膽猶不難派兵捕拏最易偷漏者包內之重斤船戶之夾帶所謂官中之私查禁尤難現經改復道光三十年舊章每引正鹽六百斤分細八包每包另給滷耗七斤半包索三斤半共重八十六斤由臣刊發大票隨時添給並於大勝關大通安慶等處派員驗票截角如有重斤夾帶立即嚴加懲究提鹽充公其各岸之兼行鄰鹽者亦必另給稅單苟無單而販私即按律而科罪此杜私之略也茲四者均就目前之要務及道光年間之成規參酌而損益之無論官運營運悉照商運一律辦理至應完課銀因鹽釐爲數太重未能遽議增加仍照咸

豐七年奏案征收向來鹽課按半年奏報一次今擬將各處彙收之釐亦分上下半年隨課並報以便部臣有所稽考惟兵燹之餘戶口大減以今日之民數照承平之引額恐運銷不及一半加以鄰私充斥挽復非易殷商絕少招徠尤難能否漸有起色殊無把握臣惟有督飭署運使忠廉實力講求以期國課軍需兩有裨益所有淮南鹽務運道暢通力籌整頓緣由理合恭摺具奏伏乞

皇

太后 皇上聖鑒訓示

整理淮北票鹽疏

兩江總督 曾國藩


竊臣伏查淮北鹽務自前督臣陶澍改行票鹽意美法良商民稱便果能率由舊章行之百年不做無如軍興以後運道之通塞靡常銷數之暢滯無定鹽既不能如額運售課亦不能按綱造報拖延套搭已覺年不如年然未辦餉鹽以前票販雖日形竭蹶而尙能勉力從公池商雖難免偷漏而未敢任意私售逮軍營提鹽抵課變易舊規營員日出於其塗商販遂聞而卻步李世忠部下赴壩領鹽尤屬桀驁一不遂欲百般恐嚇甚至因棧鹽不足下場自細一營開端各營效尤護私夾私之弊遂至不可窮詰現在

李世忠業經開缺回籍其部下兵勇亦皆遣散當此淮甸
澄清自宜恪遵 聖諭將餉鹽截停招集新舊票販照
常請票運鹽完納現課出湖銷售臣旁咨博訪參考成法
覈議新章約有必須停止者三急宜整理者四請爲我

皇上陳之漕臣以清淮防費支絀先令場商每包捐鹽
五斤每引其二十觔旋因逐包捐繳諸多未便由海分司
詳改每運鹽百包帶繳五包其應完課銀及售出鹽價雖
經吳棠奏明作爲清淮軍需但錙銖而取之瑣屑而派之
殊非政體所宜此必須停止者一也徐州係山東引地前
因捻氛梗阻東引未能到岸經督辦徐宿軍務田在田奏

准借運北鹽盡收東課原係暫時權宜之計行之日久流弊滋多採買則私自赴場售銷則旁侵皖界刻下東引業已通行徐民無虞淡食不能再託借運之虛名貽侵銷之實患此必須停止者二也北鹽尚有淨鹽毛鹽之分已改細者爲淨鹽未改細者爲毛鹽皆須納課方准出湖近來私梟勾串營弁朋販毛鹽結隊橫行連檣闖越堵之嚴則營員出而包庇緝之疎則官引盡被占銷此必須停止者三也夫擁鹽之法革其弊而利自興餉鹽停則強劫害販之弊除捐鹽停則科斂病商之弊除借運朋販之鹽停則引界混淆營私充斥之弊無不除臣所謂整理之四端蓋

亦就諸弊既去因勢利導耳淮北綱引前係奏至戊
爲止今於五月初八日接開已未新綱惟兵燹以後
大減斷不能銷四十六萬引之數應循照近年奏案
正額二十九萬六千九百八十二引每引例收報部
一兩五分一釐雜課二錢又外辦經費四錢倉穀河
捕營各一分此外如團練壩工緝費號項等款名目
一概刪除以紓販力此現籌整理者一也近來軍餉
鹽釐接濟勢不能概行裁撤而長路處處設卡商販
畏途且從前各卡總計每包約須完釐錢二千餘文
過重自應大加核減今擬仿淮南總收分解之法歸



張此現籌整理者二也北鹽每引例定正鹽四百斤分細四包每包連涵耗重一百十斤近來棧鹽出湖皆在西壩改細大包重一百三三十觔不等以省運腳及按包抽釐之費換包後鹽票不符叢生弊竇臣已嚴申禁令不准改細大包並於例給大票外將每船裝鹽包數亦仿淮南之例填明艙口清單庶鹽與票符可杜就重而避輕不致以多而報少此現籌整理者四也以上各條係就戶部原奏及御史劉毓楠之條陳悉心參酌力挽近年之秕政悉復曩昔之成規而又恐積弊已深一旦改收現課各販不甚踴躍更議輔以官運照商販一律辦理以示倡導淮北近

年以來綱法紊亂開綱既無定期奏銷亦無定限目下新章既定臣嚴飭運司督同海州分司廣爲招徠源源認運仍限一年造報奏銷以符定制但例銷北鹽口岸迭被苗捻蹂躪之後不但煙戶凋零人民稀少且未經開綱之前存積餉鹽捐鹽販鹽爲數不少舊鹽之占壓太多新鹽之售銷難速勢有必然又皖之潁六廬鳳豫之信羅光固逼近捻氛軍情變幻刻刻可危課項能否如額收足奏銷能否依限造報未敢信有把握其五河正陽關所收鹽釐將來自當隨同正課一并報部以重欵項惟因餉需緊要此時所收鹽課只能支應軍需未能先運京餉私衷耿耿抱

疾良深臣惟有督飭署運司忠廉殫盡血忱實力經理以
仰副 皇上整飭離綱之至意所有截停淮北餉鹽設
法整理緣由理合恭摺具奏伏乞 皇太后 皇

上聖鑒訓示

請北新關暫緩開設疏

閩浙撫督

左宗棠

竊照杭州北新關向設武林門外其水旱城門及附近水陸要口均設稅卡每年額徵正餘稅銀十七萬二千六百餘兩銅銀水脚銀一萬五千三百餘兩本年二月省垣克復前織造鶴昶奏明俟三個月後再設關試辦嗣於七月十一日啟關迄今已逾三月徵數寥寥而釐稅亦形減色推究其故因向來關胥巡役視爲利藪藉端刁索任意抽收商民久已視爲畏途茲當公私罄竭之餘遽行設關書役故態復萌以致商賈裹足不前咨怨更甚迭據各商呈控以釐捐與關稅雖同爲商所應納然輸於釐局者無留

難詐索之煩輸於關口者有守候指勒之實臚列十款條
陳苦况臣知其情狀非誣咨商織造恆延擬以釐金劃抵
現收關稅會奏暫停關口徵收以順輿情恆延以事非定
制未免爲關吏所持不敢徑決臣惟杭州省垣向稱煩富
自經兵燹凋敝不堪至今市肆蕭條未能復業卽設法招
徠猶難期遽復舊觀若令竭澤而漁各懷疑畏不但百貨
翔貴商賈無利可圖卽此子遺之民生事艱難必致益形
窮促此固事理之不容坐視者也然使關稅能如前暢旺
下有所損而上果有所益臣亦何敢擅議更張乃自八九
兩月正當關期暢旺之時而該關口極力搜羅所得稅項

每月不過三千數百兩而止卽照此數率算一年所獲亦不過四五萬兩而虧欠正餘各款當在十萬以外是暫時復設關口下有所損而上無所益亦何樂而爲此乎臣與在省司道從長集議謹擬於浙江各屬釐捐項下按月劃撥錢一萬串解交織造爲採辦一切工料之需另撥銀一千兩津貼織造司庫庫使等辦公及該衙門書吏匠役紙張飯食各項用費其向解部科飯食卽於每月撥解錢一萬串內由織造酌量解給計每年釐局共撥解錢十二萬串市價約合銀九萬兩又津貼銀一萬二千兩以抵關稅較該關現徵銀數已加倍蓰於該關公私均爲有益嗣後

如餉需稍裕釐捐有餘尙可量爲加撥以補正額統俟軍需一律告竣釐捐停止再復舊制辦理庶關釐不致並舉商民得以稍紓亦用其一緩其二之義也如蒙 俞允卽請 飭下杭州織造速將關口各稅一概暫停毋聽關書恣惠別生枝節庶關稅得歸有著而杭州商民永戴皇仁於無極矣謹會同護撫臣蔣益澧恭摺具奏伏乞

皇上聖鑒訓示謹奏

循舊放給卹賞等欸疏

江西巡撫 沈葆楨

竊江西省軍興以來陣亡官紳兵勇應領卹賞祭葬碑價銀兩均係遵照定章先放五成官票餘五成實銀飭俟庫欸充裕再行補領嗣准部咨應發鈔票一概停發臣當以官票與鈔票事同一律一面將江西省官票礙難停止情形縷析奏明一面飭候部議計自准咨停發之日起請領未給之卹欸按五成扣算已五萬有餘該難裔咸以衣食無資紛紛具稟扶老攜幼遮道哀號察其情形萬難再緩雖部咨准作捐欸在已得五成官票者所欠五成實銀補放無期今准抵捐自宜樂於從事其未領五成官票者概令全

數作捐寡婦孤兒實有未易明言之隱蓋難後別無所恃
得官票尙可稍救燃眉若並此無之則死者既效力疆場
生者復將填溝壑卽將來獲邀議准而餓孳已無可再生
臣不得不仰體

皇仁變通辦理飭司將江省陣亡卹
賞祭葬碑價等項無論從前欠發及嗣後奉准議卹一體
循照舊章按名放給五成官票其餘五成實銀准其作捐
請敘俾難裔獲免流離凍餒以期上慰

慈厘理合恭

摺具陳伏乞

聖鑒謹奏

請飭禁抽收賭款疏

御史鄧承修

竊廣東賭風最熾向有闖姓番攤白鴿票花會等名近年則番攤白鴿票花會經督撫臣明禁雖未能盡絕根株尙不至設局開場抽收經費如闖姓一事者查闖姓之賭起自機房小民漸而相率效尤行於省會經前撫臣郭嵩燾罰繳款項以資津貼奸民因此藉端稟案抽繳經費巧立榜花名目每屆鄉會科期及歲科兩試之先設局投票每票限寫二十姓以中姓多少爲贏輸其投票之資則自一分一錢以至盈千累萬其投票之處則自省會以及各府州縣窮鄉僻壤其投票之人則自搢紳士大夫以及農工

商賈婦孺走卒莫不罄其所有各存倖心希圖一擲以致
傾家破產歇業潛逃甚而服毒投繯賣妻鬻子凡此之類
難以悉數尤可駭者每遇科年謠言四起或云某姓已通
關節或云某姓已托人情其歲科兩考百計鑽營有姓字
未登票內或經取錄則畀以多金甚使不行赴覆或尋其
瑕隙激同大眾稟攻否則有賂之故犯場規甘遭擯斥者
至武闈鄉試並無糊名其監射等弊竇更難縷指以 國
家掄才之典爲市儈賭博之資阻寒士登進之階啟官紳
貪污之漸立心之險設局之奇有如此者伏思粵東素稱
富庶自紅匪構亂以來迭經兵燹賈肆蕭條民生凋耗該

督撫臣留心民瘼各賭具已行明禁獨闖姓未經裁革其始則借罰款爲名繼則以抽收成例在該督撫之意不過以用項支絀藉資津貼耳豈知其爲害之至於此哉夫番攤白鴿票花會各賭率皆市井無賴之尤稍知自愛者猶不肯爲若闖姓則公然設局明目張膽恃官長爲護符卽父兄何能束其子弟傷風敗俗病國蠹民莫甚於此且賭博之禁 朝廷顯有科條今則官爲抽收更復成何政體就令有利無害臣愚猶以爲不可况爲利無幾而貽害如此若不早行禁止恐科場因此而滋事必至釀成巨案百姓由此而並窮必至流爲寇盜其弊更有不忍言者何以

仰答我 皇上愛民取士孜孜求治之至意相應請
旨飭下廣東督撫臣將抽收鬪姓賭款迅行裁革出示
嚴禁以肅政體而杜弊端臣區區愚見是否有當伏乞
皇上聖鑒訓示謹奏

同治中興京外奏議約編目錄

卷五

請崇尚經術疏

御史游百川

設局刊書疏

浙江巡撫馬新貽

請購刊經史疏

江蘇學政鮑源深

蘇省設局刊書疏

江蘇巡撫丁日昌

請整頓宗學疏

大理寺卿王榕吉

請陝甘鄉試分闈並分設學政疏

陝甘總督左宗棠

請擢用優貢疏

湖廣總督官文

請飭議廣額限制疏

御史范熙溥

請變通廣額章程片

湖北學政 張之洞

舉報孝廉方正片

山西學政 黃 鈺

閩省建設書院疏

閩浙總督 吳 棠

奏設味經書院疏

陝甘學政 許振禕

黔省建復昭忠祠並教養忠裔片

雲貴總督 張亮基

提督出後異姓片

兩江總督 曾國藩

酌議同文館章程疏

恭親王

請同文館無庸招集正途疏

御史 張盛藻

請崇尚經術疏

御史游百川

臣聞爲政之本在於得人得人之原視乎造士 國家籲
俊求才原期天下士子讀書明理本所學發爲文章而因
以措諸實用也乃自爲學者求名之心太急徃徃四書五
經未能成誦而卽讀膚淺考卷學爲應試之文旣務應試
則束書不觀專取文藝數十篇揣摩求售卽以經義茫然
莫辨且有並句讀不知者師如是以爲教弟子如是以爲
學求所謂淹通經史者蓋鮮也求所謂砥礪行修者益寡
也豈知學無根柢安有佳文寒峻之士不讀書而臨場蹈
懷挾之弊素封之子不讀書而倩代恃槍冒之爲人心日

浮則風俗愈敝雖有嚴刑峻罰不能禁也且此等弊風始
猶以爲郡縣偶然耳及詢之各直省大率類然何惑乎文
風未振真才不出乎今欲改此錮習莫若杜人徼幸之心
而引之專意讀經竊惟人才登進之路賴有鄉會兩科人
才培植之基尤在歲科兩考按歲科考試生童正場之前
例有考古一場應請 旨飭下督學使臣徧行曉諭生
童中如有能默誦五經通曉經義者准其赴該學報名註
冊卽於考古場中按名面試試以數條其能否成誦講解
無難立辨可取錄者卽正場文字未甚優長亦拔之以示
鼓勵其未經報考止就正場文字取錄者亦於發落時令

其認習某經各註名下俟下屆按冊試之勤奮者立予獎勵玩愒者加之創懲如此殷殷勸誘將來屆選拔舉優年分可期得經明行修之儒以仰副我 皇上樂育人才之至意蓋經與文並重參以面試之法則懷挾槍冒等弊舉無所施各省士子庶勉焉盡務實學而士習可賴以挽救亦整飭學校正本清源之一道也臣爲勸學杜弊起見是否有當伏乞 皇太后 皇上聖鑒謹奏

設局刊書疏

浙江巡撫 馬新貽

竊臣先准禮部咨議覆御史范熙溥奏軍務肅清省分亟應振興文教令將所屬書院妥爲整頓奉 旨依議欽

此續又准咨同治六年五月初二日奉 上諭鮑源深

奏刊刻書籍頒發各學一摺等因欽此先後恭錄行知到

臣竊查本年三月間據布政使楊昌濬按察使王凱泰詳

稱欲興文教必先講求實學不但整頓書院並須廣集羣

書浙省自遭兵燹從前尊經閣文淵閣所存書籍均多燬

失士大夫家藏舊本連年轉徙亦成烏有軍務肅清之後

省城書院如敷文崇文紫陽孝廉堂詒經精舍均已先後

與復舉行月課惟書籍一項經前兼署撫臣左宗棠飭刊四書五經讀本一部餘尙未備士子雖欲講求無書可讀而坊肆寥寥斷簡殘篇難資考究無以嘉惠士林自應在省設局重刊以興文教當經臣批飭迅速舉辦卽於四月二十六日開局一面遴派篤實紳士分司校勘並先恭刊

欽定七經

御批通鑑

御選古文淵

鑑等書昭示圭臬其餘有關學問經濟講誦所必需者隨時訪取善本陸續發刊一切經費在牙釐項下酌量撙節提用現仍分飭在局紳員認真校刊並諄飭各屬設法籌勸盡復書院勤行考課以仰副 聖主雅化作人至意

再從前

欽定諸經卷帙闊大刷印工價浩煩寒士

艱於購取臣此次刊刻畧將板式縮小行數增多以期流傳較易庶幾家有其書有裨誦習合併陳明伏乞

皇太后

皇上聖鑒謹奏

A large rectangular table with 11 empty columns. A small tab is visible on the right side of the table.

--	--	--	--	--	--	--	--	--	--	--

請購刊經史疏

江蘇學政 鮑源深

臣伏查學政全書各省府州縣學向有尊藏

御纂

欽定諸書並於雍正乾隆初年迭經奏准令直省撫藩將
頒發 御纂欽定經史諸書敬謹重刊並聽坊間印

售以廣流傳又議准督撫將十三經廿一史諸書購買頒
發各學收管令士子講習等因在案仰見 列聖右

文稽古嘉惠上林至意近年各省因經兵燹書多散佚臣
視學江蘇按試所經留心訪察如江蘇松常鎮揚諸府向
稱人文極盛之地學校中舊藏書籍蕩然無存藩署舊有
恭刊 欽定經史諸書版片亦均毀失民間藏書之

家卷帙悉成灰燼亂後雖偶有書肆所刻經書俱係刪節之本簡陋不堪士子有志讀書無從購覓蘇省如此皖浙江右諸省情形諒亦相同以東南文明大省士子竟無書可讀其何以興學校而育人才臣擬請 旨將殿板諸

書照舊重頒各學誠恐 內存書籍無多 武英殿書板久未修整亦難刷印因思由 內頒發不如由外購求敬請 敕下各督撫轉飭所屬府州縣將舊存學中書籍設法購補俾士子咸資講習并籌措經費擇書之尤要者循例重加刊刻以廣流傳現在江甯省城已設局刊刻四書五經惟所刊皆係學中讀本於經史大部書尙未遑及

竊維士子讀書以窮經爲本經義以

欽定爲宗臣

伏讀

世祖章皇帝御註孝經

聖祖仁皇帝

御纂周易折中

欽定書詩春秋三經傳說彙纂

世宗憲皇帝御纂孝經集註

高宗純皇帝御

纂周易述義詩義折中春秋直解

欽定三禮義疏

皆闡發精微權衡至當足使窮經之士不淆於衆說得所

指歸以上各書請

旨敕下各撫藩先行敬謹重刊頒

發各學並遵舊例聽書估印售以廣流傳庶使僻壤窮鄉

皆知研求經學至窮經之外讀史爲先全史卷帙浩煩現

在經費未充重刊匪易恭請 飭令先將

聖祖仁

皇帝御批通鑑綱目

高宗純皇帝御批通鑑輯覽

敬謹先刊分發各學士子讀之已可貫串古今賅通全史其餘各書再行陸續刊刻或疑現在各省經費支絀籌餉艱難似購書刊書無暇遽及夫戡亂則整武爲先興學則修文宜亟况購書刊書經費每年不過籌餉中百之二三籌捐尙易誠令學校經史重完士子深於經者窺聖學之原深於史者達政事之要體用兼賅益卜人才蔚起於以光 列聖右文之治廣 皇上教育之仁豈非黼黻中興之盛舉哉臣愚昧之見謹繕摺具奏伏乞 皇上聖鑒訓示施行謹奏

蘇省設局刊書疏

江蘇
巡撫丁日昌

竊惟 國家設官分職皆以爲民而與民最親莫如州縣
得其人則治失其人則亂自古爲然於今尤急溯自軍興
以來州縣中歧途雜出流品亦至不齊雖其中固多可造
之才而平日於吏治諸書會未體會一旦身膺民社茫然
無所持循凡百工技藝皆學而後能豈有親民有司不學
而能無謬失者此循良所以日鮮而民困所由日深夫諸
子百家之書浩若淵海如理學陳編或虛渺而憚於冥索
若裨志野乘雖悅目而又病支離况士子窮經咕嗶卽負
宏通之譽其益只在一身若使仕優而學默勘得失利弊

之原推而至於一縣則一縣受其庇矣又推而至於一府一州則一府州受其庇矣天下者州縣之所積州縣若皆得人盜賊何從而起故今日欲敦吏治必先選牧令欲選牧令必先使耳濡目染於經濟致治之書然後胸中確有把握臨政不致無所適從臣現督飭局員選擇牧令凡有關於吏治之書著爲一編如言聽訟則分別如何判斷方可得情言催科則分別如何懲勸方免苛斂胥吏必應如何駕馭方不受其欺朦盜賊必應如何緝捕方可使之消彌他如農桑水利學校賑荒諸大政皆爲分門別類由流溯源芟節其冗煩增補其未備刊刻一竣卽當頒發各屬

官各一編俾資程式雖在中材亦可知所趨向譬諸百工示以規矩則運斤操斧悉中準繩庶幾士習民風因之起色至於小學爲童蒙養正之基經史爲藝苑大成之具謹當陸續刻成廣爲流布以仰副

聖天子造士作人之

至意抑臣更有請者目前人心不古書賈趨利將淫詞邪說薈萃書編水滸傳奇畧識之無如探秘笈無知愚民平日便以作亂犯上爲可驚可嘉最足爲人心風俗之憂臣在吳中業經嚴禁誠恐此種離經畔道之書各省皆有應請旨飭下各直省督撫一體嚴加禁燬以隱戢人心放縱無所忌憚之萌似亦維持風化之一端所有臣在蘇

省設立書局先刊敕令各書並禁傳奇小說緣由是否有
當伏乞 皇太后 皇上聖鑒謹奏

請整頓宗學疏

大理寺卿王榕吉

竊維 國家設立宗學所以爲國儲才亦以明親親也學分左右兩翼每翼宗學額設教習官四員總管二員副管八員復有總理之王公統司其事又欽派科甲出身三品以上之京堂二員專司稽察法至密意至深也誠以宗室子弟生長富貴派衍天潢必使之入學肄業擴其聞見以免固陋陶其性情以化驕矜遜志時敏破除世習習氣乃可以長保富貴也教習官三年俸滿須查有實在功效方由稽察大臣加具切實考語送宗人府帶領引 見請旨施恩錄用獎其勤勞卽以嚴其督課 國朝宗室

代有偉人莫不仰荷 列聖之所教育迄於今而宗學
幾成虛設矣臣自同治九年奉 命稽察左翼宗學當
向該管官切實致囑課程務須認真初次入學尙有教習
數員肄業生二十餘人在學接晤此後時復前往則日形
疏懈荒署或無一人稽察教習者難得與宗學生晤面出
題課試交卷亦復寥寥詰其何以如此據該管官僉稱宗
室之廢學大都爲貧所累餬口無資實有萬難認真者緣
宗學肄業生向章每名月給米三斗紙筆墨按時給領夏
季以冰冬季以炭自經費不敷月米裁減又改爲折色向
之領米三斗者今領米不及二分其他更無論焉每月所

領僅敷兩日之食欲責令常常入學讀書作文勢必有所不能是宗學之設有名無實矣其充裕之家亦或自行延師課讀然力能延師者十之一不能延師者十之九誠恐乃逸乃諺既不知稼穡之艱難又不得詩書之進益坐悞聰明大爲可惜在各學教習不過敷衍歲月藉爲出身之階而職司稽查者扶同隱忍實覺負疚于中臣在順天府升任時於金臺書院考課之期遇有宗室子弟應試者必酌予獎勛拔置一二等俾稍分膏火之資愛其才又憐其貧也伏思我 皇上誼篤親親推恩錫類之仁無所不至獨入學讀書之子弟月米未復舊規似無以示優異而

昭激勸且兩翼宗學每年所撙節者不過種米五六百石
地方水旱偏災一經奏報 朝廷不惜截漕十萬石二十
萬石立予 恩施卽京師之普濟堂功德林及通州之
王恕園每冬尙蒙 恩賞倉米五六百石及三四百石
不等豈以宗室子弟培養所關而稍有靳惜耶可否請
旨飭下宗人府王公妥議整頓章程肄業生月米應如
何復舊勤學與不勤者應如何分別勸懲教習官應如何
專以責成儻俸滿並無實效應否再留數年以觀後效獎
勤警惰庶教習專心以訥誨學者崇德而象賢將見宗室
子弟經明行修大可爲楨幹之才小亦不失爲圭璋之品

則 聖朝之恩明誼美歷久彌光矣臣愚昧之見是否
有當理合恭摺具陳伏乞 皇上聖鑒訓示謹奏

--	--	--	--	--	--	--	--	--	--	--

請陝甘鄉試分闈並分設學政疏

陝甘總督

左宗棠

竊維甘肅地處西北邊荒舊隸陝西行省統轄康熙年間拓地日廣始設甘肅巡撫駐扎臨洮乾隆年間又改臨洮爲蘭州府後設總督駐之兼管巡撫事地當西陲衝要南北界連藩服荒服漢蒙回番雜處其間謠俗異宜習尚各別漢敦儒術回習天方蒙番崇信佛教亘古至今未之有改置省以來諸凡建設或創或因於武備尙詳而文治獨畧其異於各省者兩大端各省除壤地毘連一水可通之安徽一省鄉試歸併江南取中士子久習爲常此外均就全省適中督撫駐扎處所設立貢院屆期考官入闈校閱

照額取中獨甘省距陝道阻且長而鄉試必須赴陝陝甘學政遠駐陝西三原三年一度按臨甘肅舉行歲科兩試均與各省不同故自改建省治以來甘肅士人經明行修能自淑其鄉里者尚不乏人至魏科上第以文章經濟取重當世者概不多見非各省皆知稽古之力爭自濯磨甘肅士人獨安固陋不求聞達也計甘肅府廳州縣距陝近者平慶涇鞏秦階兩道約八九百里千里蘭州一道近者一千三四百里遠者一千六七百里蘭州迤西涼州甘州西甯迤北甯夏遠或二千餘里或三千里至肅州安西一道則三千里或四千里鎮迪一道更五六千里不等邊塞

路程攸遠又兼驚砂亂石足礙馳驅較中原行路之難奚
翅倍蓰士人赴陝應試非月餘兩月之久不達所需車馱
僱價飲食芻秣諸費旅費卷費小者數十金多者百數十
金其赴鄉試蓋與東南各省舉人赴會試勞費相等故諸
生附府廳州縣學籍後竟有畢生不能赴鄉試者窮經皓
首一試無緣良可概矣軍興以來學臣不按臨甘肅者已
餘十稔幸前學臣許振禕不避艱險以次按試生童踴躍
歡呼迎拜馬首計補行各屆歲科諸試取入新生不下萬
人而從前取進生員尙不在內徒以資斧無措不能遠行
加之夏秋暑雨水潦縱橫有無從問津者有中道逋遁致

悞場期廢然而返者有資斧耗盡抑鬱成疾以歿者其得
抵陝完試事者不及三千人然則甘肅士子之赴鄉試者
合新舊諸生計之不過十之一二而已臣自肅州凱旋歷
甘涼各郡途間見諸生迎謁道左初疑其秋試被放者比
詢以試事則僉稱無力赴陝不知其詳言已欲獻不絕慰
諭遣之前接准學臣許振禕咨送甘省赴試士子公懇分
闈呈詞當行兩司議詳昨由肅凱旋後又據紳士前刑部
主事滕烜道員曹燭及漢回士紳等聯名呈稱捐建貢院
擇定袖川門外地基籌備磚瓦材木已有頭緒請援照湖
廣雲貴鄉試分闈取中前來並稱甘省武試本係分闈文

試宜可倣照懇求具 奏臣惟湖廣雲貴等省鄉試道路
險遠歷蒙 列聖恩旨分闈取中士林感頌至今茲

甘肅赴陝鄉試道路險遠較各省數倍有加 皇上一

視同仁軫念士人赴試維艱儻 恩允分闈取中俾邊

徼寒微得照各省一律就近應試則投戈講藝士氣奮興

文治之隆可計日而待也惟是分闈取中額數應定

若干難以擬議蓋陝甘鄉闈向係合兩省取中從未分析
茲甫議分闈取中若將兩省額數平分各占一半則陝省
應試人員向多於甘省現且有增無減甘肅如占額一半
致陝西中額頓形減少殊非情理之平若照臣度隴之初

奏准甘肅取中二十一名成案計算無論當時因賊氛正熾赴試人稀一時權宜酌擬本非甘省定額况當隴境肅清應試士人自必增多數倍而中額僅此翻致向隅亦無是理若按照永廣中額部章計算甘肅軍興以來各府廳州縣派捐糧料餉需均值人物彫殘市價翔貴之時調核各廳州縣歷年案卷稽核捐輸之欸爲數甚鉅而又限於部議永廣中額不得過十名定章無從推廣此擬議中額鮮可依據之實情也溯考從前兩省合中時道光丁酉己亥咸豐壬子等科甘肅每榜曾取中三十餘名同治九年庚午科鄉試臣接陝西撫臣蔣志章緘稱主考評場中試

卷甘肅獨優殊嫌額滿本年癸酉科鄉試據陝西藩司譚
鍾麟稟主考所論亦同是陝甘文風無容軒輊而甘肅分
闈後人文日新曰盛尤在意中合無仰懇 皇上天恩
逾格 特准比照各省中額最少之貴州每科取中四
十名滿營應試士子每科取中二名合共四十二名作爲
定額遇 簡放主考學政之年另 簡甘肅正副考
官各一員甘肅學政一員俾合省士子得以就近鄉試而
歲科按屆舉行學臣得免跋涉之勞生童得以時親承訓
迪習舊學而啟新知不獨邊方士習文風可期丕振己也
臣自西征以來目覩民俗凌夷氓疋日甚不但刦殺爭奪

視爲故常動輒嘯聚多人恣爲不法而民間倫紀不明禮
教久斁千名犯義之案誅不勝誅緣地雜華戎習俗漸染
日深正恐夏變爲夷靡所止極不得已設局鄂省影刊四
書五經小學善本分布各市各府州廳縣師行所至飭設
立漢回義塾分司訓課冀耳濡目染漸移陋習仍復華風
邇來漢民敦崇儒術誦習六經回民亦頗知嚮慕爭請設
立義塾延師課讀儒書前學臣許振禕次第按臨多方激
厲回生得附學籍貢成均者所在不乏益欣欣然以得附
宮墻爲意外榮幸食桑黌而懷好音斯其時乎若荷
皇恩允其分闈就試屆時 簡派學政按期校閱則經

正民興邊氓長治久安之効基於此矣臣亦知聖賢之學不在科名士之志於學者不因科名而始勸然非科名無以勸學非勸學則無讀書明理之人望其轉移風化同我太平無以致之固非謂科第文章足以歆動庸耳俗目兼可博取民譽也愚見所及謹以附陳如蒙 俞允每屆鄉試經費應由甘肅籌畫學臣衙署應於蘭州建立一切未盡事宜容俟續陳伏乞 皇上聖鑒訓示施行謹奏

請擢用優貢疏

湖廣總督官 文

竊臣考歷代取士之法不外選舉考試兩途軍興以來論者多患科舉之弊請變通之法於是有開特科舉人材諸議臣以爲我朝立法本寓有周漢鄉舉里選之制則優貢一途是也夫科甲登進皆係糊名拔貢考試亦重文藝惟優貢由各學出具考語並將優行各條造冊申詳學臣訪查無異先行送部又會同督撫一體考核擇其文行兼優者會銜保題三年一舉大省不過六名中省不過四名小省不過二名其查之也至詳其舉之也至慎猶恐不得其人歷經議准任缺無濫且係在學臣任滿之時其接任

未久尙未真知者俟之下屆是則

皇上分遣近臣按

行各省於考取優貢力爲慎重之至意乃歲久成俗但取充數舉之多不經意得者亦不爲榮推原其故由於朝考之時向來相沿概置二等優貢諸生無因自見則徒爲貢監中增一名目而已臣愚以爲今日訪求人材與其別設特科何如就優貢舊章核實選舉務取鄉黨無間名望咸優如求將材卽可訪通曉韜鈴之士求史臣卽可訪習古通今之人求博學鴻詞則諸生中豈無博雅之才求孝廉方正則諸生中自有篤行之士所舉旣少真才易得爲時甚裕採訪自周嚴定舉主之賞罰俾他日得以參考明

示求賢之詳慎使州郡皆樹風聲則舉必其人章惟由舊
無煩特科而皆能得士矣惟朝考之日似宜倣照拔貢
章程亦在殿廷考試分別擢用立予出身或分京外之
班或授佐貳之職俾品學優長者得以自效則互相觀感
庠序中益自濯磨矣臣等再三商酌意見相同伏願
皇上飭部妥議章程以資激勸而收得人之效謹合詞具

奏伏乞

皇太后

皇上聖鑒謹奏

請飭議廣額限制疏

御史 范熙溥

竊臣伏讀咸豐三年三月奉

上諭朕以軍興三載

需餉浩煩特命大學士裕誠等會同戶部議奏本日據奏
請推廣恩綸申勸捐輸著照所請由各省督撫妥爲勸導
凡紳士商民捐貲濟餉一廳州縣捐至二千兩者准廣文
武學額各一名如應廣之額浮于原額卽遞行推展儻捐
數較多展至數次猶有盈餘者准其於奏請時聲明分別
酌加永遠定額欽此自是以後各省捐數日增其大縣未
經殘破者考童或二三千人或千餘人取進六七十名尙
堪採擇若陷賊甫復則應試零落至小縣文風較遜之區

送遭兵燹學業荒蕪人數更行短絀兼以歷屆歲科停試
至開考時不得不併案取進而捐輸推廣更多雖任缺無
濫例有明文各省學臣仰體 皇上鼓勵人才至意仍
不免於按次勻進示博採無遺之義所有併案之縣率多
童生僅敷進額或進額盈於童生不論文才高下無不一
榜盡錄臣前會聞福建學臣厲恩官云按臨積年未考之
延平府屬有一縣進額三十名而童生入場僅二十七人
卽他省亦有定額八名近來考童僅有十人者如此濫列
膠庠該士子或以功名太易不甚愛惜故習佻浮恃符妄
作或因學問過淺從無津涯翻至束書不觀自甘暴棄其

有關於風俗人心殊非淺鮮臣維秀才爲士子進身之始苟無蘊蓄未便倖廁青衿向例有以此學文風較遜而進額減移於彼學者咸豐二年湖南巡撫駱秉章奏請裁減安鄉縣學額撥增瀏陽縣學額奉

旨依議是原額

既堪移撥加額更可通融現南北各省迭報肅清以後捐輸截止加額日稀正可以此日進額之有餘補異日進額之不足應請

旨飭下部臣酌議雖併案之縣亦須明

定數人取進一名其餘展緩遞至下屆各歸本縣漸次勻

進俾多士仍得普沐

皇恩而學校亦能蒸蒸日上臣

愚昧之見是否有當伏乞

皇太后

皇上聖鑒

謹奏

五

請變通廣額章程片

湖北張之洞
學政

再軍興以來各省團練捐輸俱蒙

聖恩准廣學額仰

見嘉惠士林至優極渥惟是人才有限捐數無憑近

年楚省加廣學額日增月盛往往一學進額兩倍原數雖
定例加額不得過正然防勦捐輸既許毋庸併計永遠暫
廣又屬相並而行以至一州縣所取動至六十之多楚省
文風雖優不再期之間取士逾百雖曰拔尤實同竭澤大
學已多節取小縣更難求精恐數屆以還必至三耦不備
且得之過易根柢淺薄文藝粗疏初學者畧識之無便懷
微倖之想幸中者未嘗學問更無求進之心將向來文物

菁萃之區寢變爲荒蕪謏陋之習不學者以爲得計老成者深有隱憂况人數過眾則官師之約束難取額過寬則士林之流品雜其于士習文風殊有關係定例雖有可缺勿濫之條然 朝廷增其名而使者減其實旣非臣子所當爲亦乖立法之本意伏思一縣菁華幾何開報動逾數萬誰用誰銷但憑口說接踵而來者方多在議獎時不肯過刻者 朝廷寬大之深恩而呈報時不無虛濫者胥吏朦蔽之故智伏祈 敕下各省督撫於捐輸團練經費呈請廣額者必須切實核減再爲入告並 飭部臣將原定章程量加變通稍爲從嚴庶名器無過輕之虞人文

無日下之患臣爲培養楚省文風起見是否有當伏乞

聖鑒謹奏

--	--	--	--	--	--	--	--	--	--	--	--

1000

舉報孝廉方正片

山西學政黃鈺

再臣准吏部咨開同治元年十二月十三日內閣奉

上諭各直省選舉孝廉方正甚屬寥寥著在京四品以上
大員及各直省督撫學政無論紳士布衣有實在堪膺孝
廉方正之選者各舉所知等因欽此仰見我國家側席
旁求振興實行洵足以扶世教而正人心內外臣工先宜
仰體 聖懷就所真知灼見者敬謹臚陳以備採擇除
山西通省臣謹會同撫臣督飭地方官認真舉報候彙齊
辦理外臣于按試各屬仍隨地細心訪察茲通省科試完
竣謹查汾陽縣屬增監生布政司理問銜曹樹穀累代書

香品端學裕門庭孝友化及鄉閭定襄縣屬嘉慶戊寅科
舉人前任嵐岢州學正邢達順家風孝謹學守儒先造就
有方門皆端士代州屬歲貢生崔鰲峰克敦內行品粹學
優入監書院士心翕服以上三員均經地方擬保孝廉方
正而該員等咸懷謙讓不肯應舉及臣按臨訪知曾諭教
官廩生等再行敦勸復均以年力就衰無能報效固辭臣
伏念 國家登進人才爲途甚廣此科專爲表章實行原
不在乎年力富強足資驅策該員等品行敦實物望咸孚
旣足充膺是選自未便因其固執謙退遂聽湮沒惟查曹
樹穀年七十一歲邢達順年七十三歲崔鰲峰年六十六

歲其不能赴京引見尙屬實情理合據實陳明可否仰懇
天恩准將該員等作爲孝廉方正並如何賞給虛銜或酌
加頂帶以示獎勵實於人心風俗大有裨益所有微臣遵
旨敬舉所知緣由謹附片具奏恭候

皇太后

皇上訓示施行謹奏

--	--	--	--	--	--	--	--	--	--	--

112

閩省建設書院疏

閩浙總督 吳 棠

竊查同治六年正月二十五日接准禮部咨同治五年九月十五日奉 上諭御史范熙溥奏軍務未靖省分亟宜振興文教一摺着禮部議奏欽此欽遵查舉人肄業書院雖例所不禁然並無明文其願否聽其自便該御史所稱福建省創設舉人肄業膏火擬令他省酌量添設等語各省情形不同未便以一省概律現在各省軍務漸次肅清應由各該督撫通飭所屬妥爲整頓如經費不敷應如該御史所奏由該督撫酌量情形設法籌措等因當經前署督撫臣轉行遵照辦理在案臣等伏查福建省爲先賢

講學之鄉夙稱海濱鄒魯二百餘年涵濡 朝廷教化人文之盛蔚然可觀會垣原設鼇峰鳳池兩書院甄錄貢監生童月給膏火俾資肄業頻歲軍興未嘗曠廢惟曾膺鄉舉者不在與考之列書院之設所以作育人材而舉人一途內則考取學正中書外則挑選知縣教職必須平時加意甄培俾之誦法儒先講求經濟一登仕版方能措理裕如却處士之虛聲收用人之實效同治五年前督臣左宗棠重刊先哲遺書開設正誼書局錄選舉貢百餘人月給膏火分班校拔迨十二月據紳士前光祿寺卿楊慶琛前江西巡撫沈葆楨等以書局工程將蒞請設立舉貢書院

爲海邦作育人材呈經前兼署督臣英桂批司議定章程在於釐金項下籌撥銀五萬兩發交殷實當舖每月完息一分一釐以資經費將正誼書局改爲正誼書院凡福建舉人及恩拔副歲優五貢概准與考於每年二月望前由督撫親臨甄別照依章程考取內課五十名每名月給銀四兩外課五十名每名月給銀三兩禮聘院長職掌教事該舉貢等果能敦品積學三年後當擇其材器尤異者量予奏獎以示鼓勵再鰲峰書院創於康熙年間蒙

聖祖仁皇帝頒賜三山養秀

御書匾額鳳池書院

創於道光年間蒙

宣宗成皇帝頒賜正學昌明

御書匾額此番建設正誼書院士子絃誦之場尤切
宸藻昭明之望可否仰懇 頒賜御書匾額懸挂

中堂藉資觀感從此海甸文風蒸蒸日上皆出自聖教之
薰陶矣茲據藩司具詳請奏前來除咨戶禮二部外臣等
謹合詞附驛具奏伏乞 皇上聖鑒訓示並請飭部知
照謹奏

奏設味經書院疏

陝甘學政 許振禱

竊惟風俗之盛衰視乎人才而人才之隆替由乎學校學校者教士之地實養士之地也士人有廉耻而後鄉里有風化庠序有秀異而後在官有循良其始僅章句誦讀之爲其究則生民休戚之寄故一人爲之眾人從而效之方正邪僻分類殊趨謂之風氣一人倡之眾人遵而行之學問議論先入爲主謂之師承其源甚微其流甚大不可不謹也夫欲有所用以收得人之效則必有所養以爲儲才之基臣伏見 國家作育人才府縣設學復聽所在舉行書院法良意美得人稱盛惟奉行日久教官往往視爲具

文平時因循居半道學政接臨所駐不過旬日而又不逐日校藝卽有所牖迪亦不過布條教舉大綱至於教士之實竊以爲莫如書院若書院山長得人而謂不能挽迴風氣振興人才者未之有也伏查近日書院之弊約有二端一由山長爲紳士退休之資其延訂也或論名位或循情分官場以爲一歲之應酬紳士以爲一家之取給評點甲乙苟簡從事而於學問人品概未之及如是者不得謂之教且經費悉隸官吏凡印官兼轄書院往往虛領其名而未查其實其款項生息支發一切皆書吏主之積年旣久侵蝕失計日見支絀士無所藉難以棲止如是者不得謂

之養臣自抵任以來因查西安有關中宏道兩書院培植
兩省規模稍大關中督撫主之宏道學政主之惟自軍興
以來士多苦貧不能自食又不能從師雖欲聞經明行修
之要其道無由况甘省流寓於此者殊不乏人臣愚以爲
似當添一書院以收兩書院之所不能容因擇兩書院適
中地方於涇陽城內設一味經書院其規模與關中宏道
相等臣捐廉爲之倡而各屬紳士好義急公者大率皆隸
金襄事業已設立講堂號舍開課舉行其定章有不同他
書院者三他書院專課詩文味經之設則要以實學爲主
令諸生逐日研究

欽定七經及通鑑史漢大學衍

義文獻通考等書引之識義理稽故實手抄口誦日漸淹
貫匪惟腹笥可充卽政事亦差知大略其設課也則合制
藝論策經解詩賦法戒錄分課一一爲之使知學古之爲
貴他書院除閱課外師弟不嚴接見今則山長日登講堂
傳集諸生將經史大義及小學諸條講貫察其課程閱其
札記別其勤惰嚴其出入令其由嚴憚以生清明本講貫
而得服習使之知植品之爲先他書院屬之于官官有遷
移則法必中變官有職務則事難兼涉卽如宏道書院歸
學臣董理如臣終年在外按試相隔千里何能稽查今味
經之設臣悉擇一方之望以之共理一方之學雖創始由

臣而日久經理究以責成紳士爲當蓋權不歸官則延師可免徇情敷衍之弊非物望素孚學品兼優者必不能居此席費歸實用則經理可免侵蝕支絀之虞非廉介自持鄉里推服者必不能與其事羣力維持思培子弟使之知成法之可繼此臣倡建味經書院之初意如此也臣徧查陝甘人望所歸得保升同知前平利縣教諭史兆熊學有本原體用兼備延爲書院山長訂期十年而以城固訓導姚劭誠澄城教諭王賢輔協理講席兆熊品端學粹遊其門者多所成就前在興安勸辦一府堡寨一千數百餘所賊犯興安不能逞志全活甚多歷經大吏保荐兆熊每爲

學徒攀留不能出仕其恬淡而有實用如此劭誠長于經
學志在誘迪賢輔澹然無欲留心風化此皆關中方聞之
士正學之選置之訓迪必有可觀記稱七年小成九年大
成臣之責以十年者亦準斯義如造士無効臣請受謬舉
之咎其承管經費課程膏火責成紳士候選知縣怡立方
教職張樞楊彝珍吳乙東謝洪猷從九牛興宗等立方廉
正勤懇才識素優歷年籌衛地方久著成效其餘諸人亦
皆物論推重以之經理書院不僅培養人才日有起色卽
義倉蠶桑諸事亦可次第舉行不動公家纖毫之款而又
興地方無窮之利似教養可收實效臣觀諸人俱誓必竭

力願任培植不求保獎不居成功良由關中風俗之厚士
習之美以之責成經營實足垂久遠而無流弊合無恭懇
皇上天恩飭下陝甘總督學政臣各立案嗣後督撫
學政及各衙門分月輪課其山長堂課規條卽乞照臣所
議辦理一併責成紳董承管是否有當伏乞 皇上聖
鑒訓示施行謹奏

黔省建復昭忠祠並教養忠裔片

雲南巡撫

張亮基

再黔省昭忠祠向係設於南門外數里地方遠在郊坳規模狹隘故近年來員弁兵勇之死事者以千萬計未能一一刊刻牌位送祠附祀且其家屬困苦無依半多流爲乞丐種種傷心慘目莫可名言茲查省城內東北隅堰塘地方有貴陽府入官房屋一所荒廢已久地勢尙寬經臣率同司道籌款捐廉庀材鳩工改造而葺治之卽於大門內因其舊址修理正屋三楹添造東西鑲房各兩間以死事者總木主設於正屋之中其餘陣亡文武官紳各照銜名分書木主安設左右其兵勇團練及殉難婦女不知姓名

者各書其主分別男女列於兩廂仍依春秋二時與昭忠祠一同致祭名之曰慰忠祠又於祠之西偏建房一院前後六層名之曰忠裔所以居死事者窮無所歸之家屬按時籌款資助復於正屋之後設一文館延師以教死事者之子孫名之曰忠裔塾如此變通辦理非特死事者之忠魂毅魄有所憑依卽其家屬子孫均可藉以棲身餬口雖未能博施濟衆而祠中養一忠裔卽城中少一餓孍亦足以彰 聖德而廣 皇仁臣現已委員督工營造不日卽可落成惟慰忠祠之祭祀忠裔所之養育忠裔塾之膏火修金所需甚鉅臣現與署提臣趙德光等籌辦屯

擬查有絕田逆產卽撥作祠中經費其有不敷臣仍當與
司道各官設法籌置選派公正紳董妥爲經理並查黔省
各鄉義學暨尙節堂收幼堂一切善舉向歸糧儲道專管
此次新建慰忠祠亦擬責成該道一體總司其事以免日
久廢墜除俟籌款置產及酌定一切章程辦理就緒後另
行咨部備案外謹附片奏聞伏乞

聖鑒

--	--	--	--	--	--	--	--	--	--	--

提督出後異姓片

兩江總督曾國藩

再江南提督李朝斌本姓王氏襁褓中爲李氏父母撫養教育至於成立迭遭艱虞王氏本生父母隔絕不相聞問李朝斌初不自知爲王氏所生也本年三月間有善化縣人王正儒來臣處稟稱李朝斌係所生子自幼育於李氏請飭復姓歸宗等語臣當卽詢之李朝斌究竟是否有因李朝斌茫然不解卽寄書至家詢其族叔李傅成等始據詳告顛末蓋李朝斌未生以前王氏本生父母已有子三人世俗之見以多子爲累王正儒與李朝斌之父相識故指腹訂定墮地後卽任聽李氏攜去王氏父母固已棄之

如遺也事隔四十三年忽有呈請復姓之議李氏族人謂王氏恩誼已斷寄書詳論極陳不應歸宗之義其言亦頗中肯臣覆加查核此事關係綱常名義未可憑空臆斷查本朝言禮之書尙書秦蕙田所纂五禮通考最爲精核其於異姓爲後之事反復辨論一以原情爲主所引金史張詩一事詩本李氏子育於張氏閱三十年始知之初議歸宗終以張氏無子遂仍其舊秦蕙田稱張詩爲孝今王氏本生之父母有子三人而李氏撫養之父母別無立後正與張詩之事相類伏查定例出嗣之子歸宗亦以所繼父母有無子嗣爲斷若令李朝斌歸宗則在王氏本生之

父母不過於三子之外又增一子而在李氏撫
竟至斬焉不祀撫子者必抱恫於九泉爲子者
畢世核諸古禮參以今律李朝焄應於李氏別
後其撫育之父母而不祭其以上之祖宗於王
婚姻一以報顧復之深恩一以別族屬之大義
之父母則未盡教養自難責以子道該提督天
忍自決臣爲之參酌定議詳晰批示遍諮宗人
兼盡衆論亦已僉同惟以提督大員異姓爲後
立案以昭鄭重而垂久遠用敢詳陳本末上達
伏乞

皇太后

皇上聖鑒謹奏

This image shows a large rectangular area filled with vertical lines, which appears to be a redacted table or a scan artifact. The lines are evenly spaced and run vertically across the entire width of the page. There is no text or data visible within this area.

1172

酌議同文館章程疏

恭親王

竊臣等前因製造機器火器必須講求天文算學議於同文館內添設一館招取滿漢舉人恩拔副歲優貢生前項正途出身之五品以下京外各官考試錄取延聘西人在館教習並聲明一切章程俟奉 旨允准後再行詳細

酌定奏請施行等因於十一月初五日具奏奉 旨依

議欽此欽遵在案臣等伏查此次招考天文算學之議並非矜奇好異震於西人術數之學也蓋以西人製器之法無不由度數而生今中國議欲講求製造輪船機器諸法苟不藉西士爲先導俾講明機巧之原製作之本竊恐師

心自用徒費錢糧無裨於實際是以臣等衡量再三而有此奏論者不察必有以臣等爲不急之務者必有以舍中國去而從西人爲非者甚且有以中國之師法西人爲深可耻者此皆不識時務之論也夫中國之宜謀自強至今而已亟矣識時務者莫不以採西學製洋器爲自強之道疆臣如左宗棠李鴻章等皆能深明其理堅持其說時於奏牘中詳陳之上年李鴻章在上海設立機器局由京營揀派兵弁前往學習近日左宗棠亦請在閩設立藝局選少年穎悟子弟延請洋人教以語言文字算法畫法以爲將來製造輪船機器之本由此以觀是西學之不可不急

爲肄習也固非臣等數人私見矣或謂僱賃輪船購買洋
槍各口均會辦過旣便且省何必爲此勞績不知中國所
當學者固不止輪船鎗礮一事卽以輪船槍礮而論僱買
以應其用計雖便而法終在人講求以得其源法旣明而
用將在我蓋一則權宜之策一則久遠之謀孰得孰失不
待辯而明矣至以舍中法而從西人爲非亦臆說也查西
說之源根實本於中術之天元彼西士目爲東來法特其
人性情縝密善於運思遂能推陳出新擅名海外耳其實
法固中國之法也天文算學如此其餘亦無不如此中國
創其法西人襲之中國儻能駕而上之則在我旣已洞悉

根源遇事不必外求其利益正非淺鮮且西人之術我

聖祖仁皇帝深韙之矣當時列在臺官垂爲時憲兼
容並包 智周無外 本朝掌故亦不宜數典而忘

况六藝之中數居其一古者農夫戍卒皆識天文後世設
爲厲禁知者始鮮我 朝康熙年間特除私習天文之禁
由是人文蔚起天學盛行治經之儒皆兼治數各家著述
考証俱精語曰一物不知儒者之耻士子足不出戶舉目
見天顧不知列宿爲何物亦足羞也卽今日不設此館猶
肄業及之况乎懸的以招哉若夫以師法西人爲耻者其
說尤謬夫天下耻莫耻於不若人查西洋各國數十年來

講求輪船之製互相師法製作日新東洋日本近亦遣人
赴英國學其文字習其象數爲仿造輪船張本不數年後
亦必有成西洋各國雄長海邦各不相下無論矣若夫日
本叢爾國耳尙知發憤爲雄獨中國狃於因循積習不思
振作耻孰甚焉特因期至其人將來或可笑過其人今不
以不如人爲耻而獨以學其人爲耻將安於不如而終不
學遂可雪其耻乎或謂製造乃工匠之事儒者不屑爲之
臣等尤有說焉查周禮考工一記所載皆梓匠輪輿之事
數千百年費序奉爲經術其故何也蓋匠人習其事儒者
明其理理明而用宏焉今日之學學其理也乃儒者格物

致知之事並非強學士大夫以親執藝事也又何疑乎總
之學期適用事貴因時外人之物議雖多當局之權衡宜
定臣等於此籌之熟矣惟是事屬創始立法宜詳大抵欲
嚴課程必須優給廩餼欲期鼓舞必當量予升途謹公同
酌擬章程六條繕呈 御覽恭候 欽定再查翰林

院編修檢討庶吉士等官學問素優差使較簡若令學習
此項天文算學程功必易又進士出身之五品以下京外
各官與舉人五項貢生事同一律應請一併推廣招考以
資博採是否有當伏乞 皇上聖鑒訓示遵行謹奏

一請專取正途人員以資肄習也查天文算術義蘊精深

非夙知勤學用心之人難以漸窺底蘊與專習外洋語言文字之學生不同前議專取舉人恩拔副歲優貢生及由此項出身人員今擬推廣凡翰林院庶吉士編修檢討並五品以下由進士出身之京外各官俾充其選緣該員等研經有素善用心思致力果專程功自易服官者由京外各衙門保送未仕者取具同鄉京官印結及本旗圖片徑赴臣衙門具呈由臣衙門定期試以策論等項考取送館學習其各省保送人員程途遠近不齊難以久候應俟咨送到時陸續考試以免耽延至京外各衙門咨送此項人員務須擇其年在三十以內者方可咨送如有平日講求

天文算學自願來館學習藉資印証以精其業者其年歲亦可不拘

一請飭各員常川駐館以資講習也查成事必由居肆力學務在親師本館留學各員必須朝夕在館講習問難方可積漸見功若朝出暮歸往來蹀躞則晨夕之荒功不少而心思亦因以不專今議在館學習人員無論京外均一概留館住宿飯食由臣衙門備給其出入由該館提調設立號簿隨時登記以便稽查至各本衙門如有應送差使以及考試等事仍准照舊辦理以期兩不相妨

一請按月考試以稽勤惰也查在館學習人員果能專心

致志自可日起有功惟其中勤惰之分亦必隨時考察用
資策勵今議俟該員等學習半年之交按月出題考試一
次由臣等親加校閱分別甲乙優者記功劣者記過功過
分而勤惰見相形之下奮勉益生

一請限年考試以觀成效也查三載考績 朝廷課吏之
方誠以功力積至三年優絀無不立見今議每屆三年舉
行大考一次分別等第高等者立予奏獎並酌量差遣試
用下等者照常學習俟下屆考試再行察看

一請厚給薪水以期專致也查此次留學各員難保無寒
酸之士必須優加體恤乃可冀其用志不紛今議在館各

員除飯食由臣等備給外每月仍各給薪水銀十兩俾資津貼庶內顧無憂而心益專一矣

一請優加獎敘以資鼓勵也查該員等學習三年試居高等足見其平日用心勤苦始終不懈自應格外優獎以爲後之留學者勸今議此項人員均准各按升階格外優保班次以示鼓舞而廣招徠

請同文館無庸招集正途疏

御史 張盛藻

竊臣考堯典授時分命羲和周禮佚司空一篇漢儒補以考工記未聞水火工虞之職俱習鳥火虛昴之文亦未聞天官六屬俱習考工之事我朝頒行憲書一遵

御製數理精蘊不爽毫釐可謂超軼前古矣卽或參用洋人算術不過借西法以印証中法耳近見邸抄總理各國事務衙門請設同文館專用正途科甲人員學習天文算術以爲製造輪船洋鎗之用臚列六條意在專講習考課又恐人之不樂從也乃厚給廩餼優與獎敘以鼓舞之其誘掖獎勸用心苦矣臣愚以爲朝廷命官必用科甲正

途者爲其讀孔孟之書學堯舜之道明體達用規模宏遠也何必令其習爲機巧專明製造輪船洋槍之理乎若以自強而論則 朝廷之強莫如整紀綱明政刑嚴賞罰求賢養民練兵籌餉諸大端臣民之強則惟氣節一端耳 朝廷能養臣民之氣節是以遇有災患之來天下臣民莫不同仇敵愾赴湯蹈火而不辭以之禦災而災可平以之禦寇而寇可滅皆數百年深仁厚澤以堯舜孔孟之道爲教有以培養之也若令正途科甲人員習爲機巧之事又藉升途銀兩以誘之是重名利而輕氣節無氣節安望其有事功哉臣以爲設立專館只宜責成欽天監衙門考取

年少穎悟之天文生算學生送館學習俾西法與中法互相考驗至輪船洋槍則宜令工部遴選精巧工匠或軍營武弁之有心計者令其專心演習傳受其法不必用科甲正途官員肄習其事以養士氣而專責成臣職司獻納未敢以緘默自安惟念此舉於士習人心大有關係可否

飭令在廷諸臣悉心妥議之處伏乞 皇太后

皇上聖鑒訓示謹奏

--	--	--	--	--	--	--	--	--	--

1001

11

同治中興京外奏議約編目錄

卷六

奏陳督臣歷年賢勞疏

江蘇巡撫

何璟

陳已故督臣功績疏

四川總督

吳棠

奏陳統兵大員積勞身故懇

恩賜卹疏

江西巡撫

沈葆楨

奏報統兵大員因傷出缺乞

恩優卹疏

江蘇巡撫

李鴻章

奏報李續宜在籍病故片

湖南巡撫

惲世臨

奏故員政績素著請

飭史館立傳疏

惲世臨

查明趙景賢死事情形疏 會銜 欽差大臣 曾國藩

左宗棠

李鴻章

請 飭史館為故員立傳疏 會銜 閩浙總督 左宗棠

福建巡撫 徐宗幹

表彰循吏疏 四川學政 楊秉璋

請 優卹包村義民疏 浙江巡撫 蔣益澧

請 優獎黎兆棠之母馮氏片 江西巡撫 沈葆楨

奏報河神助順疏 四川總督 駱秉璋

請 旌表年近百齡壽婦疏 直隸總督 李鴻章

請 旌表百齡壽婦疏

兩廣總督 瑞麟

爲朝鮮國王據情轉奏摺

禮部尙書 倭什渾布

虔修真品表

越南國王 阮福時

A large rectangular table with 10 empty columns. A small black square is located in the top right corner of the table area.

--	--	--	--	--	--	--	--	--	--

陳督臣歷年賢勞疏

江蘇巡撫何璟

竊臣於同治十一年二月初六日接據江甯布政使梅啟
照稟稱督臣曾國藩正月廿六日忽患手戰舌強似有中
風之症延醫服藥旋發旋止仍視公事不輟惟醫者診脈
均云心血過虧等情正馳念間旋於初八日接梅啟照續
稟初四日申刻督臣前症復發兼患足麻卽於是日戌刻
出缺已由該司將各印信封存并於初五日將督臣遺摺
由驛馳遞奏明請旨簡放遺缺鈔錄奏稿到臣臣接
閱之下不勝駭異伏念大學士一等毅勇侯兩江總督臣
曾國藩由翰林起家以大考受宣宗成皇帝特達

之知游躋卿貳道光三十年在禮部侍郎任內應

詔陳言屢據讜議忠忱悱惻仰邀

嘉獎咸豐二年

典試江西丁憂回籍旋以粵匪竄陷武昌奉

旨飭

辦團練數年之間迭奉援鄂援皖援江西援浙援蜀之

命無日不在兵間

文宗顯皇帝殊批獎諭鑑

其孤忠十年四月遂以兵部右侍郎

簡授兩江總

督

欽差大臣

皇上踐阼之初倚任愈重同治

元年元旦以克復安慶功

授爲協辦大學士三年六

月以克金陵功

錫封一等毅勇侯其秉性之忠學術

之正悉在

聖明洞鑒之中無俟微臣之覩縷其历年

戰功政績又有督臣自具奏報及創定湘軍營制營規水師馬隊各章程內而容存樞府外而傳布各省亦無俟微臣之表章此次因病出缺想 聖主篤念蓋臣凡

賜卹飾終之典自必渥荷

恩施亦無需微臣之籲告

臣之所不能已於言者臣與曾國藩相從日久相知頗深灼見其立功之偉胥本於進德之勤其生平盡瘁報 國克己省身器識過人堅貞自矢不特今世所罕觀卽方之古賢臣蓋亦未遑多讓請敬爲 聖主陳之咸豐之初

曾國藩以在籍侍郎團練殺賊無尺寸之土地無涓滴之餉源餉之巨者丁漕關稅而職在軍旅不敢越俎以代謀

二
餉之細者勸捐抽釐而身爲客官州縣既不肯奉行百姓亦終難見信概係募勇又不得照綠營之例拔補實缺空有保舉之名而無履任之實名器不屬激厲尤難方其初敗於岳州再挫於九江兵幾不振窮且益堅迨江西困阨之時事勢非順動多觸忤一錢一粟非苦心經營則不能得一弁一勇非苦口訓誡則不能戰於困苦難堪之中立堅忍不拔之志卒能練成勁旅削平逋寇上慰

先

帝在天之靈輔佐

聖世中興之業雖曰疢疾可以成

德術動忍可以增智能而艱難創造之初固不敢自料有今日也逮咸豐十年初膺江督進駐祁門正值蘇常新陷

浙省再淪皖南皖北十室九空人煙稀少軍糧則半菽難
求轉運則一夫難僱自金陵以至徽州八百餘里無處無
賊無日無戰徽州之方陷也休祁大震江楚皆驚或勸移
營江西省城以保餉源或勸移營江干州縣以通糧路而
仍不出江督轄境曾國藩曰吾初次進兵遇險卽退後事
何可言吾去此一步無死所也羣賊旣至晝夜環攻飛礮
再集會國藩手書遺囑帳懸佩刀猶復從容布置不改常
度死守兼旬直待鮑超率霆軍自山外來始以一戰驅賊
出嶺以十餘載稽誅之狂寇曾國藩授錢四年次第蕩平
者由祁門初基不怯有以寒賊膽而壯士氣也咸豐十一

年八月克復安慶同治元年水陸兩軍並江而下沿江兩岸三千里名城要隘皆爲我有其弟曾國荃統得勝之軍直抵雨花臺以瞰金陵左宗棠統楚軍以達浙境李鴻章統淮軍以達滬上皆深入虎穴捷報頻聞夏秋之間兵機遂大順矣乃攻勦甫利而疾疫流行上自蕪湖下至上海無營不病不但守壘無勇幾於炊爨無夫楊岳斌曾國荃鮑超諸統將各抱重病昔之勁兵胥變辱卒蘇浙賊酋方以此時大舉以援金陵圍攻雨花臺四十六晝夜更番不歇南岸則甯國旌德同時喫緊北岸則穎宿蒙亳捻匪出巢正陽壽州苗逆復叛髮賊又由江浦上竄滁和巢含亦

復岌岌可危數年以來辛苦戰爭之土地由尺寸而擴至數百里者深恐一旦潰裂盡隳前功援浙救蘇保江三者又須兼顧時危事亟軍情反覆異議環生有謂金陵進兵太早必致師老餉竭者有謂宜撤金陵之圍以退各路援賊者曾國藩於羣言淆亂之時有三軍不奪之志枕戈卧薪堅忍卓絕卒能以寡禦衆出死入生迨事機大定之後語僚友曰昔人嘗言憂能傷人吾此數月心膽俱碎矣幸賴國家鴻福得以不死然則今日之一病不起蓋其精力爲已瘁矣曾國藩戰勝之跡指不勝屈惟此數年坎坷艱辛當成敗絕續之處持孤注以爭命當危疑震撼之際

每百折而不同蓋其所志所學不以死生常變易也古之名臣謀國效忠惟以人事君爲急會國藩昔官 京朝卽已留心人物出事戎軒尤勤訪察雖一材一藝罔不甄錄而又多方造就以成其材其歷年薦達與平日忠義相切劇者如江忠源羅澤南李續賓劉騰鴻死於戰陳塔齊布李續宜蕭捷三江忠義死於勤勞皆已載諸史傳其幕府賓僚偏裨卒伍由書生而游歷疆圻由末職而游膺重鎮無愧戡亂之選亦錚錚在人耳目無待臣言其苦心孤詣使兵事歷久而不敗人材愈用而不窮者則在以湘勇之矩矱推行於淮化濠泗剛勁之風爲 國家千城之用臣

遠稽史籍唐之李郭亦僅收復兩京宋之韓范亦僅經畧西夏一隅耳我朝武功之盛超軼前代屢次戡定大難然如嘉慶川楚之役蹂躪不過四省康熙三藩之役蹂躪尚止十二省今髮捻回教諸匪蹂躪竟及十七省用兵已及二十年若專恃湘楚一軍與之角逐而無淮軍繼起於其間亦豈能南北分兵次第削平禍亂是其公忠偉畧推賢讓功和衷共濟尤足多者臣昔在軍中每聞談及安慶收復之事輒推功於胡林翼之籌謀多隆阿之苦戰其後金陵克復則又推功諸將而無一語及其弟國荃談及僧親王剿捻之時習勞耐苦輒自謂十分不及一二談及李

鴻章左宗棠一時輩流非言自問不及則日謀畧不如往往形之奏牘見之函札非臣一人之私言也當江皖糜爛之際實仕宦所謂畏途曾國藩不辭盡瘁選拔知兵之員隨時保奏以期同濟艱難厥後大功底定南服承平 朝延延訪殷勤猶復疊奉 諭旨令保封疆將帥曾國藩則奏稱疆吏既有征伐之權不當更分黜陟之柄宜防外重內輕之漸兼杜植黨樹私之端其小心遠慮若此宜其立功之後不自矜伐也曾國藩自督師以來卽有不期生還之志是以經歷危險屹然不可撼誠之至部曲化之手足化之故湘軍陣亡文武官兵可以按冊而稽者多

至萬餘人咸豐八年三河之戰其胞弟曾國華隨李續賓以單騎衝賊死同治元年雨花臺之戰其胞弟曾貞幹於賊退數日勞疾而死可謂一門忠義矣而與諸弟其在軍中任事則督之爭先論功則率之居後蓋深見乎功名之際終始之難常以位高於眾權重於人懷大名不祥之懼故遭非常之 知遇彌切爾位之靖共其平日辦事不分畛域江皖蘇浙兩湖之兵事聯爲一氣兩江糧臺之軍火餉糈又不惜接濟鄰省分應他軍而於節制四省節制三省之 命則堅不敢居不憚一再陳情期於得請而後已蓋時念及報稱之難不敢恃 恩寵之厚也其奉身

清儉一如寒素官中廉俸盡舉以充官中之用未嘗置屋一廛增田一區疏食菲衣自甘淡泊每食不得過四簋男女婚嫁不得過二百金垂爲家訓有唐楊綰宋李沆之遺風而隣軍困窮災民饑饉與夫地方之事則不惜以祿俸之贏餘助公用之不給臣在皖時固稔知之其立身平實不求立異而守之甚嚴持之有恒者一曰不誑語一曰不宴起 朝端之奏報僚屬之咨札親友之函牘就臣所見固未嘗有欺飾矣卽外撫遠人內馭降將亦必推誠布公言皆質實中外遠近皆有以信其爲人之不苟在軍在官夙夜未嘗少懈雖風濤雨晦疾病憂鬱之時率以雞鳴而

起夜分始息蓋數十年如一日也晚年不服珍藥未嘗有
卧疴倚衾之日前在兩江任內討究文書條理精密無不
手訂之章程無不點竄之批牘惟有舌蹇心悸之症不能
多見僚屬前年回任感激 聖恩高厚仍令坐鎮東南

自謂稍卽怠安負疚滋重公餘無客不見見必博訪周諮
殷勤訓勵於僚屬之賢否事理之源委無一不默識於心
人皆服其耄年進德之勤其勉力在此其致病亦在此上
年閱兵回省適臣行抵金陵見其體貌尙如往年而曾國
藩自言精力大衰右目昏曠臣與晤談數次議論公事媿
媿不倦曾勸以節勞省神爲 國自愛不意相距未及兩

月遯病不起實由平日事無鉅細必躬必親殫精竭慮所致兩江官紳士庶聞其溘逝無不同聲太息則其功德及民不可泯也伏乞 天恩准予江南省城建立專祠并

飭於所在立功省分一體建祠以彰忠藎并祈將臣奏章宣付史館以備採擇現在督臣身後之事已經藩司梅啟照等會同伊子曾紀澤妥爲經理查督臣有子二人長卽戶部員外郎曾紀澤次附生曾紀鴻孫二人均幼皆隨侍任所所有兩江總督衙門日行公事除由臣暫委梅啟照代拆代封代行外所遺兩江總督員缺緊要相應請旨迅賜簡放以重職守理合將接據督臣因病出缺

緣由并將其歷年賢勞實跡附呈恭摺由驛五百里馳奏
伏乞 皇太后 皇上聖鑒訓示謹奏

陳已故督臣功蹟疏

四川總督吳棠

竊臣前准湖南撫臣王文韶咨稱奏懇開復已故陝西撫臣劉蓉處分一摺同治十二年十二月十六日內閣奉

上諭前任陝西巡撫劉蓉前因剿賊失利降旨革職茲據王文韶奏劉蓉於本年十月間在籍病故等語該員前在湖南湖北四川陝西等省會著戰功所有前得革職處分着加恩開復欽此欽遵移咨到臣復查王文韶原奏所陳故撫臣劉蓉出處品行及在陝撫任內功績已備舉大略而其戡定蜀難事實猶未詳盡臣博採輿論川中士民至今樂道不置溯自咸豐十一年原任協辦大學士四州

督臣駱秉章由湖南督師援蜀邀劉蓉佐理軍事維時滇匪李泳和巨股踞青神而分股竄擾眉州嘉定雅邛敘瀘等處藍潮鼎巨股由潼川竄攻緜州而分股竄擾江油彰明緜竹安縣梓潼各屬此外如何興順張國富何鴻蟻等分擾川東川南各州縣每股賊眾自數萬至數十萬不等又有勇目盧又能陳祥興等各擁眾數萬或數千縱橫馳突名爲游勇無異於賊蓋全蜀幾無完土楚軍節節進剿先殄何興順股匪於定遠縣遂由順慶進扎潼川劉蓉以賊股雖多而強悍無過李藍二酋能除此二酋則餘賊不足平而用兵次第又宜先解緜州城圍以收聚殲之功然

後鼓行而南以成破竹之勢部署既定遂於是年八月大破藍潮鼎數十萬衆於縣州城圍立解藍逆率餘黨奔縣竹我軍乘勝追擊沿途掃蕩軍威大振劉蓉奉

旨署

理川藩旋蒙實授籌畫軍儲遣撤游勇附省人民始獲安枕次年春間縣竹圍解藍逆授首而粵逆石達開擁衆入蜀川東震驚諸軍分剿石逆上游諸將兵力較單李涇和負岫自固劉蓉乃親詣軍前激勵將士密授機宜不數日而有龍窠場之捷生擒李逆解省正法石逆亦被諸軍擊退川東羣賊張國富周澤湧郭大刀等均以次削平又明年石達開率十餘萬衆由滇入蜀建南大震劉蓉稟商駱

秉章馳往雅州一帶自督諸軍遏其前面密調各土司截其後屢戰俱捷石逆進退無據遂卽就縛十餘年巨憝東南各省蹂躪殆遍而一旦成擒海內同聲稱快計自楚師至蜀前後不過二年滇逆粵逆大小各股次第蕩平不留遺孽全川肅清固由駱秉章調度有方知人善任而軍中機宜多由劉蓉親自指畫績殊偉矣劉蓉自接四川藩司篆至升擢秦撫前後未踰二載始則力請終制繼則陳請開缺心淡榮利而整飭吏治講求軍實倡辦捐釐革除時弊搜訪真才汲汲如不及當同治元年兩浙糜爛時該省撫臣左宗棠移書告急劉蓉立卽籌餉數萬兩詳知湘撫

派在籍知縣楊昌濬募勇湖湘馳援浙省厥後全浙肅清
甚賴此軍之力其規畫宏遠不沾沾於一省而蜀都人士
感戴尤深茲據在籍候補京堂薛煥同各屬紳士以該故
撫功績昭著實堪垂信史而列祀典合詞呈請轉奏前來
合無仰懇 天恩宣付史館並准入祀名宦祠暨附祀
原任協辦大學士四川督臣駱秉章成都專祠以順輿情
而彰蓋績出自 鴻慈理合會同學政臣張之洞合詞
恭摺具奏伏乞 皇上聖鑒訓示謹奏

奏陳統兵大員積勞身故懇

恩賜卹疏

江西巡撫

沈葆楨

竊據卽選道陳鳴志等稟稱前署廣西提督江忠義自青陽解圍後兩肋氣痛由營來江調治沿途服藥罔效舊傷觸發日下血數斗十一月初四日行抵新建縣屬之吳城病故等情臣查江忠義自咸豐三年隨安徽巡撫江忠源轉戰湖北江西安徽等省嗣隨江南提督和春鏖戰廬州桐城之間叠受重傷屢瀕於死咸豐五年七月丁父憂經和春奏留六年克復廬州始得回籍旋經湖南巡撫駱秉章檄隨候補道劉長佑援江八年江西肅清石逆達開將

犯楚乃檄江忠義回楚九年三迎敵楚楚軍併力寶慶乘
虛犯永州衡州長沙大震江忠義連戰破之賊不敢順流
下全楚乃安繼復會戰新甯武岡寶慶南援江華永州西
顧綏甯靖州東防攸縣醴陵崎嶇戎馬間席不暇煖所至
民懷其德賊避其鋒然亦心力俱瘁矣十一年由按察使
銜記名道蒙 恩賞二品頂戴署貴州巡撫遭母喪懇
請終制欽奉 上諭江忠義瀝陳變服受任禮所未安
情詞極爲懇惻不忍盡拂其意勉從所請惟是墨經從戎
古有明訓著仍在湖南本籍帶兵剿賊等因欽此是年石
逆由粵竄楚號十餘萬江忠義以三千餘衆燄破賊於會

同榆樹灣浦市等處賊勢窮蹙乃結湖北來鳳股匪以撓我軍江忠義急擊擒斬二萬餘人克來鳳賊遁入川方石逆擾粵西慶遠距楚遠甚江忠義策其必假道楚西入蜀迭請東南防兵迅速西向議者迂之而賊遂越綏甯而西其生平先識大率類此同治元年黔事亟復援黔七月克天柱奉 旨署理貴州提督湖南巡撫毛鴻賓奏調移剿粵西克修仁殪首逆張高友遂據蓮塘統兵旋楚方蓮塘未克時髮逆犯皖南兩江總督臣曾國藩奏調援皖而毛鴻賓劉長佑奏請留粵十二月二十五日奉 旨署理廣西提督江忠義因赴粵二年春毛鴻賓以皖賊勢益


張江西危急奏請仍飭由江赴皖署兩廣總督臣晏端書
復奏請會剿廣東高州踞逆先後均奉 旨准行中道
諸將請所向江忠義曰陳金岡雖猛烈廣東兵有餘糧他
將力能辦之江西餉絀兵單賊入界者已數十萬萬一不
支南省全局瓦解吾豈可避難就易貽 朝廷憂且江西
吾百戰地父老聞吾旦暮且至昂頭以俟何可負耶乃自
奏請援江前部道員席寶田先發會剿於陶家渡破數十
營軍勢乃振六月大軍抵湖口逼賊而營僞堵王黃文金
率死黨悉力拒之江忠義會諸將出奇抄擊使無所得食
賊十餘萬眾突營戒軍堅持無動伺其懈擊之賊屍枕藉

黃文金被重創黃文金者賊中呼黃老虎最狡悍諸僞王所聽命者也既被創羣賊氣奪遂相率遁江境肅清奉

旨賞穿黃馬褂八月間青陽圍急糧絕統兵馳援惟時自東流之張家灘至青陽城下二百餘里賊營林立聞江忠義至中收鋪之賊萬餘望旗先潰遂距青陽城十五里而軍約席寶田先以精捷營由五溪進得大捷賊以精銳趨五溪江忠義統精捷營深入鳧水竟渡跋涉泥淖中身先士卒分部攀懸崖由賊後破百餘營青陽圍解而太平石埭甯國等處踞逆遂定計降自是積受暑濕病甚乃令所部回住鄱陽屬之石門以扁舟就醫江省抵吳城自知

不起握諸將手曰君等歸營勿以我念我受 恩深重
殺賊未盡死不瞑目君等能繼吾志吾無恨矣問以家事
不答而逝年甫三十出師十有二載左目中槍眇餘創偏
體鱗列左腋右膀有數鉛子未出其克復地方安徽則廬
州江西則臨江撫州崇仁新城廣西則修仁蓮塘貴州則
天柱湖北則來鳳湖南則東安宜章桂陽其餘所保全者
不可勝數治軍嚴而有恩自奉儉約至獎勵有功將士不
惜重賞故所向克敵而家無餘資軍暇則研究圖史於民
生利病刻不去心其將入江也移書於臣曰治賊當清其
源使任封疆勿以吏治爲緩圖天下廓清可立俟也臣伏

念江氏一門迭以忠節顯江忠義戰功最著今復中道而
殞未克竟其才知與不知同聲嗟悼該署提督本由文員
出身可否仰懇 天恩將前署廣西提督江忠義特賜
對品文銜從優 賜卹並予謚法將其生平戰績宣付
史館立傳准於江西省城安徽青陽及本籍地方建立專
祠入城治喪以符民望一子孝貽僅二歲可否加 恩
之處出自逾格 鴻慈除函商督臣將精捷營一軍派
員統領外理合會同協辦大學士兩江總督臣曾國藩恭
摺附驛陳奏並代呈遺摺伏乞 聖鑒謹奏



. 1M

奏報統兵大員因傷出缺乞

恩優卹疏

江蘇巡撫

李鴻章

竊遇缺提奏提督南鎮鎮總兵世襲雲騎尉勃勇巴圖魯程學啟猛攻嘉興府城槍子貫入頭腦既絕復甦昇回醫治漸有轉機經臣迭次奏明在案程學啟自知傷重不肯服藥臣再三慰勸並延請內外科醫士進藥數劑言語神氣稍有清楚臣初二日出省赴楊舍督剿復往看視程學啟言賊雖潰敗勢尚悍眾請飭諸將慎重邀擊又言人才難得恨將死不能為國家驅除殘寇輒哽咽流涕向臣太息臣猶勉以安心調治不必焦急並屬地方官時往照料

迨臣由江陰境內追賊至青陽忽接自信以程學啟日見
危篤頭左偏傷處成洞時有髓流出毒貫喉六日滴水不
入惟神志尙清初九日囑家丁爲穿 御賞黃馬褂望

闕叩頭旋繞室行走數步見案上有茶舉杯而不能下
咽凄然淚下並令其營務處知州韓杰馳赴臣處囑專心
剿賊不及等候反省語不及私臨絕時大呼以事未了

聖恩未報腦漿迸流當於初十日子刻出缺臬司郭柏
蔭督同府縣親視含殮料理後事並據稟報前來臣甫行
抵常州接信之餘不勝悲悼各營將士痛哭失聲江浙遠
近官紳士民無不同聲呼愴伏查程學啟籍隸安徽桐城

遭亂被擄英逆四眼狗欲重用之程學啟以該逆荼毒百姓嘗自逃去爲賊追回拘禁不得脫咸豐十一年四月間今浙江撫臣曾國荃督軍進逼安慶程學啟密赴曾貞幹營中納款曾國荃兄弟見其志趣忠勇迥異尋常降將遂留營帶隊攻剿旋克復安慶省城程學啟之功居多經督臣曾國藩等奏保在案其時臣在安慶熟聞程學啟智勇可任適奉 命赴滬倉卒召募幾不能軍請帶程學啟所部兩營東來曾國藩曾國荃念臣孤行危地無以自立慨然允准同治元年三月臣與程學啟一同至滬五月虹橋之捷八月北新涇之捷十月四江口之捷皆殺賊近萬

大挫兇鋒實賴程學啟多謀善戰以少擊眾威名自此大振臣因爲程學啟陸續增募至萬餘人部署嚴整所向克捷先後克復青浦嘉定太倉鎮洋崑山新陽吳江震澤各州縣二年進逼蘇州蘇州爲羣賊淵藪城大糧多非四萬人不能合圍程學啟以水陸一萬人由葭門外跨塘逐漸進剿苦心經營將城東之寶帶橋五龍橋城北之華口黃埭城西之許關虎邱各處石卡賊壘次第掃平分兵布扎又兩次分隊遠剿嘉興援賊於八折平望一帶又助剿忠逆大股援賊於大橋角望亭一帶又分剿湖州援賊於太湖東山一帶距老營皆六七十里出奇入險賊中怖爲神

兵臣於奏報蘇州克復摺內謂程學啟用兵如神每動一著卽制賊命蓋紀實也十月間收復蘇城降首郅雲官等九人謀踞半城擁眾近二十萬意圖脅制稍一濡思變生肘腋程學啟謂曾在賊中熟知情偽此輩罪孽重大殺散頭目卽可解散保全實多臣故毅然誅其首散其黨蘇城大局頃刻卽定其能謀能斷亦近時武將所罕見戈登聞其死也流涕歎息目爲中國好將向臣索該提督打仗時隨身長旗二件將來攜回本國以爲記念程學啟深心遠畧謀勇精勤爲中外所共知設使天假之年功業詎止於此正月間會國藩商調該軍赴金陵協剿程學啟以進兵

嘉興勢難撤回惟以身受會國荃蒞蒞之恩耿耿圖報與
臣約俟嘉興常州克復當帶炮隊赴金陵隨攻殄此老巢
以酬知遇若程學啟不卽喪亡有益於江皖者甚大今年
甫三十五歲遽因攻克嘉興殞身鋒鏑每念時事多艱將
才不易臣誠私心痛之程學啟無子以嫡姪建勳爲後年
尙幼小惟其攻克安慶後兩年之間又連復江浙名城十
餘處並克復蘇州省城似爲東南第一戰功茲爲國捐軀
可否仰乞 天恩准照提督陣亡例從優賜卹 特
旨予諡宣付史館立傳並於安慶蘇州嘉興各府建立專
祠以彰忠盡出自逾格 鴻施再正繕摺間接奉三月

初九日 恩旨以嘉興克復賞給程學啟白玉翎管一
支白玉搬指一個玉柄小刀一把荷包一對臣卽敬謹派
弁賚送蘇州交程學啟家屬祇領祭告以慰忠魂合併聲
明所有總兵因傷出缺緣由謹會同兩江總督臣曾國藩
具奏伏乞 皇太后 皇上聖鑒謹奏

A table with 13 empty columns. A vertical line is present on the right side, starting from the top row and extending downwards. The table is enclosed in a thick black border.

--	--	--	--	--	--	--	--	--	--	--	--	--

十
九

奏報李續宜在籍病故片

湖南巡撫 惲世臨

再臣接據署湘鄉縣知縣德鈞申稱前任安徽撫臣李續宜於十月二十八日在籍病故據該員家屬呈明轉報前來臣查李續宜由書生帶勇積功洊升湖北巡撫調任安徽巡撫上年七月聞訃丁親母蕭氏憂奏蒙 恩准賞

假百日回籍治喪本年正月百日期滿因患病節次續假

前奉 旨飭催赴營其時卽聞該員病勢日重一日臣

以該員年方四十精力正強安心調理當不難漸次復原

豈意積勞日久病根已深醫藥無功遂以不起伏思該員

十年以來轉戰湘鄂江皖數省屢克名城勲績卓著

十年逆首石達開率黨數十萬竄擾湖南圍攻寶慶府城九十餘日該員從湖北統師回援一戰解圍厥功甚偉其治軍嚴整日以忠義禮讓訓勉士卒身經數百戰未嘗挫失自該員胞兄前浙江布政使李續賓在三河陣亡該員並統其眾與兩江督臣曾國藩湖廣督臣官文及前湖北撫臣胡林翼志同道合毅然以平賊爲己任請假後雖臥病在牀而每聞各路軍情輒以受恩深重不獲力疾赴營爲憾忠憤之氣發於至誠間與友朋書慷慨激昂曾不以患病而稍形疲沓當此盜賊未平需才方切如該員之在營足爲名將在官足爲循吏實屬不可多得之才人

望鄉評同深惋惜相應籲懇

天恩飭部照軍營病故

例從優議卹並請於湖南湖北安徽省城寶慶府城及原籍湘鄉縣城建立專祠其歷年戰績應由湖廣督臣官文兩江督臣曾國藩查明詳奏請旨宣付史館以彰忠

蓋再該員僅有一子甫及十齡尙有父李登勝在堂現年七十三歲應如何加恩之處仰候聖裁除該員遺摺

另由臣專丁代進外謹附片陳奏伏乞

皇太后

皇上聖鑒施行謹奏

--	--	--	--	--	--	--	--	--	--	--

奏故員政績素著請

飭史館立傳疏

湖南巡撫 惲世臨

竊前任通政使嚴正基在籍病故曾經臣咨報吏部在案查嚴正基籍隸溆浦由副榜教習歷官河南奉天州縣江蘇道府咸豐元年奉

旨飭赴廣西軍營存升藩司

內用通政副使旋擢正使咸豐七年以暇疾開缺回籍該員係原任陝西按察使嚴如煜之子少時隨任陝西明習吏事在河南靈寶縣鄭州及奉天復州任內卓著循聲輿情愛戴嗣官常州府知府係臣原籍時臣方供職吏部每聞家鄉來人談及該員署中自官親幕友以及內外僕役

皆恪守職事無一敢爲非者其爲政以誠實不欺爲體以寬嚴交濟爲用故良民懷其德莠民亦畏其威當道光二十九年常州再被水災該員辦理賑撫周詳勤懇事必躬親貧民獲免流亡均霑實惠考其治行實不愧古循吏風規迨引疾家居適值髮逆石達開李復猷土匪張芸蘭等先後肆擾皆逼近溆浦縣境該員捐資倡率邑人練團設防平定條規備禦完固地方倚之爲重而平日絕跡不入城市韋布蕭然無異寒素聞疾甚時遺囑其子嚴咸但諭以世受 國恩當勉爲有體有用之學以圖報效語不及私臣與嚴正基向未晤面稽之輿論驗之鄉評見聞畧

得其真名實允堪相副伏念澄清吏治國家保世之要圖
獎錄賢員亦激勸人才之切務可否仰懇 天恩飭取
該故員歷官政績宣付史館編入循吏傳俾資觀感謹恭
摺具奏伏乞 皇太后 皇上聖鑒謹奏

查明趙景賢死事情形疏 曾國藩 左宗棠 李鴻章
竊臣鴻章於同治元年閏八月初四日接奉同治元年八
月二十二日 寄諭李鴻章另片奏湖州失守情形已
明降諭旨令曾國藩等查明文武下落具奏矣趙景賢被
執不屈大節凜然現當被賊羈禁蘇城仍着該撫隨時密
探情形密奏等因欽此又奉同治元年閏八月十七日

寄諭趙景賢現在是否尙在賊中抑係已經殉難仍著
李鴻章查明並將湖州城內文武下落一併咨會曾國藩
左宗棠查明速奏欽此欽遵分別咨行轉飭查探去後茲
據江蘇候補知府趙炳麟稟稱本年四月初九日有堂姪

孫趙桂生杭人吳姓先後自蘇城賊中逸出到滬稟知堂
姪前布政使銜福建督糧道趙景賢於三月十八日在蘇
城遇害當查死節各情僉稱被執到蘇後該逆誘逼相從
百折不回求死不得自太倉敗賊回蘇播言趙景賢勾結
內應有襲蘇之意僞慕王譚紹光卽於三月十八日設席
招飲酒次相詰曰汝通妖兵耶答以我本官兵何得謂通
汝獻蘇城耶答以蘇本 大清土地何得謂獻又曰汝
今死期至矣景賢仰天大笑曰求之一年而不得者今何
幸也遂肆口謾罵譚逆卽取洋槍對胸一擊而殞連日搜
捕餘黨甚急各等語伏查該故道誓守湖州血戰三年嬰

城固守五月糧盡援絕而陷迨被執到蘇百計誘逼矢志不移卒以身殉遵飭查詢死節情形據實稟報並開具事蹟節畧呈請奏懇

恩卹等情前來臣等查趙景賢係故刑部侍郎趙炳言之子由舉人選授宣平縣教諭改官內閣中書未及供職咸豐三年奉


旨籌辦團練遂專湖防一面之任三解城圍每戰輒數晝夜殺賊動盈萬至不可數計先後奪獲賊船大小千數百號猶以其間分兵四出赴援杭州協剿嘉興並克復安徽廣德州及浙江之長興德清安吉武康孝豐等縣以功累擢至福建糧道咸豐十一年冬杭省再陷四面皆賊湖郡勢成孤注該員

誓以死守賊既屢次受創銜恨入骨覓掘其父趙炳言之
墓而益糾大股合圍困之該員始於太湖大錢口添扎水
師營以通糧運及是冬十二月風雪三日夜湖冰如平地
賊履之而過我師船膠於凍不能戰大錢口爲賊奪踞運
道遂絕猶時時開城出擊奪賊糧以濟食於是賊相戒不
與戰移其糧屯遠處而圍攻益急元年正月初十日臣曾
國藩奉 寄諭垂詢趙景賢能否赴任著酌度情形諭
令辦理臣宗棠暨前江蘇撫臣薛煥亦奉 寄諭密速
設法傳諭該道交代經手事件輕裝赴任各等因時甯廣
節節有賊臣國藩臣宗棠專人前往均由半途折回三月

初三日該道始於圍城中密奉薛煥飭知赴任及賞
加布政使銜之恩旨軍氣復爲一振當是時閩疆喫
緊需才孔亟假使趙景賢遵旨交替湖防自赴新任
誠如恩諭移其捍衛桑梓之才以保障閩疆厥功亦
屬甚偉揆以爲國惜身之義亦使後世無辭而該道感激
益深效死益堅義不忍去密寄帛書至滬與其叔趙炳麟
有衆志成城守死善道之語其素所蓄積可知也自三月
以後糧餉軍火俱盡軍民剝樹皮掘草根以食猶能擒斬
奸細禁止搜掠忍饑耐戰至五月初三日力竭城陷距賊
匪圍城之日已五月有餘從來各處守城未有如此之久

者趙景賢以辦團紳士倡率兵民同心效命可敬可哀臣等遠隔賊巢數百里無路能援負疚徒深城破後趙景賢抽刀自砍被譚逆奪阻執之至蘇賊始則極肆凌辱至批頰流血欲以摧折其盛氣已復謬爲恭敬百計誘脅該道漠不爲動作絕命詩四章有云亂刃交揮處危冠獨坐時又云厚貌徒爲爾孤臣矢靡他偽忠王李秀成有遣之之意致書以漢壽亭侯歸漢爲言景賢答書以爲擬不於倫並有歸我者之知己不如殺我者之尤爲知己先後參証則當時情事宛然可見大義凜凜終能尋約可謂皎然不欺其志者也核其死事顛末洵屬忠貞蓋世無愧完人其

長子深彥年甫十二歲聞湖州之陷痛父情切卽先服毒
自盡湖南撫臣毛鴻賓奏請獎卹次子五人濱彥年十歲
滋彥年七歲其幼者尙在襁褓遠寄湖湘孤苦無依聞景
賢圍在城中及臨終時未嘗以置念也相應詳細陳明請
旨將布政使銜福建督糧道趙景賢交部照布政使
陣亡例從優議卹並請 特旨予諡並於湖州本籍地
方建立專祠其事跡節畧隨摺咨送軍機處請 旨宣
付史館予立特傳以彰忠藎除查明湖州城內文武下落
再行具奏外理合恭摺覆陳謹奏



171

請

飭史館爲故員立傳疏

閩浙總督 左宗棠

福建巡撫

徐宗幹

竊維封建之天下其治亂在諸侯郡縣之天下其治亂在
牧令誠以治民之要必在親民川縣爲字人之官地近情
親謠俗之宜好惡之實易於孚洽也已故署福建按察使
前福建汀漳龍道桂超萬於本年八月二十二日在任病
故業經臣徐宗幹恭疏題報臣宗棠於九月初五日浙江
嚴州營次接桂超萬八月二十二日臨終親筆書稿具言
國恩未報死難瞑目聞嚴州疫癘繁興浙西餘氛未
淨死當竭力相助驅除並言石棟一案奉 旨嚴拿之

俞清音等被匪劫奪必應嚴緝到案質訊以成信讞語不
及私其稿爲臨終親筆囑並附稿緘寄以表誠實臣宗棠
閱其字畫不異平時偶有點竄亦俱端勁想其剛方嚴正
之概爲之涕出不已憶昔道光十七年臣宗棠會試北上
道出欒城偶遊城市見知縣桂所張示諭勸民耕種並示
以種植木棉藷芋之宜以及備荒之策甚爲詳備比詢之
居民皆言合之愛民出於至誠其潔清白矢爲從前清官
所不爲心竊異之比至都中見知好誦之時今雲貴總督
前編修勞崇光前御史黎吉雲爲言桂令名超萬故儒吏
也始知其名厥後桂超萬以保舉受

兩朝知遇洵擢

道員然已篤老矣該員本籍安徽貴池因避亂來閩臣宗
幹諭其賢奏權按察使劾貪舉廉如恐不及臣宗棠接晤
閩中官吏無不憚其剛方而服其公允者其在官時結巨
案數十平反亦多手治官書不假幕吏之手積勞致疾猶
伏案治事不間晝夜身後囊橐蕭然無異寒素臣宗幹實
親見之又奉 旨特發浙江知縣徐臺英一員臣宗棠
在籍時熟聞其宰華容耒陽兩縣廉惠著稱最爲輿情所
愛戴不幸爲長吏所扼志鬱不伸遂告病去爲今四川總
督前湖南巡撫臣駱秉章言之請其咨調駱秉章爲言徐
臺英本同鄉學者在湘作令實著循聲惟其秉性狷介因

不獲於上絕意仕進調必不赴遂爾中止比奉 旨起

用發往浙江臣宗棠乍覩除書幸慰無似本年五月該員
來浙稟到接晤之餘直傾肝膈相與商榷時政深資贊助
乃到浙甫及兩月遽染瘧症病故需材之際惋惜尤深伏
念桂超萬前在直隸徐臺英前在湖南皆以循良著績遺
愛在民其服官之年相去未久可否仰懇 皇上天恩
宣付史館飭令各行直隸湖南詳摭該故員生前政績爲
之編入循良傳以存其人俾天下之爲牧令者有所觀感
謹合詞恭摺具奏伏乞 聖鑒施行謹奏

表彰循吏疏

四川學政 楊秉璋

竊臣伏讀同治二年十一月二十六日內閣奉 上諭

祁寯藻奏弭盜安民必資循吏請分別表章錄用一摺等因欽此仰見我 皇上表彰激揚之至意臣蒞任以來

按臨所至不特事關學校倍切留心卽吏治民生亦復隨時隨地廣諮博訪冀有以副 詔旨而稱採風茲訪聞

已故開歸陳許道劉衡起家牧令洊擢監司由八旗教習報滿分發廣東知縣補新興縣署博羅縣丁艱起服再任四川墊江梁山巴縣知縣升緜州直隸州知州擢保甯成都知府政績卓然循聲丕著去官四十餘年之久民間稱

道弗衰以該故員歷官任內於大堂旁懸有達情鑼一面
令有冤抑者擊之以聞該故員卽出坐堂皇立爲聽治民
用是感之尤深至今劉大鑼之名遂傳播蜀中不置因念
臣前在京師曾見該故員所著庸吏庸言蜀僚問荅讀律
心得治譜於閭閻之休戚風土之因革籌畫詳備言皆可
行而於興利除弊嚴懲衙蠹戒用門丁之道尤三致意焉
卽已心許爲循吏今親蒞其服官之地諗知其治行之詳
名實相符聲施並茂誠如 聖諭所謂循聲卓著遺愛
在民者伏查道光十年該故員初至河南開歸陳許道任
視事甫及一月卽因疾請退歿後數年蜀人思念不忘以

入祀名宦祠請未幾粵東博羅縣紳民亦請將該故員入祀名宦均經該兩省督撫學政前後會銜具題奉 旨

允准各在案固已祀典優崇輿情胥暢矣惟是澤流朱邑固共覘俎豆之馨而化洽文翁尤首列循良之傳竊思該故員以實政及民以仁心立言口碑歷久而彌彰治譜簡易而可守誠使爲守令者皆能如該員之所施設盜賊何患其不靖百姓何患其不安臣職司採訪既深知該故員爲川省循吏曷敢不以上 聞合無仰懇 天恩俯准將該故員事實宣付史館編入循吏列傳以表循良而資觀感再查該故員吏治之餘又精算學著有六九軒算書

五種論者謂其申明古義特出新意於測量四率日晷享
方借根方法旁通曲匱務期以艱難歸諸簡易使人人皆
得其門而入學問溥通有裨後學除將該故員所著有
關吏治之庸吏庸言等書及歷在地方呈請入祀名宦祠各
事跡移咨 國史館查照外所有微臣遵 旨採訪循
吏緣由理合會同兼署督臣崇實合詞恭摺具奏伏乞

皇上聖鑒謹奏

請優卹包村義民疏

浙江巡撫

蔣益澧

竊咸豐十一年十月賊陷諸暨縣城其時浙東兩郡縣大半淪沒包村民包立身一農夫耳慷慨倡義集團禦賊嚮義者爭附之遠近挈眷來依者不下十餘萬人聲勢甚壯賊屢以大股擊之輒敗去誘之降不從賊大怒誓不滅包村不已迨十一月十二日甯波杭州相繼不守同治元年三月侍逆遂糾湖州僞梯王由富陽以攻包村環數十里爲營大有滅此朝食之意包立身屹然不動善以少勝衆相持八九月先後殺賊十數萬人不圖夏旱水涸汲道爲賊所遏兵食不繼賊又截我糧路其時勢已危甚閭村主

客十餘萬人舐糠飲血無一降者七月朔賊用隧道攻之
村陷從戰者悉陣亡男婦老幼均被害立身與妹美英率
親軍數千人殊死戰潰圍出希圖再振至馬面山賊率眾
追之圍數匝鏖戰不得出立身中炮陣亡美英手刃賊數
人知不免遂自刎死立身之父建勳母虞氏嫂任氏王氏
妻虞氏弟媳屠氏妹彩福彩官姪和尚女鳳娥姪女大姑
二姑皆殉難兄立忠立賢弟立潮皆陣亡包氏一門除立
身及妹美英外陣亡殉難男女共十五人計包村殉難官
紳男女統計一萬四千七十七名據省城採訪忠義局查
明具詳前兼署撫臣未及核辦移交前來臣查包立身家

世力農未嘗涵濡詩書習聞古今節義忠孝之事乃逆醜滔天竟能奮不顧身倡義禦賊雖村破家亡而嚮義者一萬數千人斷脰捐軀無一人肯少挫其志者奇節偉行洵足挽末俗頹靡之風而彰盛朝風教之美合無仰懇

天恩俯准飭部從優議卹以慰忠魂而彰節烈所有包村陣亡殉難官紳男女除造冊送部查核一併議卹附祀外理合恭摺具奏伏乞
皇太后
皇上聖鑒訓示

謹奏

請 優獎黎兆棠之母馮氏片

江西巡撫 沈葆楨

再准江忠朝咨稱南安郡城自咸豐年間迭遭寇亂城中
 瓦礫僅存戶不滿百本年八月初十日賊由南雄繞竄冰
 城與南安郡城僅隔一河相望數十步城中鐵字等軍先
 經署知府黎兆棠派防各隘存郡勇丁不敷守堞忠朝在
 楊柳坑聞報懸賞勵士漏夜兼程深慮赴援不及次午抵
 郡見悍賊數千已結筏渡河而城內軍民鎮定如常心竊
 異之訪之紳衿父老僉稱黎兆棠之母馮氏迎養在署賊
 至時黎兆棠一面布置城守一面派親丁護送其母出城
 馮氏叱之曰汝能報國我復何惜今日正當舉家與賊存

亡以固人心作士氣耳黎兆棠遂與同城官紳立軍令狀誓以死守賊凌城黎兆棠親率鄉兵猛擊馮氏出簪環犒士人人感奮賊退後忠朝詢知其守節撫孤備嘗艱苦黎兆棠居官政跡得力於母教者爲多恭讀乾隆四十五年

上諭尙書畢沅之母張氏教子有方能爲國宣勤

賞給張氏經訓克家匾額今黎兆棠之母馮氏身處危城誓死勿去人心爭奮大局幸全求諸歷代巾幗名臣亦難數覩伏念 朝廷激揚忠義凡在行間莫不榮膺

懋賞矧奇節出自閨闈尤爲冠絕一時忠朝雖以武功起家凡于忠孝節義之事可以維人心厚風俗者概不

忍聽其湮沒請予奏獎前來臣覆加查訪馮氏深明大義人無間言而江忠朝自掩其血戰之功以求發人潛德皆熙朝之盛事未敢壅於上聞可否仰乞天恩將黎兆棠之母馮氏優加旌獎以勵風化之處出自

宸裁理合會同協辦大學士兩江總督臣曾國藩閩浙總督臣左宗棠兵部右侍郎臣彭玉麟附片馳奏伏乞聖鑒訓示謹奏

奏報河神助順疏

四川總督 駱秉章

伏查僞翼王石達開上年擁眾自滇邊突竄建昌銳意圖犯腹地經臣調派升任雲南提督唐友耕督率振武軍暨雅州府知府蔡步鍾所帶練勇並漢土各兵分布大渡河據險扼擊惟時正值暮春水勢尚平隨處可以涉淺須至五六月間河水始能漲發儻被該逆徑渡勢既蔓延撲滅非易乃石逆于三月二十七日甫抵河干是夜大雨滂沱次日河水陡漲十餘丈波濤洶湧並松林小河亦成巨浸詢之士人向來三四月間從未見此盛漲石逆每欲扎筏滄渡被我軍槍炮轟擊賊筏入水輒覆限於巨流不得狂

暹大兵四面逼促該逆遂困於柴竹地食盡路絕渠魁就縛餘逆殲除該逆就擒之後水勢仍復消落衆目共睹無不傳以爲異竊惟此役成功之速雖屬將士用命而仰仗天威神靈助順河水陡漲確有明証溯查大渡河發源岷山之陽一曰陽江流經大坪魚通各土司境內至打箭爐東之瓦斯溝與旄牛繳外柘拔海之瀘水合流經瀘定橋下滙衆流夾山澗曲折而南至青溪之大樹堡始能問渡復經野美境內東至嘉定府滙於大江源遠流長實爲西南巨壘雖考諸志乘其神無與可稽而捍患禦災有功于民則祀之况洪波助勢俾賊技漸窮翊贊聖功

削平巨寇既昭靈顯允宜崇報應請 飭部議加大渡

河神封號建立專祠列入祀典並懇頒賜 御書匾額

敬謹懸挂以揚國威而顯神蹟再聞雅州府西之化安坪
向祀金華神其年代姓氏皆無可考前次滇匪圍攻雅州
嘉定兩城皆著靈應據所擒賊供攻城之際皆見神兵默
助當卽駭潰城圍立解土民奉祀益虔據該府具詳請奏
前來應請 賜加封號附祀大渡河神祠用以俯順輿
情是否有當理合恭摺具奏伏乞 皇上聖鑒訓示施
行謹奏

請

旌表年近百齡壽婦疏

直隸總督

李鴻章

竊據保定府紳士候選知府內閣中書張其濬等呈稱新城縣同知銜歸班銓選知縣道光戊戌科第一名進士王振綱之母王杜氏現年九十四歲逮事振綱之曾祖謙及其祖允恭有孫五人長名鑑中式舉人次名鏗癸酉拔貢曾孫十一人長名樹枏庚午優貢元孫二人委係親見七代五世同堂由該紳士等聯名具稟開具譜系圖結呈請奏懇
旌表並據府縣轉詳前來臣覆加查核壽婦王杜氏柔嘉維則淑慎其儀珩璜徵四德之全型昭象服雨露沐
五朝之盛慶衍鳩扶溯井臼之習勤逮奉重

闈濬隨隔紗幘而受業親看累葉科名萊子承歡婦孺咸
欣舞綵桐孫競秀曾元並見含飴在里閭久播爲美談惟
盛世迺覩茲嘉應王振綱現經臣延請主講省城蓮
池書院殫心課士白髮娛親祝壽母于期頤備人倫之師
表緬引年之 曠典宜籲 天恩光孝治于近畿益
彰人瑞除圖結送部外理合恭摺具奏伏乞 皇太
后 皇上聖鑒訓示

請

旌表百齡壽婦疏

大學士兩廣總督

瑞

麟

竊查定例壽民壽婦年屆百歲五世同堂請

旨賞給

銀兩緞疋又滿洲漢人三品以上文武大員之父母妻室
有年屆百齡親見七代或未屆百齡五世同堂例得建坊
給匾者請 旨飭交內閣戶擬字樣進呈 欽定以

昭優寵等因茲據廣東布政使鄧廷枏詳據補用道候補
知府聶永等稟報有同鄉記名總兵現任廣東赤溪協副
將周鳳山奏留湖北補用副將周岐山之母周陳氏係湖
南永州府道州人生於乾隆三十七年計至同治十年得
年一百歲生子二人孫三人曾孫二人元孫一人親見七

代五世同堂理合繪具宗圖造冊加結呈請 旌表等

情由司覆核轉詳前來臣覆查該壽婦周陳氏秉性溫柔
宜家宜室持躬淑慎以孝以慈奉色笑於重闈譽傳族里
啟嘉祥于後嗣慶集曾元壽享期頤歷 聖世五朝之
歲月 恩承綸綍荷冠裳一品之光榮宜沐 旌揚
以彰人瑞除將宗圖冊結送部查核並咨湖南撫臣查照
外謹恭摺具奏伏乞 皇太后 皇上聖鑒

爲朝鮮國王據情轉奏疏

禮部尙書

倭什渾布

據朝鮮國王李昇差陪臣判中樞府事尹致秀等齎到奏本一件乞爲代奏臣等查閱情詞係因該國王國祖康獻王系出新羅司空翰十七傳至安社入仕元朝曾孫子春仕高麗爲朔方道萬戶是生康獻王父子俱著勛勩及王氏政亂其國祖功德漸茂請命受封立國之後贍王瑤子別邨以終天年與李仁任卽李仁人者族貫殊別近見康熙年間鄭元慶所撰廿一史約編記其國主先系及立國事實訛悞謬悖罔有紀極五內痛寃因此瀝陳始末並援引乾隆年間奏請刪改皇明通紀明紀輯畧二書成案懇

恩刊正等因臣等伏讀

欽定明史朝鮮列傳

該國王先系之源流受封之事跡既已明晰而與李仁人
實非同族在明時辨正至再至三我朝康熙雍正年間

諭修明史至乾隆四年告成經

列聖欽定

于該國歷次辨雪之言無不一一備載仰見

睿裁

折衷至當久已頒行天下中外皆知今該國王所稱近見
鄭元慶所撰廿一史約編所記多謬此在明史未修之前
村塾綴輯之士見聞未確不免仍沿明初之訛及明史既
定之後千秋徵信更無疑義又查大清會典內載乾隆三
十六年議准朝鮮國王奏稱有朱璘所撰明紀輯畧載其

先世之事本于明人陳建通記因訛襲謬請刊正書中有
關該國者查二書在中國久已不行無所容其改削有原
奉 特頒傳自當欽遵刊布使其子孫臣庶咸知信
從至該國或尙有流傳二書之處令自行查禁等語茲所
稱廿一史約編上不見收于中秘下不見重于儒林歷年
久遠梨棗就湮並非通行書籍無庸更爲刪定惟該國王
恪守藩封善承先緒因見坊書所載世系多誣陳顛

天朝力求刊正情詞肫摯具見篤念本根事求實是應請
飭下各省學政通行各學查明曉諭凡該國事實應以

欽定明史爲正如有前項書籍播流士林其中訛載

該國王之事不得接據以歸畫一用示我
皇上柔懷
藩服酌理準情一秉大公至意謹抄錄該國王原奏恭呈

御覽伏乞
皇上聖鑒

虔修貢品表

越南國王

阮福時

越南國王臣阮福時稽首頓首謹奏爲恭值貢期虔修旅
筐事臣仰荷 天朝封植世列職方經奉 酌定貢

例四年一次永爲成式自咸豐七年丁巳十一年辛酉暨

同治元年乙丑已經三屆正貢節奉咨問廣西撫部院轉

達嗣接咨到均奉 諭準暫行展緩仍照開年己巳又

屆貢期再奉具由咨明廣西撫部院代爲問達嗣接照會

公文內敘現經據情具奏欽奉 諭準依期入貢以遂

其愛戴之忱定於同治七年八月初一日開關等因臣聞

命之下頂戴惟虔竊思周服奠維全資安勸夏廷述

職係奉典常上屆屢蒙准展迄今修貢始獲來庭幸少慰
下國積年之忱悃臣恪遵候度遙望 天闡謹將開年
己巳與前屆丁巳辛酉乙丑該四年貢品交陪臣黎峻等
一併齎遞欽候 恩准賞收除另具表文上進外謹奉
具事奏聞伏候 聖聰洞鑒謹奏

同治中興京外奏議約編目錄

卷七

籌議練軍事宜疏

欽差大臣 曾國藩

通籌滇黔大局疏

曾國藩

八旗界址不勻疏

少詹桂 清

江南北無庸分省疏

欽差大臣 曾國藩

約議江蘇水師事宜疏

曾國藩

會議長江水師營制疏

曾國藩

詳酌水師事宜疏

兵部侍郎 彭玉麟

水師不兼習弓箭片

彭玉麟

新設皖南鎮標營制疏

兩江總督 李宗義

請變通武職選補章程疏

廣西巡撫 張凱嵩

請武職停止報捐疏

福建巡撫 徐宗幹 未刻

陸營借補小缺疏

欽差大臣 曾國藩

請整頓駐京提塘疏

御史 劉慶

籌議練軍事宜疏

直隸總督 曾國藩

竊臣去年十月初六日在江南接奉

寄諭直隸營務

久經廢弛前經總理各國事務衙門會同戶部兵部議定
選練六軍誠以根本重地當爲自強之謀迨捻匪北竄直
隸官兵打仗仍不得力雖云訓練未精然國家歲糜鉅萬
帑金養此無用之兵實堪痛恨此時賊匪旣平亟應將前
定練軍章程從新整頓會國藩久諳戎事應如何因時通
變之處著於到任後詳慎妥籌悉心經理務期化弱爲強
一洗從前積弊以衛畿疆儻因直境甫就收平毗連東豫
一帶應督撥勇隊以資彈壓一併由該督斟酌奏明辦理

曾國藩未到以前官文務飭各員弁照常訓練不得稍有懈弛神機營原摺均著抄給閱看等因欽此迨臣臘正兩月展覲 天顏仰蒙 聖訓周詳亦以直隸練軍爲

要務臣於二月抵任檢閱六軍案卷見內外臣工章奏於直隸不宜屯留客勇一節言之詳矣當此全境救平若留大枝勇隊駐於近畿窮年累月剿無可剿防無可防不特於居民難期和洽卽於事勢亦同贅疣是以諸臣之議多主練兵而不主養勇惟養勇雖非長策而東南募勇多年其中亦儘有良法美意爲此間練軍所當參用者臣請略言數端一曰文法宜簡勇丁帕首短衣樸誠耐苦但講實

際不事虛文營規只有數條此外別無文告管轄只論差
事不甚計較官階而挖濠築壘刻日而告成運米搬柴崇
朝而集事兵則編籍入伍伺應差使講求儀節卽有一種
在官人役氣象及其出征則行路須用官車扎營須用民
夫油滑偷惰積習使然而前此所定練軍規條至一百五
十餘條之多雖士大夫不能驟通而全記文法太煩官氣
太重此當叅用勇營之意者也一曰事權宜專一營之權
全付營官統領不爲遙制一軍之權全付統領大帥不爲
遙制統領或欲招軍買馬儲糧製械黜陟將弁防剿進止
大帥有求必應從不掣肘近年江楚大將爲統領時卽能

大展其才縱橫如意皆由事權歸一之故今直隸六軍統領迭次更換所部營哨文武各官皆總督派撥前往下有翼長分其任上有總督攬其全統領並無進退人才綜管餉項之權一旦驅之赴敵羣下豈肯用命加以總理衙門戶部兵部層層鈐制雖良將亦瞻前顧後莫敢放膽任事又焉能盡其所長此亦當參用勇營之意者也一曰情意宜洽勇營之制營官由統領挑選哨弁由營官挑選什長由哨弁挑選勇丁由什長挑選譬之木焉統領如根由根而生幹生枝生葉皆一氣所貫通是以勇糧雖出自公款而勇丁感營官挑選之意皆若受其私惠平日既有恩誼

相孚臨陣自能患難相顧今練軍之兵離其本營本汛調入新哨新隊其挑取多由本營主政新練之營官不能操去取之權而又別無優待親兵獎拔健卒之柄上下隔閡情意全不相聯緩急豈可深恃此雖欲參用勇營之意而勢有所不能者也又聞各營練兵皆有冒名頂替之弊防不勝防蓋兵丁之常態口分不足以自給每兼以小貿營生手藝營生以補事畜之資此各省所同也直隸六軍以此處之兵調至他處訓練其練餉二兩四錢在練營支領其底餉一兩五錢仍在本營支領兵丁不願離鄉往往正身仍留本處特於練營左近僱人頂替應點應操少分練

軍所加之餉給與受僱冒名之人一遇有事調使遠征受僱者又不肯行別又轉僱乞丐窮民代往兵止一名人已三變練兵十人替者過半尙安望其得力耶臣兩月以來博採衆論參以愚見就目前練軍之規模卽使力加整頓亦難遽化弱爲強將欲倚爲干城備禦強寇殊無把握今當講求變通之方自須先杜頂替之弊擬令嗣後一兵挑入練軍卽將本營額缺裁去練軍增一兵底營卽減一兵無論底餉練餉均歸一處支放或因事斥革卽由練營募補底營不得干預冀所練者皆爲正身或可少變積習此外尙有須酌改者如馬隊不應雜於步隊各哨之內應另


立馬隊營使臨敵不至溷亂一隊不應增至二十五人應仍爲什人一隊使士卒易知易從若此之類臣本擬定一簡明章程重整練軍練足萬人以副 朝廷殷勤訓飭之意乃近者節逾夏至亢旱如故二麥業已歉收秋禾多未播種深恐歲饑民困藩庫入款太減不能不長慮卻顧暫緩興辦查直隸司庫本屬入不敷出同治六七兩年收數尤少而欠發各款除京協各餉及文職應領之款共欠一百五十餘萬外專就本省武營言之欠發綠營及騎防俸薪養廉三十二萬餘兩欠發兵餉二百七十餘萬兩欠發米折及公費銀十三萬餘兩近來武營俸餉本僅支五

折七折八折不等既折之後又欠發三百餘萬是以各將士紛紛訴苦衣食無資辦公無費卽令六軍選練極精而各底營存餘之兵已廢弛不可救藥矣通盤籌算本省可指之銀斷不能撥濟練軍之餉若於現存四千人之外增練六千或八千人仍須由部另撥的餉二萬兩按月解直乃可應手久辦徐圖功效其未挑入練者各底營存餘之兵亦須略爲料理未可聽其困窮敗壞臣擬略倣浙江減兵增餉之法不必大減兵額但將老弱者汰而不補病故者闕而不補卽以所節之餉項量發歷年之欠款俾各營微有公費添製器械旗幟之屬庶足壯觀瞻而作士氣數

年之後或將五折七折八折者全數賞發兵丁之入練軍者所得固優卽留底營者亦足自贍營務或可漸有起色而畿輔練兵之議亦不至屢作屢輟事同兒戲至騰出裁兵所省之餉彌補練軍所增之餉多寡尙難預定要亦少有裨益是否有當請 旨敕下原議各衙門核議施行所有遵 旨籌議直隸練軍緣由恭摺復奏伏乞

皇太后

皇上聖鑒訓示謹奏



3

546

通籌滇黔大局疏

欽差大臣 曾國藩

竊臣查滇省於天下爲最遠黔省於天下爲最貧當此事局糜爛之餘實有鞭長莫及之勢然 聖主紹承大統雖在新疆萬里之外猶且尺土在所必爭一民在所必救况滇黔尙屬內地豈得不力圖遠略規復舊基自古行軍之道不一而進兵必有根本之地籌餉必有責成之人故言謀江南者必以上游爲本謀西域者必以關內爲本理有固然古今不易臣愚謂謀滇當以蜀爲本卽以籌餉責之四川總督謀黔當以湘爲本卽以籌餉責之湖南巡撫蜀之南多與滇鄰湘之西多與黔鄰進剿卽所以自防勢


有不得已者義亦不得而辭惟既令其專謀一方則不能兼顧他省試就湖南言之近年西剿貴州東防江西本省之兵爲數不少而又有東征一局以巨款解濟皖吳此外又有滇捐之局黔捐之局江西捐局浙江捐局各處之籌餉愈多則本省之進款愈少斷不能大有所爲上年憚世臨派周洪印戈鑑等進剿貴州連克古州都江上江天柱四城黔民已有來蘇之望當時若能乘勢進取北剿鎮遠南攻都勻即可與貴陽省城通氣勞崇光等亦不至坐困若此因湖南餉項無幾憚世臨不敢募勇添營大舉深入致負黔人之望今 皇上慨然遠慮思出黔民於水火

飭臣與李鴻章妥爲區畫新任撫臣李瀚章本在臣營六年之久又係李鴻章之胞兄金陵回湘之將蘇軍得力之員多與李瀚章相知相信若令選將練兵專圖黔事必可次第奏功但東征局旣裁之後只能酌添本省之釐以濟平黔之餉不能多供甘肅更不能分濟雲南謀一則情專餉分則力薄此謀黔之一說也又就四川論之近年肅清本省協濟外省亦已悉索敝賦杼軸久空成都去滇省近三千里萬山叢雜兵多則糧運極艱兵少則回匪難制卽竭蜀力以圖雲南尙恐無濟又況川北之保甯龍安須以重兵防甘肅之賊川南之酉陽瀘州須以重兵防貴州之

賊其勢不能專事滇境而盡棄他處
四川相距稍近昭通東川二府康熙以
年間始隸雲南 皇上不忍棄滇臣
下手之方儻使四川督臣能兼督辦滇
赴敘州駐札半年調度一切每月專餼
林鴻年進扎昭東庶幾有恃無恐而方
滇者去其有往無歸之懼乃可鼓其
之後果能於昭東立定腳跟修明政
之不棄遐陬信撫臣之足資保障相
法然後開銅廠以興鼓鑄造戰船以

局此又謀滇之一說也臣亦知湘蜀兩省物力有限然非
湖南節節進剿則守黔省者將因援盡而終陷非四川月
月饋運則進昭通者將因糧絕而仍退後此愈難措手矣
張亮基欲徵兵於蘇皖林鴻年欲分餉於長沙其用心良
苦而其成效難期儻蒙 皇上俯采臣言以黔事責之
湘撫以滇事責之川督則甘肅之餉應責成江蘇江西浙
江湖北四省臣等均不敢有所推諉所有遵 旨通籌
滇黔軍務緣由謹繕摺由驛五百里覆奏伏乞 皇

太后 皇上聖鑒訓示謹奏



--	--	--	--	--	--	--	--	--	--	--

八旗界址不勻疏

少詹事 桂 清

竊維設城以衛民全賴畫地以相守况京城爲根本重地尤宜界址分明巡查周密方足以壯聲威而弭奸宄臣前於咸豐十年八月奉命管帶正紅旗官兵上城防守目覩西面正紅鑲紅與東面正白鑲白四旗分守地界遠近不一而南面之正藍鑲藍北面之正黃鑲黃四旗分守地界遠近尤爲懸絕各旗所派官兵數目多寡相同界遠者兵以分而見少其勢較單界近者兵以合而過密其形易擾彼時因防守喫緊未敢妄議更張竊意 國朝定制事事合宜而城守大端必不至如此簡畧撤防後遂徧加查訪

留意講求乃悉八旗通志內載八旗界址本極明晰嗣因道光五年十二月八旗會議城上該班章程曾經繪有城圖分存各旗衙署臣詳加披閱及參考所定章程其意專爲禁止閑雜人等私行上城而設故於各馬道口可以上下城之處安設堆撥卽爲各旗分界而於各城相距里數及八旗方位概未計及是以前歲官兵防守奉爲定章明知遠近不勻於防衛之道未盡合宜而一時拘於成案莫可如何伏思 國初所定旗色方位實寓五行相勝之理具有深心而道光五年所定章程統以馬道口爲斷以致東面鑲白西面鑲紅侵入南面兩藍旗界內而北面兩黃

旗東則侵入正白旗西則侵入正紅旗界內撓越參差顯
違舊制無論分兵防守疎密不齊難期周備卽平日該班
兩藍旗則偏處一方其餘六旗則鞭長莫及似於防衛值
班均有窒礙現當整飭城守之際自宜先爲劃明界址以
期責有攸歸臣謹將各城相距里數核計明晰仍按八旗
通志所載方位量爲變通酌定界址繪具圖說恭呈

御覽可否

欽派大臣查勘更定之處出自

聖裁

如果可行卽於勘定後各按八旗交界處所詳細勒石以
期永遠遵行免致日久含混其道光五年所定查城大臣
各旗叅領輪流稽查及掌管鎖鑰製備腰牌啟閉柵欄時

刻各章程實已詳明周到不容再議更張無如廢弛日久
竟成紙上空談深爲可惜應請 飭下八旗都統於勘定
界址後遵照道光五年所定章程實力奉行不得視爲具
文至城上堆撥年久失修大半坍塌傾圮官兵無所栖止
勢難責以常川住宿前因職官墜城盜賊分贓各案迭奉
嚴諭諳諳力挽積習迄今未見改觀未必不由於此
應請一併責令各該旗設法修補以資栖止如此按照定
章嚴加整頓於防衛值班均有裨益臣愚昧之見伏乞

聖鑒謹奏

江南北無庸分省片

兩江總督 曾國藩

恭奉

諭旨據御史陳廷經條陳善後事宜內疆輿略

爲變通一條臣查蘇皖未分之時跨江淮而爲省古人經畫疆里具有深意我朝聖君賢相未嘗輕議更張

若必畫江而分南北兩省則亦宜畫淮而分南北兩界淮
北如蘇之徐州皖之潁州將割隸何省乎唐之十道宋之
十五路其於江南江北皆截然分而爲二與該御史所奏
大指略同然唐自中興以後聲教不行於河北宋自中興
以後號令並不行於江北畫疆太明未必果能久安論形
勢控扼之道守江南者必須先固淮甸棄淮則江南不可

保昔人如吳師道胡安國楊萬里暨趙范葉適輩言之詳矣臣愚以爲疆吏苟賢則雖跨江跨淮而無損於軍事吏事之興疆吏苟不賢則雖畫江分治而無補於軍事吏治之廢此等大政似不必輕改成憲區區愚見未審有當萬一否

酌議江蘇水師事宜疏

兩江總督 曾國藩

竊臣擬酌改江南外海水師營制業於本年四月初七日附片陳奏大概在案伏思釐定新章必須參稽舊制查中樞政考所載江南水師向分海內河兩支外海兵六千七百七十六名官一百一十八員內河兵八千零二十一名官一百三十三員其船數則無可稽考道光二十四年前督臣璧昌奏稱江南舊例營船二百七十五隻業已破廢不堪另造舢板船一百三十五號大船船十二號等語約而計之其船不過裝載二千數百人額定之兵尙有萬餘人無船可載有水師之名無舟楫之實不能不大爲變

通講求實際竊謂水師之多少宜以船隻之多少爲斷無
船則兵無用武之地官爲虛設之員欲定水兵之額數必
先籌口糧之入款兼籌修船之經費卽如外海船隻須用
廣艇紅單拖舂之類每造一號動費數千金夾底者或萬
餘金加以大小修整繩索損具子藥礮械所費更爲不貲
上而火輪兵船用款尤鉅下而舳板小艇需費亦繁竭江
蘇之物力不過辦船百餘號裝兵三千餘人而止其不能
不大裁舊制之兵酌減舊設之官者勢也至於養兵之餉
舊制水師亦照綠營之例有馬糧戰糧守糧等名目平日
或小買營生或手藝餬口尙不足以自存今旣責令常住

船上不得不稍從優厚故長江章程兵糧月支二兩七錢或三兩不等較戰糧已加一倍較守糧幾加二倍今議江蘇水師亦宜仿照長江之例外海則尙須畧增自軍興以來綠營之兵無功各省之勇著績兵丁亦頗以平素餉薄爲辭今欲一兵收一兵之用不能不酌增口分者亦勢也惟旣增出款卽須籌畫入款長江之餉五省各留釐卡一處係出於常賦之外臣尙以太多爲慮江蘇水師則經費出自司庫斷不能於正額之外添出無着之餉尤不可狃抽釐之說留一永遠之卡溯查乾隆四十七年增兵六萬有奇其時大學士阿桂上疏陳論以爲國家經費驟加不

十一
覺其多歲支則難爲繼臣國藩於咸豐元年在侍郎任內
奏請裁兵卽引伸其言歎爲遠慮今日整理水師豈肯盡
背前言江蘇水師嘉慶道光年間每歲用銀若干蘇省無
案可稽此時約略計算總不欲使新章之銀浮於舊制之
外如其不敷更須酌裁陸兵以補救之不獨江蘇爲然也
卽沿海各省整頓水師均須核算餉項如使新餉果浮於
原數卽應兼裁陸兵以酌濟水餉蓋水師久無戰船非修
造兩三年不能集事陸路縱缺額兵苟募勇兩三月卽可
成軍陸路則有事招勇無事裁撤水路則製器於多年取
用於一旦權衡緩急海疆似以水營爲重其他省之但有

陸兵並無水師者縱不遽議裁撤趁此中原大定之際亦可將出缺之弁兵緩至二十年後再議募補將來重募之日儘可做浙江之例大減額兵酌加口糧此又因節省經費而兼籌陸營之計也謹議江蘇水師事宜十四條營制十六條繕具清摺恭呈 御覽伏乞 敕下各衙門詳細會議歸於至當凡疆臣奏事每畏部臣駁詰亦古來之恒情獨至此等大政則不畏駁詰且惟恐其不駁惟恐其少駁目前多一詰難日後少一愆尤不特求部臣再三駁詰卽江蘇前後各任如協辦大學士湖廣督臣李鴻章在蘇省用兵最久洞悉水陸情形兩江督臣馬新貽在浙江

辦理減兵事件講求已熟江蘇撫臣丁日昌素有捍禦外洋之志並請 敕下李鴻章馬新貽丁日昌各抒所見將江蘇水師船政妥爲核議務使外防與內盜並謀舊制與新章兼顧臣雖離兩江儻有所見仍當續行陳議期於利多弊少不特江蘇爲然卽長江水師亦乞 敕下沿江五省督撫隨時察看如有不妥之處三年以內儘可奏明斟酌損益臣斷不因係初議之人稍存迴護之見臣之微意不過欲使中國兵勇以舟楫爲室家以海洋爲坦道庶幾事以屢試而漸精人以狎水而漸壯至於船式如何而後善營制如何而後強自當博採羣言不敢畧執成見也一

俟江蘇水師定章後沿海閩粵各省均可參酌辦理大局
幸甚所有酌議江蘇水師事宜緣由謹會同兩江督臣馬
新貽江蘇撫臣丁日昌恭摺具奏伏乞

皇太后

皇上聖鑒訓示謹奏

--	--	--	--	--	--	--	--	--	--	--

111

566

會議長江水師營制疏

欽差大臣 曾國藩

竊臣曾國藩同治元年二月覆奏安徽省城仍建安慶案
內請專設長江水師提督及總兵以下各官奉 旨交
軍機大臣會同該部議奏旋經吏部等於五月二十三日
定議具奏准其設立長江水師而於總兵副參以至千把
應設幾缺暨分汛修艦各事宜令臣體察情形再行詳核
議奏三年四月奉 旨以淮揚鎮總兵黃翼升補授長
江提督之缺六月克復金陵濱江五省戰事大定即應將
前募之水勇改爲經制之水兵核定章程會議具奏特以
勇丁之口糧較多額兵之口糧極少相去懸絕難於酌中

定議展轉籌思是以覆奏稍遲臣曾國藩於咸豐二年冬初招鄉勇維時長沙甫經解圍各路兵勇往來湖南絡繹不絕臣徧查向章參差不齊惟張國樑之勇每月五兩四錢江忠源之勇每月四兩五錢該兩軍最爲有名於時逮三年夏間勝保奏請招募陸勇月餉四兩五錢戶部議准江南大營循而行之遂定爲報銷之常例臣於三年冬間招募水陸兩軍陸勇酌減爲每月四兩四錢而親兵什長稍有增加水勇酌減爲每月三兩六錢而礮手舵工稍有增加厥後銀價日賤米價日昂咸豐十一年楊載福等請將水勇每月加爲三兩九錢至今未改臣復詳加詢訪除

山東河南餉章漸少外其餘楚閩浙等十省勇餉均係四兩有奇目下各路招募陸勇紛紛未已若將軍餉驟爲大減則人皆去爲陸勇誰願復充水兵故臣所議章程於兵餉一案暫從其優俟軍務告竣再行酌量覈減審時度勢有不能不出於此者非敢與陸勇戰守糧額故示懸殊也自古養兵本無善政南宋之括財晚明之增餉皆爲兵多所累識者病之我朝綠營兵丁五十餘萬較之宋明已極少然乾隆四十六年議增缺額名糧大學士阿桂曾上疏力爭臣國藩亦於咸豐元年疏請裁兵五萬戶部初未議准後乃通行各省酌辦溯自洪楊倡亂捻回繼變軍興

十餘年惟向榮和春大營用兵稍多其餘皆倚勇丁以集事 國家養兵之費歲逾二十萬當此多事之秋乃未聞綠營立一奇功出一良將今各省勇丁合計約在三十萬以外而昔年經制之兵仍未能議裁減且守戰各兵在營之坐糧雖少而出征外省加以鹽折夫價餘丁等欸每兵一名月支亦在五兩上下平日有糧少之名臨事無省費之實百年受養兵之累臨急無破寇之效統籌全局殊非長策臣愚以爲軍務全竣後仍當綜覈名實裁減陸兵其必不可裁者卽當增加口糧此又因今日設立水營而卽預爲異日陸營之地也謹議事宜三十條營制三十四條

分繕二摺恭呈

御覽計戰船七百七十四號除提督

已頒關防外新設總兵四員撥出兼隸之總兵一員副叅游三項營官二十四員都守千把外委等哨官七十四員兵數一萬二千餘人兵餉船價廉俸雜費修艦之費約計每月五萬有餘邊將練兵餉項捕務暨考覈教演之設莫不嚴定章程冀垂令典請 旨飭下軍機大臣會同吏戶兵工等部暨總理衙門核議施行所有會議長江水師營制事宜緣由謹會同漕運督臣吳棠護江蘇巡撫臣劉郁膏安徽巡撫臣喬松年江西巡撫臣劉坤一湖北巡撫臣鄭畝謹湖南巡撫臣李瀚章恭摺由驛具奏伏乞

皇太后

皇上聖鑒訓示

詳酌水師事宜疏

兵部侍郎

彭玉麟

竊臣奉 命查閱長江水師所有參劾各員及應補各缺業經會同各督撫隨時具奏外臣慙直愚昧以一介書生隨同前大學士臣曾國藩從事戎行十有餘年自維才識迂疏生平未嘗學問於古人馭將治兵之道未能窺見一二徒恃一味樸誠激勵士卒以此稍得其力倖立戰功茲奉 簡命查閱長江仰維 聖慮實欲整頓江防爲東南久遠之計而臣智慮短淺深恐無以上副 聖懷伏查長江上自荆湘下訖海滙以南北論之則天塹之險也以東西計之又建瓴之勢也而水師一軍據其要害

可左顧右盼雄視四方惟是地面遼濶將卒賢否不齊爲
統帥者非有深沈大略而又出以兢業小心忠誠爲國
則一時之利或爲異時之害是以曾國藩無恙每與臣論
及水師卽謂宜隨時變通以防流弊不可株守成法實係
確有所見臣此次簡閱所至竊見此軍改歸經制甫及五
年而弊端已伏不可不急謀整頓俾無失設軍初義以仰
副 聖主顧慮東南之至意管見所及約有四條用敢
分晰臚舉爲 皇太后 皇上陳之
一曰將材宜慎選也長江水師管轄五千餘里而提督一
人爲之統帥必其精神智力無所不及而刑賞號令實有

不出戶庭坐制遠近之勢乃爲勝任非徒一年一巡循行故事而已也故將材極難其人臣竊謂能當其任者約有三等智識閑遠天資忠亮其上也秉性剛方威克厥愛其次也操守清廉敬慎畏法又其次也前明武臣中如戚繼光文臣中如王守仁者不獨水師可用而實水師之奇才至技藝之精練情形之熟悉則微末而不足道矣此等人若不預儲於無事之時而倉猝以求之則必至於僨事鹵莽以用之殆無異於棄師深可慮也今自軍興以來謀臣猛將以及中外文武大臣才守兼優爲 皇上所真知灼見者自不乏人發縱指使惟上所用而臣以爲尤宜

責成統兵大臣及各省賢明督撫隨時保舉將才無論其現爲將帥現爲偏裨但視其志趣才略果與前三項略能相應卽行密疏保奏 皇上再博加詢問或遇事飭令來京召見果其所舉不誣隨時不次擢用而又假之以便宜之柄臨之以不測之威務使有才者得以自盡其用不才者不得承乏其間擇將御將道無過此至於各營弁勇如有心地樸實智慮過人者卽責成各鎮將隨時甄錄上之提督及該管各督撫亦卽隨時察看視其可用者次第擢用以儲異時統帥之材庶幾人材日出而折衝禦侮可以惟我指揮矣

一曰積習宜力除也 國家設立水師各營所爲者殺伐之事所恃者勇敢之氣所服者勞苦之役使其無勇而畏勞則將何以行殺伐乎臣每見前史所載凡在開創之初用兵不多戰功獨偉至於承平旣久兵日益增而益不可用故粵逆之變至捨兵募勇者豈兵獨弱而勇獨強哉兵有習氣而勇無習氣故臣與曾國藩初起義旅湘軍所向有功其時自將弁以至士卒大抵非書生卽農夫也不知有衣服玩好之娛不知有功名勢位之樂不知有趨蹌應對之文當時湘軍所以勝人不過兩端曰樸曰勤乃十數年來時事漸平鎮將則狃於富貴士卒則習爲恬嬉于是

樸者以漸而澆勤者以漸而惰是今日之勇又將化爲昔日之兵矣豈不可慮然則居今而欲整頓水師亦在統帥之先去積習而已臣查閱所至所見鎮將以下樸實者尙不乏人而亦有修飾厨傳講究應酬者均經臣隨時戒飭甚者至于參劾頗聞每屆巡閱儀節煩縟沿途迎接開放大炮甚至合隊排炮如攻大敵是但知聲威之壯而不顧火藥之虛糜矣業已由臣通飭禁止所到馬頭支搭五色棚帳鼓亭鏡吹儀仗甚都是徒飾觀瞻之美而不知攤派之難支也且此習一開則儂巧者必因此而見長椎魯者必因此而見絀喜怒哀愛憎隨之而轉移卽是非賞罰隨之

而顛倒其與承平年間綠營習氣又何以異平臣於攤派一節業已嚴札申禁其各營紅白慶弔及祭祀禱賽時有萬不得已之需商之湖廣兩江督臣略籌閑款俾資辦公此後再有攤派名目應卽照剋扣軍餉例從嚴參辦所有無名費用徒飾外觀而有損軍實者應請 嚴旨飭下懸爲厲禁務使上行下效無失樸誠之舊以養勇敢之風庶於水師可以久遠無弊

一曰軍政宜實講也臣所擬慎選將材旣可以收賢者之用力除積習又可以問不肖者之心而鎮將以下中材居多則利弊所在必恃有成法以制之此軍政之所以宜講

也查水師定例用人甚嚴原以風水沙線舟楫器械非熟
悉江海情形難期得力長江水師原奏第十五條兵部議
定水師缺出不得攙用別項水師人員是長江用人之法
必須長江水師人員方可補用自曾國藩創立水師以來
十有八年除已充營哨官外其勇目以戰功保至參遊都
守千把外委者人數甚眾現議改爲經制額缺則該參遊
以下名雖爲兵其實皆候補人員也臣前與提臣再三定
議卽以此等兵中之官作爲水師候補遇有缺出擇其人
材可用者酌量拔補不得濫收外來人員乃此次查閱各
營提標中軍所收外來候補人員至二百七十餘員之多

各鎮標或三四十員或五六十員詢其來由在提標者皆曰自各處薦引在鎮標者皆云由提督飭送迨按冊點名則有向在水師各營因事撤革者有向在陸營僅於履歷中聲明曾在某水師效力者並有僅於冊上註一銜名並無出身履歷而點閱之時並無其人者可謂冒濫已極而一經收標卽須津貼薪水糜費尤甚日復一日數年之後長江水師必盡雜出不倫而營制不可問矣惟此項人員收標旣久一時難以盡遣臣擬限以定制提標只准留三四十員各鎮只准留一二十員其有不安本分或別有嗜好者隨時嚴加沙汰此次嚴定額數俟隨時用竣以後卽

不准再收候補人員如有出缺專於長江水兵中拔補以
免外來別項人員紊亂務使水師人材總歸水師拔取以
符定制其各營額兵以前類多游勇查各省水師兵丁向
由本地招募實以生長其土情形較熟今擬凡在水師地
面漁戶水勇人等如有才力精壯心地樸實諳悉風水沙
線者皆可酌量募補且使湘軍土軍主客並用以杜勾結
妄爲之弊於軍政亦有裨益至原奏二十七條不准私設
炮船所慮最爲深遠而近來民間炮位未能禁斷其行劫
巨案往往有假冒炮船之事長江各營炮船但有旗號並
未援照沙船漕船定例於船梢兩旁大書深刻標列字號

盜船私船無可分別以致營船之攬私闖卡匪船之假冒行劫漫無稽查官民均被其害應飭令各營所有炮船均於船梢兩旁大書某營某哨第幾號炮船務使旂幟收卷之時猶可一目了然遇有攬私滋事即可按號查究則營船不敢妄爲而盜船亦無從混跡矣

一曰體制宜復舊也查水陸各營設提督爲總轄卽設總兵爲分轄提督固有節制各鎮之權而總兵卽有操縱一鎮之責是以定制提鎮相見用賓主禮文移往來一切平行蓋重總兵卽所以輔提督也茲查水師提督與所轄各鎮公牘初擬用札旣而改用照會經臣再三商論始用咨

至各鎮之於提督則概用申文實非 國家舊制至提督出巡所到各總兵必須迎送出境挂刀謁見尤爲禮所未見雖苟自卑屈類出於不肖之逢迎而妄爲貴倨亦何以存方面之體統況提督之體愈尊則總兵之權愈奪遇有大事能望其引義以諍乎用人失當能望其秉公弗阿乎又長江水師原奏十五條哨官出缺都守千把外委五項應全歸提督主政原以一事權委署一層未及分別聲敘長江分汛地段每哨所管汛地或二十里或三十里不等該汛官遇有事故出缺若必由提督委署則如湖南岳州鎮標出缺提督適在江南太平江南瓜州鎮標出缺提督

適在湖南岳州上下數千里懸缺久待往返需時萬一本
汛出案勢必無所責成鄰汛出案亦將巧爲談卸關係軍
機實非淺鮮提鎮皆係統兵大臣卽皆有用入責任總兵
用人失當提督秉公參劾可也豈宜總兵竟不預聞若補
缺旣由提督主政而總兵不得委署一缺則輕重過甚流
弊頗多且亦非提督一人精力所及於營務尤有窒礙應
請飭下提鎮體制仍遵國家定例一切平行其各
鎮將弁出缺卽由該總兵就近委署再行咨明提督請補
其提督敘補非人各總兵卽行咨明更正則提鎮有相維
之勢卽提鎮有相濟之功矣右臣所陳四條係就今日水

師已見之弊而言而其弊之未形者防微杜漸尤賴隨時
整頓臣與曾國藩創立長江水師之意原以十數年苦戰
賴此一軍奪據長江之險俾賊束手待斃而百戰之士棄
之可惜且東南有此軍居腹心要害之地一旦有事可以
無腹背受敵首尾損決之虞此微意之所在也臣學識庸
愚受 恩深重既有所見不敢不罄竭以言是否有當
伏候 聖裁爲此專摺具陳伏乞 皇太后
皇上聖鑒訓示

水師不兼習弓箭片

兵部侍郎

彭玉麟

再查長江水師章程第二十條水師以使船爲第一義放礮次之凡考槳糧須令一人駕一小划渡江一二次凡考礮糧須令連放五礮無走火遲鈍等弊等語並無考核弓箭之說惟內有哨官仍考試技藝以定差等一語致近年以來提臣閱操兼習弓箭各弁勇等紛紛講求旣荒本業兼多糜費其尤爲貽誤者借此肄習弓箭之名卽開登岸陸居之漸查水師陸居爲向來之積習臣與前兩江督臣曾國藩初次定章嚴行禁止不准陸居嗣後隨時誥誡奚止三令五申豈可借端登岸敗壞營規况水師人員向不

以弓箭爲重卽赴考驗亦祇試演燃礮並不責以騎射以
臣愚見不但長江水師不准兼習弓箭卽江蘇新改之外
海內洋內河水師亦宜專習槍礮不習弓箭庶幾專精一
技旣可免旁雜之心兼可杜陸居之弊相應奏明請

旨飭下各該提臣嗣後隨時操演及考拔各缺均應遵照
舊章不准再習弓箭以仰副 聖天子慎重水師名實
相符之至意理合附片陳請伏乞 聖鑒訓示

新設皖南鎮標營制疏

兩江總督 李宗義

竊維皖南鎮總兵一缺前於咸豐五年經前督臣怡良奏
准添設營制事宜當因軍務喫緊未遑議及迨同治四年
前署督臣李鴻章奏請分成招補安徽各營兵額案內聲
請皖南鎮標下除統轄徽甯池廣蕪采五營外應否添列
幾營抑就中酌改增定旋准兵部議覆當此 國帑支絀
之時未便再添營制以糜餉需應准其就中酌改增定等
因奏奉 諭旨依議欽此當經轉行皖南鎮道會同藩
臬司查議去後茲據安徽布政使裕祿等議詳前來臣等
伏查皖南四府一州地廣山多最爲緊要從前設立徽州

甯國池州廣德蕪采五營兵數無多頗形單薄今既添設重鎮自應倣照壽春鎮營制設立鎮標左右兩營查皖南地方以甯國爲適中之地帶浙襟江通衢四達總兵宜駐甯國府城居中控馭管轄改設之鎮標左營添設之鎮標右營及原有之徽州池州蕪采廣德四營聽兩江總督安徽巡撫節制其鎮標中軍擬以甯國營作爲鎮標中軍左營原設弁兵毋庸增減惟甯國營係屬叅將改爲鎮標中軍似與體制未符查蕪采營遊擊與徽甯道同駐蕪湖該處爲七省水陸要冲商賈輻輳巡緝彈壓亦須體制稍崇之員方資控制擬將原設甯國營叅將改爲蕪采營叅將

額缺其蕪采營遊擊調赴甯國改爲鎮標左營遊擊兼管
中軍事又添設之鎮標右營體察情形擬設都司一員中
軍守備一員千總一員把總三員馬步戰守兵三百名惟
通省各營無可裁撥查有安慶營副將所屬之防江游兵
二營本係專轄江南兼管南北兩岸陸路支河汶港現在
長江已設水師專顧江防該二營係北岸屯防省城暨和
含二州縣城守要隘外所餘不過口門支河及沿江集鎮
汛境旣少額兵尙可稍減擬於游兵營抽兵二百一十名
防江營抽兵九十名共成三百名撥歸右營以符增設之
數所設千總一員把總三員亦於游防二營內裁撥其都

司一員守備一員徧查安省各營實無可以抽撥改移之
缺擬請添設以重營伍再游兵防江二營原駐大江北岸
前因統轄江面設有哨船是以兼管江南汎地今既無江
汎之責又無巡哨船隻若仍兼管南岸汎地勢難聯絡擬
將該二營原管南岸汎地撥歸皖南鎮標分隸池州蕪采
二營管轄卽於防江營內撥留和悅洲把總一員守兵四
十名歸併池州營游兵營內撥留守兵二十五名歸併蕪
采營並於蕪采營原設馬兵內改設外委一員添派設防
又防江游兵二營有原管之江心洲汎若歸長江水師兼
管恐該官兵等藉巡查爲名棄舟登陸致啟陸居之漸自

應仍歸陸兵分巡惟簡僻孤洲地處江心四面皆是水師
時有炮船梭巡形勢今昔不同擬將各該洲汎在皖南境
內者統歸池州蕪采兩營兼巡在江北境內者仍歸北岸
之游兵防江二營照舊巡防遇有案件汎洲地居民失事
者概歸陸營開叅行泊船隻失事者即歸水師開叅如此
就中增改各營兵額不甚懸殊足敷控制而增餉尙屬無
多於差操巡防亦可藉資周密其徽州廣德二營悉仍照
舊毋庸更張謹將添設裁併各營及增減餉項數目分繕
清單恭呈 御覽仰懇 敕部議覆施行除分汎設
防詳細情形及未盡事宜容俟部覆至日再行造冊繪圖

次第辦理外所有酌擬院南鎮標營制緣由謹合詞恭摺
具奏伏乞 聖鑒訓示謹奏

三

請變通武職選補章程疏

廣西巡撫張凱嵩

竊維衛民必先整旅任將乃可馭兵廣西地處邊陲軍與日久籌防攻剿全在文員武職協力同心近雖各屬次第廓清賊氛漸息臣爲善後安民之計壯勇旣多欠餉團練應亦歸農自以整飭營伍爲急務而整飭營伍要須武職各得其人庶可百廢具興力圖振作乃臣綜計通省各標協營武職實任大半無員如廣西提督馮子材現在鎮江軍營係以丁憂潯州協副將蕭榮芳代辦左江鎮總兵高連升現在浙江軍營係以丁憂總兵王海清留署右江鎮總兵慶瑞現在陝西軍營係慶遠協副將富順署理此外副

將七缺在軍營者四員叅將六缺在軍營者一員遊擊十
一缺在軍營者六員都司十九缺在軍營者六員守備三
十缺在軍營者十一員除千把總未弁不計外未經到粵
者三十一員其餘各缺或部推尙未有人或請補尙未覆
准或帶兵剿捕或因公差委不在本任以致實任武職甚
屬寥寥率皆委員署理甚至委署無員則以官階較遠者
暫行護理代辦資淺望輕駕馭究難得力粵西本軍務省
分各營地面多係甫經收復之區反側未安萑苻未靖隨
時責成防剿在在乏員是軍營懸缺過多於營務實形窒
礙查定例派請出征員弁遇有軍營所出之缺儘歸軍營

量功升用又軍營人員著有勞績咨明各該員本省督撫
存案遇有本省所出應題應拔之缺該督撫將派往出征
員弁與存營人員相間拔補各等語詳譯例文既於軍營
足資鼓勵仍期於本省無悞操防今廣西武職因用兵日
久軍營推補愈多本省實任愈少各標協營漸至空曠現
值軍務未戡自未便以軍營得力將弁遽請各赴本任而
地方遼濶武備難周亦未敢緘默貽悞臣再三籌度力求
變通合無仰懇

聖恩伏念邊省防剿方殷需員孔亟
飭下部臣核議嗣後軍營廣西武職守備以上遇有
升任等項遺缺可否以一缺歸軍營升補再出一缺仍照

例於在京及各省現任人員內開列請簡或較俸推升俾得迅速來粵任事或將本省勞績保舉應升應補人員酌量補用藉資熟手如此變通輪補庶幾員缺漸次得人
不致虛懸日甚於營伍地方均有裨益臣爲邊防善後起見謹將副將以下現在軍營未能到任各員缺逐一查明繕具清單會同兩廣總督臣毛鴻賓恭摺附驛具奏伏乞
皇太后 皇上聖鑒謹奏

陸營借補小缺片

欽差大臣 曾國藩

再武職各官大銜借補小缺臣於六年五月具奏 欽

奉 諭旨允准在案嗣准部咨以同一軍營出力官職

大者補缺之途甚廣官職小者補缺反致無期不足以服軍心而作士氣仍應照章議駁等因咨會前來臣等此次奏補長江水師各缺甚至以提鎮之銜借補千把之缺未免駭人聽聞然勇丁出身入營之資格極久列保之次數較多而家中貧寒情願補一小缺爲終身衣食之資此亦人之常情臣等旣不忍拂其意而又取其入伍多年可收駕輕就熟之效伏乞 皇上敕下該部議准以從眾願

仍遵照兵部原議將來此項人員用竣不往再行借補以示限制至陸路人員臣近來奏咨大銜借補小缺者經兵部議駁在兵部之意一則恐銜缺懸殊名實不符或有礙於體制一則恐千把微員永無升階或屈抑乎人才此等苦心臣亦曲體而深亮之惟查軍興十年凡綠營弁兵略有才力膽識無不奮跡行間但有僥倖優保者斷無屈抑未保者是人才本無沈淪之患若恐未弁永無升階則請暫於此二十年内往以大銜借補小缺截至同治二十七年以後仍照舊例按班序補亦即兵部所云此項人員用竣不再借補之意也至於名實不符有礙體制之說查崇

而退居小缺在補缺者已得不償失在獎功者恐賞不
酬勞上下雖不滿意究無損於政體若崇階永無補期則
功績最淺者轉得各占寶缺勞苦最久者反致長抱虛榮
是缺望更深所損更大矣統計各省保至武職三品以上
者不下萬人將來軍事大定各路撤兵此項有階無缺之
員難保不滋事端同治三年沈葆楨奏請安置此項人員
自提鎮至都守均照實缺例給與俸銀米石 諭旨頗
以爲然飭臣等核議臣以糜費太多未經議准若大銜借
補小缺毫無糜費雖不能安置多員而要可略安望缺者
之心相應奏明請 旨將陸營借補小缺一案一併飭

部核議如蒙議准臣等隨時察着或每年將借補者酌補
六七成序補者酌補三四成總期衆志交孚不虞偏廢理
合附片陳請伏乞 皇太后 皇上聖鑒訓示謹
奏

請整頓駐京塘務疏

御史劉慶

竊照各省例設駐京提塘原爲承投該督撫題咨事件並有親赴六科抄發具題奏覆各件之責向由各省督撫于武進士舉人內揀選咨充三年更替期滿之後分別營衛守備選用所以示獎勵慎郵政也近見各省文件往往遲延貽悞皆由提塘不能慎重公事之故其不能慎重公事皆因期滿不卽更替貪戀留辦及雇人代倩事無專責之故臣初任兵部司員於郵政曾加體察伏讀中樞政考內載提塘三年期滿不准咨請留辦又例載各省提塘將屆期滿十個月以前兵部行知該督撫揀選充補依限咨部

如咨送遲延將該督撫交部議處該提塘領文不卽赴部亦照例議處又應密事件不准提塘預通信息各等語郵政所關定例綦嚴查各省駐京提塘例定十六缺今聞僅存十一人其餘五缺皆雇倩他省提塘代辦而此十一缺中如山東等省又多有多期滿留辦之員訪察闕額所由來非盡各省督撫不行咨送充補實緣該提塘等貪領每年報資不欲交卸卽本省咨送頂補有人來京亦必多方勒指于例定封庫底墊正款外需索攤派幫項私款每至數千金之多而他省提塘預爲己身日後交卸地步亦從而附和之勒索保結諸費種種刁難以致新咨來京提塘無

力承認經年累月不能接充竟有自行赴部呈請咨回不願頂補者而舊任提塘又因充補年久格于例限不敢戀缺則每私相授受雇倩他省提塘代理如山東則代辦湖南直隸則代辦雲貴廣西則代辦陝甘福建則代辦浙江又有業經病故而其子孫尙指留鈐記不願交出如四川提塘已于上年出缺猶雇倩江西提塘代辦似此朋充接頂互相效尤將來必致盡曠其官貽悞塘務况預通信息例有明禁若以此省代辦他省身非專責更難免無洩漏密封等弊相應請 旨飭下兵部嚴加整頓嗣後凡有提塘期滿仍照例不准留辦遇有身故者一面勒令將鈐

記繳出派委鄰省暫行代理一面行催本省速行咨送合
例之員來京頂補到京之日卽由兵部嚴催交替不得仍
前勒索刁難並請 飭部嚴定處分至現在闕額諸省
應由該部查明速行咨催充補以專責成庶塘務不致曠
廢而郵政可期起色矣臣愚昧之見是否有當伏乞

皇太后

皇上聖鑒謹奏

同治中興京外奏議約編目錄

卷八

慎重刑章疏

御史胡慶源

請飭刑部增改條例疏

給事中王憲成

請勒根清理案俾疏

御史馬相如

請將貪婪州判軍前正法片

僧親王

請嚴禁官寺越禮疏

御史文明

請懲治貪殘吏胥疏

御史游百川

請嚴禁火葬惡習疏

侍講學士錢寶廉

粵東劫盜重案請就地正法片

兩廣總督毛鴻賓

請築河隄疏

鴻臚寺少卿

胡家玉

預籌河運片

胡家玉

覆奏黃運兩河情形疏

直隸總督

李鴻章

請籌修海塘疏

御史

洪昌燕

奏請以工代賑疏

直隸總督

劉長佑

墳塋禁步應遵定制疏

四川總督

駱秉章

慎重刑章疏

御史胡慶源

竊惟京師入夏以來雨澤稀少迭奉

諭旨飭部清釐

庶獄並屢詔

皇上親詣行禮虔誠申禱久應渥沛甘

霖乃雨雖時有而未能深透農民望澤仍殷城市疫氛間
發旱象將成勢甚可慮臣竊以爲天心下應人心民命上
通帝眷此必有默相感召者查刑部近年屢定新章其切
中時要者固多而未能持平者亦所不免仍宜斟酌盡善
以期寬嚴得中謹就臣管見所及四條敬爲
皇上陳
之

一盜案從嚴盜源宜清也前因盜風日熾將搶劫各犯照

強盜本律不分首從皆擬斬決法已重矣乃新章又將強盜自首一條定以五日限期外卽不准首臣愚以爲塞其流不如清其源也查例載傷人首盜自首及聞拏投首者擬斬候未傷人之首盜自首及投首者分別擬軍至未傷人之夥盜自首者照律免罪聞拏投首者擬徒又盜首傷人逃逸若能捕獲他盜解首者擬徒等語例意周密所以解脅從而予以自新也如五日外卽不准首勢將從惡不悛驅歸盜藪而不知返矣且其中亦有被脅同行分贓塞口尙非甘心爲盜者可比如能不拘期限隨時准首以符舊例則糾約不至過多線緝可期得力而盜風自息矣

古人告密之法當不外乎此也

一洋藥之禁開犯案罪名宜革也查洋藥現在收稅除官與兵不准吸食犯仍治罪外其餘應聽其買賣自便可也如係漏稅私貨自當治以漏稅之罪今創爲三十六家之限除三十六家之外雖非私貨亦不得賣是朝廷立法特爲奸商固壟斷之計甚不可解又煙館照窩賭例犯則滿徒房屋入官若謂恐其窩匪殊不知窩匪自有窩匪之重罪今販賣數百斤者既准其公然列肆矣而販賣此零星數文者乃有滿徒之罪揆諸情理何以喻民且因此獲罪者甚多而踵而爲之者仍復不少徒使胥吏蠹役訛詐包

庶無所不至臣以爲急宜革者此也

一赦款太寬宜量爲區別也赦典固朝廷寬大之恩然亦有不可濫施者查同治元年四月二十五日

恩詔婦

女犯罪無關十惡其一切死罪雖謀故亦予援免臣愚以爲刑罰不可失之嚴亦不宜失之寬謀故重情慘酷殆無人理今一概免之是活一窮凶極惡之人致抱屈幽魂含冤莫訴其戾氣不散亦足釀爲水旱癘疫之災夫鬪殺猶謂其無必欲殺人之心可以寬其一線若謀故而亦免似覺輕縱矣宜明定章程以示區別

一囹圄未清而章程宜定也漢臣曹參有言嶺無擾吾獄

市誠以獄者民命之所繫也京師五方雜處獄訟繁多刑部南北監歲恆桎梏凌虐以死以及尅扣囚糧使餓而死是故殘民命也然其弊必不能革者蓋提牢之權太輕而處分又太重稍一認真禁卒則舞弊以逐其官使之罷職而去易如反掌官之黜陟聽命於禁卒之手故禁卒有所挾制爲非而官不敢問臣愚以爲宜寬提牢之處分而嚴定禁卒之罪名則囹圄之積弊可清而民命可保以此感召祥和當捷於影響矣以上四條臣爲慎重刑章起見如蒙 飭部妥議施行庶幾寬嚴得中仰副我 皇上期於無刑至意將見沴厲全消而和甘立至矣臣愚昧之

見是否有當伏祈

聖鑒訓示謹奏

請飭刑部增改條例疏

給事中 王憲成

竊維明刑所以弼教立法貴乎持平查刑部每屆纂修條例之年增刪出入必逐條釐正務期寬嚴協中輕重得所茲當修例之時有應行參酌者謹以臣愚見所及臚陳四條伏候 聖裁

一辦理盜犯新章宜稍加區別也查舊章尋常盜劫之案分別法無可貸情有可原將法無可貸者正法情有可原者發遣此係雍正五年九卿遵 旨定議纂入成例

歷久奉行欽惟

世宗憲皇帝剛健神武政貴嚴肅

豈不念稍存寬宥近於姑息養奸蓋於法外施曲貸之仁

而於法中嚴必誅之律意至深也近來輦轂重地屢有
明火搶劫之案朝廷因時制宜不得不繩以重典惟比
年以來京外拏獲盜犯不另首從悉予駢誅其中豈無迫
於饑寒被人誘脇者原其情節實可哀矜伏讀歷次

諭旨用兵省分被脅從逆之犯許以自新仰見

皇

太后皇上好生之德洽於民心所以逆眾投誠渠魁
授首蓋德化若是之速也伏查劫盜夥犯迫於饑寒被人
誘脅並無凶惡情狀者較之被脅從逆之犯情事尤爲可
憫若不定以等差概從斬決似不足以昭一視同仁之意
況情有可原者例應發遣亦非縱釋有罪也竊思辦理盜

案其爲首者固應以得財不得財爲重輕爲從者則應以傷人不傷人爲區別除例載殺人放火等各項強盜及响馬江洋大盜老瓜賊俱照定例辦理外其餘劫盜之案如得財又傷人自應照新章從重不論首從一併斬決如得財而未傷人爲首者依律斬決其爲從之犯審係迫於饑寒被人誘脅在外瞭望接贓者仍照舊例分晰聲明辦理並嚴定承審官將正犯曲爲開脫處分如此稍爲變通則法無可貸者不得倖逃顯戮而情有可原者亦不至概罹重誅用刑益昭明慎矣

一辦理綽號人犯尙未允協也查著名棍徒擾害歷經嚴

三
拏重辦在案近來步軍統領衙門將素有綽號之人俱目
爲棍徒拏送刑部其中有情罪尙輕者刑部以其素有綽
號從重將該犯依棍徒擬軍例或並無不法重情亦比照
棍徒擬減徒罪臣伏思綽號係屬空言擾害必求實據如
該犯爲害閭閻卽無綽號亦安得不謂之棍徒如無擾害
實跡又豈可憑一綽號遽作重罪且綽號每出於他人之
口設使刁徒與人有隙故爲起一綽號卽不難從而傾陷
之甚至狀貌醜陋性情顛拙皆可因此得名又何足爲棍
徒之據查例載凡凶惡棍徒屢次生事行凶無故擾害良
人確有實據者發極邊足四千里安置如並無凶惡實跡

儻然挾詐逞凶者仍照所犯之罪本律本例定擬不得濫引此例等語是例文剖析甚明應請嗣後遇有綽號人犯但當問其罪犯輕重各依本律本例科斷不得因有綽號率行從重問擬庶不致稍有冤抑矣

一親老留養之條宜准例推也查例載軍犯徒犯未經發配以前告稱祖父母父母老病應侍及其母係屬孀婦守節二十年家無以次成丁者俱准存留養親或到案時非例應留養之人迨成招時其祖父母父母已成老疾兄弟子姪死亡者亦准聲請留養等語詳釋例意非以正犯之罪有可寬實不忍其親之榮獨無依特加矜恤此蓋

盛朝之曠典也臣思外遣軍流各犯非恭逢 恩詔例

不查辦其有發配時非例應留養之人到配後數年或十
餘年其祖父母父母已成老疾其母係屬孀婦守節逾二
十年家無以次成丁侍養者在該犯永遠放流原屬罪所
應得獨念其親同一榮獨無依其子到配有年不得與未
經發配隨案聲請之犯一體邀 恩留養未免向隅擬

請嗣後外遣軍流 犯案時非例應留養之人到配後

數年或十餘年該犯之祖父母父母已成老疾其母係屬
孀婦守節已三十年家無以次成丁侍養者亦照未發配
侍親已老疾之例准該犯之祖父母父母在本籍呈報由

地方官查明核其情節准留養者取結報部行知該犯配所如並無爲匪不法情事准其釋回留養似此量爲推廣則我 國家錫類推仁之意益覺無微不至矣

一軍流人犯到配後其年老篤疾者宜隨時查辦也查例律載年七十以上及篤疾犯流罪以下收贖又犯罪時未老疾事發時老疾者依老疾論各等語未犯罪時未老疾事發時老疾者尙得以老疾收贖則發配時未老疾到配後老疾者辦理似宜畫一且徒犯在徒年限內老疾例准收贖則流犯自可類推若謂徒犯罪輕流犯罪重然流罪以下律俱准老疾收贖矣老疾在未發配以前准其收贖

老疾在既發配以後卽不得收贖似未足以持平可否
飭下各直省督撫將軍每屆年終查辦一次除常赦所
不原及在配復行爲匪等犯不准收贖外如有到配年已
七十或已成篤疾者一體援以老疾收贖之例准其收贖
或徑行釋回則所以矜全老疾者仍不背乎律義也以上
四條臣爲慎重刑章起見可否 飭下刑部核議並於
此次該部纂修條例內酌爲增改伏乞 皇太后

皇上聖鑒謹奏

請勒限清理案件疏

御史馬相如


竊以聽訟爲政之大端得民情乃能畏民志我國家設立科條于明罰勅法之中實寓默化潛移之意地方各官果能盡心民事一切詞訟隨到隨審隨結鑑空衡平無枉無縱何難使豪強斂跡頑梗革心乃近來各省積習非徇情枉斷任性刑求卽漫不經心因循延擱于命盜重案或稱人証未齊或稱供詞未確百端藉口至尋常戶婚田土錢債細故一任胥吏朦蔽累月經年不爲審理差役因而嚇詐訟師因而主唆更有貪黷之吏不分黑白惟揣其肥瘠而搏噬之以致小民負屈含冤無從申訴京控之

案迭見層出及至發交原省仍復藉詞延宕甚至有一省而積至數十案者有一案而十餘年尙未訊結者卽所結之案控告得實者十不獲一雖挾詐逞私捏詞誣告究亦在所不免然安見非委審各員瞻徇附和該上司迴護屬員曲爲彌縫督撫大臣且未能悉心民瘼何以仰對

聖明愚以爲現在軍務漸平以整頓吏治爲第一要務整頓吏治以清理詞訟爲第一要務應請飭下各直省督撫嚴飭州縣審理積案勒限完結以案件審結之多寡定屬員考成之優劣以審案之有無冤抑察屬員之能否盡心至於京控發交之案本有完結例限應由原交各衙

門隨時核查其有已逾例限尙未審結者卽行奏參予以
應得處分各督撫臬司於京控奏交各案親提研訊儻實
有屈抑等情務須立爲申雪不得仍蹈瞻徇迴護之習庶
幾案無留牘獄少繫囚以上副 聖主刑期無刑之意
臣愚昧之見是否有當伏乞 皇太后 皇上聖

鑒謹奏



A large rectangular frame with vertical lines inside, possibly representing a window or a decorative border. The frame is composed of a thick outer border and several thinner vertical lines spaced evenly across the width. On the right side of the frame, there is a small, dark, triangular shape protruding outwards, resembling a handle or a latch. Below the frame, the number 626 is printed.

626

請將貪婪州判軍前正法片

欽差大臣 僧格林沁

再臣等以石三山盤踞逆匪松盤等業經擒獲仍須清查各寨以淨根株遂派翼長舒通額蘇克金分路往查並派宿州知州張吉雲州判吳壩隨同前往以期安撫民心而合各圩之民知有地方官長將來征收緝捕庶可得宜如有抗拒情形以便隨時剿辦庶幾次第清釐無貽後患乃該州判並不同行復縱勇在陳家圩搶擄剝脫男婦居民衣物以致百姓赤身逃奔經翼長舒通額查知將滋事之勇正法衣銀追還居民又聞各圩傳說吳壩到處訛索錢文經國瑞就近正在查辦間有蔣家樓練總蔣新稟控吳

十
孺帶勇嚇詐又據陳繼會控告岳發年霸去伊妻當交州
判辦理吳孺親供曾在張家樓查有首捻張雙外逃罰制
錢二百五十千收過錢三十三千留作署中幕友差役一
切之用至陳繼會控告岳發年強佔伊妻之案岳發年許
錢二十一千並未到手其釋放之處自認不虛等語傳訊
各犯供俱相符查吳孺以地方官吏當此除暴安良緊要
之時宜如何激發天良隨同清查乃敢帶勇索詐多贓雖
據供稱以備當差之用其實俱係侵吞入己復縱勇搶擄
聽許賄賂釋放應斬人犯種種貪婪殊屬有干法紀且現
當辦理善後事宜似此任意索詐勢必激成事端耗費軍

需又不知凡幾實屬故違軍令若不從嚴懲辦不足以儆
官邪除將岳發年緝獲訊明業已正法外相應請 旨
將宿州州判五品銜候補縣丞吳壘卽在軍前正法以示
懲儆而昭炯戒並請 旨飭下直隸山東安徽河南各
省現辦善後各督撫如各省地方官吏似此任意貪婪擾
民激釀事端使百姓不堪安謐卽行奏明以軍法從事庶
於善後可期辦理穩固謹附片具奏請 旨

請嚴禁宦寺越禮疏

御史文 明

竊維宦寺怙惡無代無之自漢唐以迄於明縱欲逞威如出一轍載之史冊炯戒昭垂伏惟我 朝定鼎以來

列聖深鑒前車整飭紀綱防範太監至爲嚴密二百餘年從未假以分毫之柄驅使不準踰闕賞官不過四品所以防微杜漸法至周而意至遠也並經屢奉 諭旨家

法相承宦寺有犯必懲綱紀至嚴每遇有在外招搖生事者無不立治其罪通諭在案本年三月間 皇上恭謁

東陵回鑾竟有太監多人在燕郊滋事仰蒙

宸衷獨斷雷霆不威將太監馬進喜等嚴行懲責發往黑

龍江並 宣諭中外亦在案各該太監應如何倍加小心當差共知做懼乃爲日無幾故態復萌本月十三日

皇上

零壇大祀禮成還宮之先文武百官按班

侍儀突有眾多太監騎馬爭馳蜂擁而至自正陽門起擅走各門中洞直行 御道任意縱橫毫無顧忌尤可駭

者併其卑賤厮役亦俱騎馬由中路跟隨冲越儀仗公然馳騁擅進斗口直到午門門限始行下馬喧逐無狀實堪髮指各門官兵等並不向前攔阻聽其作踐穢污不堪寓目伏查 紫禁城內騎馬乃本 朝優禮大臣曠典膺賞諸臣上馬下馬均在斗口以外如值 乘輿出入雖扈

從王大臣亦俱懷遵步行從不敢稍有踰越乃刑餘之輩
竟敢如此無禮且攜帶賤役多人不顧警蹕縱肆橫行官
兵不敢過問成何體制宜嚴行禁止以肅紀綱查律載

車駕出入侍衛官軍導從者許於東西兩旁行走其餘
文武百官等直行御道者杖八十又例載凡祭祀及

聖駕出入並 升殿之日廝役喊叫擁擠者杖一百其
主筭五十又祭日扈從無執事官員多帶跟役行走者將
官員指名叅奏治罪各等語是官員踰禮尙干嚴懲太監
何人竟敢違背相應請 旨飭交總管內務府大臣嚴

飭總管太監各將所管太監嚴行約束嗣後當差出入不

准恣意妄行並嚴飭各門章京督率官兵等每過 聖

駕出入經行各路以及各門如再有太監擅走中門直行

御道情事立即稟明該管大臣奏明嚴懲俾宦豎知

所戒懼綱紀永期肅清臣是日齊班目覩違 制情形不

敢安於緘默謹繕摺奏聞伏乞 皇上聖鑒訓示謹奏

請懲治貪殘吏胥疏

御史游百川

臣竊惟患莫大於營私弊先去其太甚
國家建官立
政額設府史胥徒藉資辦公不過取其執簿書供奔走而
已乃自若輩盤踞把持遂成積重難返之勢論者謂天下
大權歸於胥吏此誠沉痾之疾不能遽除而實不可不除
者也夫自京畿以及各直省有不營私之官而鮮有不營
私之吏大抵上司衙門之胥吏有病於官庶司衙門之胥
吏有害於民其工於取利也率多曖昧不明其敢於逞奸
也實爲悉數難盡卽如吏部職司銓選仕路之所賴以清
也然聞外省每有缺出書吏卽懸以餌人或多引例案以

遂其招搖或暗致信函以行其嚇詐保舉之或准或駁處分之可重可輕既已軒輊在心無難上下其手吏部如此其他可以類推蓋成案既多援引各異書吏先深入其中以操縱之司員始泛從其外而糾察之已屬不及之勢而况有縱之者乎此在京各衙門胥吏舞弊之大概情形也而外省胥吏之害更有不可勝言者州縣爲親民之官所用吏胥本有定額乃或貼寫或掛名大邑每至二三千人次者六七百人至少亦不下三四百人夫此數千百人者政之蠹民之蠹賊也百姓含冤呈訴其待長官理申不啻赤子之依父母而吏胥乃從而凌侮之剝削之逼勒之顛

倒撥弄率以財之有無多寡爲事之曲直是非總之吏胥
視民如魚肉民畏吏胥如虎狼然民且甘受搏噬而不敢
告發者當前因投鼠而生忌旣恐其力有不敵日後或假
虎以逞威又恐其心有不甘也臣每恭讀 朝廷恩詔必
曰毋任吏胥舞弊不得假手吏胥 誥誠至嚴切矣第
恐有司奉行不力以吏之給使令也而恃爲瓜牙以吏之
趨承也而引爲腹心以失察吏胥有關於己之考成也而
且巧爲彌縫曲爲袒護不曰吏胥狡猾而曰民俗刁頑何
其不仁之甚也臣愚以爲今日者甫離兵燹之禍民幸有
其身家若再遭吏胥之傷何以完其生聚相應請 旨

諭令中外大臣嚴飭所屬振刷精神破除弊竇一應文案
悉心稽查定限清釐吏之名數過多者務加裁汰吏之情
弊既露者卽行痛懲開人告發之端毋蹈徇庇之習蓋害
政者吏也而足以治吏者官也官誠得人吏自斂跡至於
家丁之串通書役紳衿之包攬訟詞並飭地方官概
行屏除毋或寬縱庶妨政之弊漸去而民困可稍抒矣臣
愚憫所及爲去弊起見是否有當伏乞

皇太后

皇上聖鑒謹奏

請嚴禁火葬積習疏

侍講 學士 錢寶廉

竊維 聖朝之治世教孝爲先人子之事親慎終尤重
自世俗創爲火葬之法竟有燬墓燒屍殘忍其親而不顧
者此風臣雖習聞而未得其詳近於同鄉公車中訪之則
情形更慘習染更多誠爲蔑倫悖理之尤不可不速行禁
止也查火葬之習浙江杭嘉湖三府皆有之而莫盛於嘉
屬之石門桐鄉等縣彼處民多業蠶以其不便於種植乃
於中元冬至兩節前後相率而爲火葬之舉其發塚開棺
而不燒屍者謂之明葬其發塚燒棺而不見屍者謂之暗
葬舉先人之遺骸而付之一炬火初發則柩之中嗚咽有

聲火既息則骨既煨燼屍亦灰飛間有年久屍僵者乃以斧斤支解之仍復投諸烈燄傷心慘目所不忍言而爲之後者方且延僧眾召親朋飲譙歡呼金錢揮霍紳民勸之而不顧官長禁之而不悛蓋深惑於火葬速發之說而謂行此可以獲福也冥愚荒誕舉國若狂實是風俗人心之患况由嘉屬而推之他府由浙江推之他省漸染效尤其貽害伊於胡底查例載子孫於祖父母墳墓燒棺槨者杖一百徒三年燒屍者絞又載於他人墳墓燒屍者杖一百徒三年若總麻以上尊長杖一百流二千里定例本爲嚴密但鄉愚無知不諳例禁而地方等官又以爲不急

之務玩忽縱之遂致積久盛行釀成澆俗若不嚴行申禁
誠恐頑梗鄉民罔知悛改可否請 旨飭下各直省督

撫通飭所屬各州縣曉諭嚴懲並責令紳耆地役人等分
段訪查多方勸諭如有仍前火葬者無論父母尊長以及
卑幼他人均卽報明按律治罪至實在無力殯葬查各省
州縣中向俱置有義塚兵燹之後廢弛尤多每經紳富等
捐建公阡應由地方官再查各鄉中拋荒絕產添設義塋
聽其報明附葬其有不願附葬者有地則諭以及時安厝
無地則權宜檢骨坎埋均不准私行火化以挽澆俗而勵
孝思再臣查嘉興府各屬更有一種刁惡棍徒往往遇有

葬事糾約無賴多人攘取物件訛索阻撓致令貧富善良
皆以葬親爲難事而停閣暴露莫可如何此等阻葬刁風
尤爲地方之累相應請 旨一併飭令地方州縣官嚴
示查獲重懲俾鄉邑良民得以及時營葬似亦教孝施仁
之一助臣愚昧之見是否有當伏乞 聖鑒謹奏

粵東劫盜重案請就地正法片

兩廣總督毛鴻賓

再粵東山海交錯匪類窩藏到處皆是兼以民情獷悍重利輕生劫盜重案遠甚他省臣等抵任後各州縣詳報搶劫之案日常數起查閱舊卷盜案獲犯過半者已寥寥無幾甚至累月經年杳無弋獲而申報獲犯輒先聲明帶病進監旋即報稱病故如是者不一而足推原其故皆由地方官捕務久弛加以近年辦理軍務緝捕一事往往視爲緩圖而盜案處分綦重不得不以獲盜搪塞其所稱在監病故之犯難保無作有以少報多之弊且或距省寫遠長途解審恐有疎虞必須多派差役護送彈壓爲費不

賁故方其捕獲之時卽存一監斃之計是盜而被獲者十之二獲而伏法者十之一也竊思此等凶盜罪惡貫盈僅聽其瘐死獄中倖逃顯戮已不足以昭炯戒若各州縣憚於辦案之煩意存避就積習相沿視爲故常爲弊尤大今欲求革除積習之法必先稍示變通之方查從逆滋事及迭劫凶盜罪至斬梟者例得由外恭請 王命先行正法臣等悉心商酌公同擬定除廣州府所屬各縣及佛岡直隸同知拿獲逆匪盜犯仍行解省勘審外其外屬各州縣距省較遠之區如有拿獲曾經拜會從逆拒敵官兵及迭次搶劫夥衆持械傷人罪應斬梟斬決者於審實後稟

解該管府州覆審如道府同城卽由道府會審其直隸州
廳承辦者解赴巡道覆審先行錄供稟報由臣等核明批
飭就地正法仍令備具招詳由府司核轉分別歸案具奏
如此量爲變通則獲一盜卽誅一盜刑人於市耳目昭彰
非如報病之有可捏飾匪徒卽愍不畏法而身首異處見
之寒心非如監斃之無足徵倣案經府道覆審由臣等核
明批行亦足昭詳慎而不至枉濫而於各州縣辦理盜案
期歸直捷庶稍免因循顛預拖延搪塞之弊統俟軍務完
竣盜風稍戢再行奏明仍復舊例辦理此外一切尋常命
盜雜案人犯均應照例詳辦按擬招解以符定制臣等爲

肅清地方起見是否有當謹附片陳明伏乞

聖鑒訓

示謹奏

請築河隄疏

鴻臚寺少卿 胡家玉

竊維黃河故道北流入海經史所載厯厯可稽自宋熙寧
十年河決檀州分而爲二一入淮一入濟南北分流迨南
渡後河遂南徙論者謂金人塞北流以病宋其說非誣元
則時決時塞或北或南明白金龍口再決命都御史劉大
夏治之濬賈魯舊河以殺水勢開新河七十餘里築長堤
三百餘里蓋費帑金億萬始能逼河使南行也我朝因
之二百餘年河決不一大約在北岸者居多殆地勢然歟
今自蘭陽汎潰決汎濫於直隸境內已十年矣昔之河身
今成平地臣於咸豐七年由清江浦進京經故黃河擺渡

處見廬舍儼然寢成村落計上下六七百里節節勢高層層淤塞此而欲循舊道開新河挽狂瀾而東之誠萬難之勢自不若因勢利導由大清河入海之爲便也河臣譚廷襄請疏下游徒駭馬頰兩河以洩水誠古人開支渠減盛漲之良法第自張秋以下民埵率皆頽潰張秋以上如濮范壽張等處河流散漫一片汪洋如衛農田必須築堤束水而工費浩煩地方官勸民興辦無論積年災區力有未逮即使尅期集事而雙隄夾峙筦束河流急溜驚湍倍加勁疾時而南趨時而北刷一遇大汛險工百出或加鑲或加埽或加戩日不暇給民力幾何安能辦此勢必今歲修

明歲決如譚廷襄所奏自利津溯流至肥城一帶民埵決口不下三四十處可爲明証臣聞懷遠謨者毋急近功成大事者不惜小費况黃水漫淹兩省災及數十州縣虧國計害民生甚至土匪揭竿流民助虐用兵剿洗糜餉尤多若不力圖修治恐水套之伏莽難清直東之後患未已再四思維擬請 飭下各該督撫會同詳悉履勘自蘭陽以至利津海口通盤籌畫舊埵可因者因之新隄可築者築之下游之水應疏者疏之橫流穿運運河閘座當建者建之核實估計逐段繪圖貼說進呈 御覽請 旨施行或謂當此庫儲支絀鳩工庀材安能籌此巨款臣竊

查直隸督臣劉長佑籌撥固本京餉每年三十萬金由各
省解儲部庫以爲練兵之用臣請移緩就急於秋末冬初
卽將此項動用興工仍照舊章暫開河工事例以裕經費
但得一二廉明公正之大臣躬親督辦視國事如家事裁
一切浮費涓滴悉歸實用深濬河身寬留河面土工則夯
礮堅實柴掃則鑲壓整齊一二年間必著成效紓數十州
縣汎濫之憂拯億萬蒼黎昏墊之命古稱民爲邦本是卽
固本之要圖也若謂黃河北徙有礙南漕臣擬於向來漕
船渡黃處所開挖橫河一道令南岸清江閘之水與北岸
運中河之水互相貫注血脈流通漕船由北經行較爲順

利並請 飭下漕運總督就近察看情形妥籌辦理臣
愚昧之見是否有當伏乞 皇太后 皇上聖鑒
謹奏

--	--	--	--	--	--	--	--	--	--	--

預籌河運片

鴻臚寺少卿 胡家玉

再京倉儲備全賴南漕近因河運不通改征折色此一時權宜之計非萬年久遠之圖也江蘇巡撫李鴻章現將松太等屬漕米照舊辦理海運計杭城克復浙省亦可踵而行之第海運未可全恃河運不容久廢臣愚以爲江西湖廣等省去海甚遠似仍以辦理河運爲宜論者謂漕船毀棄無存安能起運據臣愚見將來收復金陵後東南數省逐漸肅清江湖水師皆可裁撤所有大小戰船約計不下四五千號臣擬擇其大者如紅單拖罟等頭號師船及各將領座船分撥江廣等省以資漕運不足則暫僱民船以

濟之其小者加長龍三板之類盡行提泊清江浦閘內作爲剝船運米到浦剝入小船裝載由臣所謂新開橫河銜尾北上徑達津通船小則喫水不深載輕則挽行尤速嚴催趲運一年可剝兩次於京倉甚有裨益至如舵工水手擬卽以水勇充補酌給口糧俾免流而爲匪於籌辦漕運之中隱寓安插勇丁之法仍令江廣等省月提釐金若干兩爲新造漕船之費但令每年添造一二百號不十年而漕運可復舊額矣臣爲預籌河運起見臣言是否可採伏

乞

聖鑒謹奏

覆奏黃運兩河情形疏

直隸總督 李鴻章

竊臣承准軍機大臣字寄同治十二年二月初一日奉

上諭前因喬松年奏籌辦黃運兩河情形文彬丁寶楨奏請仍挽復淮徐故道並御史游百川奏河運並治宜詳籌妥辦等情當經降旨交軍機大臣六部九卿妥議具奏等因欽此仰見 聖慮周詳實事求是欽悚莫名臣自少壯南北奔走嗣督師追賊往來河上迭就黃運兩河築圍圈賊雖於河務非所素習而閱歷變遷討論掌故採擇眾議略有見聞奉 命後復遴派幹練耐勞之員分投前往訪察測量茲謹悉心妥議爲我 皇上詳細陳之

伏查治河之策原不外恭親王等所奏審地勢識水性酌
工程權利害四語而四語之中尤以水勢順逆爲要現在
銅瓦鑲決口寬約十里跌塘過深水涸時深逾三丈舊河
身高決口以下水面二丈內外及三丈以外不等如其挽
河復故必挑深引河三丈餘方能吸溜東趨查乾隆年間
蘭陽青龍岡之役費帑至二千餘萬大學士公阿桂奏言
引河挑深一丈六尺人力無可再施今豈能挑深至三丈
餘乎十里口門進占合龍亦屬創見 國初以來黃河決
口寬不過三四百丈尙且屢堵屢潰常闔數年而不成今
豈竟能合龍而保固乎且由蘭儀下抵淮徐之舊河身高

於平地約三四丈因沙成堆老淤堅結年來避水之民移住其中村落漸多禾苗無際若挽地中三丈之水跨行于地上三丈之河其停淤待潰危險莫保情狀有目者無不知之而歲久乾隄卽加修治必有受病不易見之處萬一上游放溜下游旋決收拾更難議者或以河北走則穿運爲運道計終不能不挽之南行以會清口臣查嘉慶以後清口淤墊夏令黃高于清已不能啟壩送運道光以後禦黃竟至終歲不啟遂改用灌塘之法自袁浦洩黃入湖湖身頓高運河水少灌塘又不便遂迭次奏行海運彼時河務運務實有岌岌不可終日之勢蓋自明末迄國初借

清刷黃頗蒙其利厥後河淮不能合流天時地利人事三者皆窮今卽能復故道亦不能驟復河運非河一南行卽可僥倖無事也恭讀道光八年十二月初五日 上諭江境禦黃壩上下一帶黃河積年淤墊以昔証今已成不可救藥之勢等因欽此 聖慮周詳早已洞悉無遺此淮徐故道勢難挽復且於漕運無甚裨益之實在情形也河臣喬松年所擬就東境束黃濟運一節臣查當年清口淤墊卽是借黃濟運之病乾隆二十三年八月 上諭河臣白鍾山曰引黃入運黃水多挾泥沙一入運河易至淤墊非甚不得已不可輕爲此遷就之計嘉慶十五

年十二月十九日

諭河臣陳鳳翔曰因利漕先已

病河權其輕重甯使暫時剝運渡黃必不可復用借黃濟運之計各等因欽此道光五年洪湖潰洩兩江督臣孫玉庭等復議引黃濟運數渡之後卽見填淤起剝磨淺卒至未終其事是

歷朝聖訓昭垂至明至確往事覆車

可爲永鑒今張秋運河寬僅數丈兩岸廢土如山若引重濁之黃以開壩節宣用之水勢抬高其淤倍速人力幾何安能挑此日進之沙且所挑之沙仍堆於積年廢土之上雨淋風蕩河底日高開亦壅塞久之黃必難引明臣萬表劉天和等僉以此事害多於利非淤卽決譬之以病爲藥

以狼兵止寇語殊痛切宏治初年荆隆口銅瓦鑲等處屢次大決皆先因引黃濟張秋之運遂致導隙濫觴臨清地勢低於張秋數丈而必謂後無掣溜奪河之害臣亦不敢信也至霍家橋堵口築堤工程尤不易辦該處本非決口乃大溜經行之地兩頭無堤無岸一望浮沙並無真土可取若興作於茫茫沙水之中目前無從起手無從立腳卽勉強沙堆節節偏溜下做竊恐浮沙易塌適足搜河之怒而所耗實多日後防守難資終爲痼疾一遭潰陷水仍別穿運道而不專會張秋豈非全功盡棄至同知蔣作錦所擬導衛濟運原因張秋以北無清水灌運故爲此議惟查

元村集迤南有黃河故道地多積沙施工不易且以全淮之強不能敵黃尚致倒灌停淤豈清淺之衛遂能禦黃濟運耶彼其意在襲取山東諸水濟運之法不知泰山之陽水皆西流因勢利導十六州縣一百八十泉之水源旺派多自足濟運衛水來源甚弱北流最順今必屈曲注之南行一水何能兩分其勢實多不便况平時淺可膠舟漲時極甚渾濁若攔河作閘遇水一遇伏秋盛漲閘必冲决新渠必淤卽幸不决不淤而使上駛之蘆鹽下運之豫糧及來往商船皆停阻於河而聽命於閘勢不能行若令蘆鹽改由臨清運河入豫則三省鹽綱紊亂窒礙尤多若欲分

沁入衛以助其深而沁水猛濁一發難收昔人已有明戒
豫民必多驚惶若必多方更變另謀引水灌運必致如南
河清口故事徒增漏卮無可持久此借黃濟運及築堤東
水工程均無把握與導衛濟運難行之實在情形也惟河
既不能挽復故道則東境財賦有傷水利有礙城池難於
移置鹽場間被漫淹如撫臣丁寶楨所奏各節均屬可慮
臣查大清河原寬不過十餘丈今自東阿魚山下至利津
河道已刷寬半里餘冬春水涸尙深二三丈岸高水面又
二三丈是大汛時河槽能容水五六丈矣奔騰迅疾水行
地中此人力莫可挽回之事亦禱祀以求而不易得之事

目下北岸自齊河至利津南岸齊東蒲臺民間皆接築護
埝迤邐不斷雖高僅丈許詢之士人每有漲溢出槽不過
數尺尙可抵禦並無開口奪溜之事岱陰之水如綉江等
河亦經擇要築堤汎至則漲汎退則消受災不重至如齊
河濟陽齊東蒲臺各縣城近臨河岸十九年來幸官民防
守無恙以後可守則守不可守則遷似應隨時相勢設施
若於此時驟議遷徙經費無籌民情難喻無此辦法惟鄆
城一縣地本窪下現已淪沒水中須籌移置東省鹽場在
海口者雖受黃淤產鹽不旺經撫臣竭力經營南運膠萊
之鹽時爲接濟引地無虞淡食惟盤剝多費價值稍昂耳

夫河在東省固不能云無害但得地方官補偏救弊設法維持尙不至爲大患昔乾隆十八年銅山决口不能收功尙書孫家淦曾有分河入大清之疏乾隆四十六年蘭陽大工屢敗垂成大學士稽璜又有改河行大清之疏此外裘曰修錢大昕胡家緒孫星衍魏源諸臣議者更多其時河未能北流尙欲挽使北流今河自北流乃轉欲挽使南流豈非拂逆水性恭讀嘉慶十六年八月十二日上諭南河近年以來年年漫口前此已糜費三千餘萬均經竭力措支辦理毫無成效今復鉅工迭出數將千萬國家豈能以有制之帑金注無常之漏卮等因欽此大抵南

河堵築一次通牽約費七八百萬歲修約七百餘萬統計
工需已在官祿名糧民欠之上實爲無底之壑蓋因河身
日高水行不順雖窮天下之力而不能必保安瀾今河北
徙近二十年未有大變亦未多費修欵比之往代已屬幸
事且環拱 神京尤得形勝自咸豐五年銅瓦廂東決後
粵捻諸逆竄擾曹濟幾無虛日未能過河一步而直東北
岸防堵有此憑依稍省兵力更爲 畿輔百世之利此兩
相比較河在東雖不亟治而後患稍輕河回南卽能大治
而後患甚重之實在情形也近世治河兼言利運遂致兩
難率無長策元明大河南行始能開會通以運漕至河北

徙則無如運何斷難一治而兩全事窮則變變則通爲今
之計似不得不出於河自河漕自漕現在議漕政者鮮不
以規復舊章爲望然此兩言可以決耳運河有水可漕無
水則不可漕水能分其自然之有餘者以利濟漕船則可
漕反是則不可漕同治初年大溜全趨張秋尙能灌運嗣
流勢南滾運堤節節穿斷漕船繞坡河至八里廟而黃水
不能入運不得已引溝塍雨水逐段倒塘灌放難險已極
豈可一再嘗試卽運河黃淤歲積歲挑亦難久行若以全
漕阻聚河干俸此無常之水其所害又非徒勞費已也若
如前人所議漕船順河而東由利津渡海入天津取道固

提但江船不能涉河河船不能放洋勢難強爲若倣前代
置倉轉艘之法建倉設官一不得人便滋流弊而由張秋
至臨清陸挽二百餘里車牛盤兌之煩費陰雨霉變之折
耗何可勝計且北路亦無許多剥船可備接運反覆籌維
竟無別有利運之術臣愚以爲 天庾正賦惟蘇浙爲
大宗國家治安之道尤以海防爲重當今沿海數千里洋
船駢集爲千古以來創局已不能閉關自治正不妨借海
道轉輸之便逐漸推廣以擴商路而實軍儲蘇浙漕糧現
旣統由海運臣前招致華商購造輪船搭運頗有成效江
廣等省自軍興後奏改減價折漕民心大定若復徵解本

色苦於運費無措加之於民則必滋事變取之於公又無此閑款似應暫准照章折解仍由各督撫隨時體察情形如可酌提本色若干石卽運滬由海船解津較爲便速如京倉尙有不足更隨時指撥漕折銀兩由南省採買運津或派員在天津招商採辦亦尙合算應請 旨飭下戶部從長計議妥籌辦理至運道雖不能暢通河務亦未可全廢此時治河之法不外古人因水所在增立隄防一語查北岸張秋以上至開州境二百餘里有古大金隄可恃爲固張秋以下抵利津海口八百餘里岸高水深應由山東撫臣隨時飭將原有民捻保護加培南岸自安山下抵

利津多傍泰山之麓誠爲天然屏障惟安山以上至曹州
府境二百餘里地形較窪爲古鉅野澤卽宋時八百里之
梁山泊也自宋元迄我朝凡河決入大清之年無不由
此旁注曹單鉅野金鄉各邑甚至吞湖併運漫溢數十州
縣波及徐淮爲害甚烈其侯家林決口現雖堵築堅固惟
上下一百餘里之民埵高者丈餘低者數尺斷難久恃此
處若有一失則西南之通道水櫃復被冲淤廬舍民田更
遭蕩析其患不可勝言且黃河流分勢緩北路原行通暢
入海之道亦恐漸形淤淺或生他變相應請 旨敕下
山東撫臣丁寶楨於秋汛後悉心勘估酌籌欵項將侯家

林上下民埵倣照官堤辦法一律加高培厚若能接築至曹郡西南責成地方印委設法守護更爲久遠之計沿河各州縣民人田地淪入正河身十餘年情殊可憫應查明分別蠲緩錢糧海口鹽場商運各事並隨時酌量變通妥辦又銅瓦鑲決口現已冲寬十里水勢猶日向東坍刷若不設法約攔久必泛濫南趨至於決口以下蘭儀東明境內地勢平行現雖刷有溝槽而中洪不深大汛漫灘仍東西坍漲不定亦不可無遙堤以杜竄越擬請 敕下河東督臣喬松年就近察看形勢應如何量築堤埵與東省曹州之堤相接俾資周防而期順軌綜計自安山上至銅

瓦鑲決口接築南堤距北金堤約六七十里宜作爲遮攔之勢去水較遠取土較易工費較省此六七十里中大水所常漫者不過二三十里所急流者不過三五里在其淤波蕩漾寬緩水勢以漸趨下游寬半里深數丈之大清河則緩急得以節宣不至逼激沖突別尋去路斯爲穩著其堤內河內民田仍可隨時視溜勢之遠近地勢之高低搶種麥禾不至全無收穫似於民生亦無大礙至淮徐故道涸出舊河身千數百里水不復行居民佔種年年豐收並請 勅下江蘇河南山東各督撫分委妥員會同地方官查明酌議升科以免私墾爭鬪之患所有遵 旨籌

議黃運兩河情形謹據管見詳細據實覆陳是否有當伏
乞 皇上聖鑒訓示謹奏

請築修海塘疏

鄒史 洪昌燕

竊維國家歲運漕糧三百數十萬而浙之杭嘉湖蘇之蘇松太實居其半白糧則全仰給於嘉湖軍興後逆匪占踞各郡縣海運南糧初不過數十萬近年採買捐輸日見其少而東南漸次奠定方冀農民復業數年後於 天庾正供不難如額乃臣近接鄉人來書並同鄉人在京者接到南來之信均以海塘年久未修近日坍塌愈甚潮水內灌自仁和海甯交界之翁家壩以至許港其間支港橋梁悉被冲損所過積沙一二尺厚且直齧海甯城根本本年五月二十三二十八兩潮灌入州城將城外寫橋城內堰下

壩全行冲去上溢之處波及仁和地界向來潮汐以八月
望後爲大汛邇日情形更恐有不可問者杭屬在京鄉試
諸生聞信率多南旋爲遷徙墳墓計田廬已難顧及人心
惶惶情形急迫測量家有言海甯地勢最高準以平水海
甯之長安壩與蘇州之吳江塔塔頂相齊一有潰溢如建
瓴然非但嘉湖盡作波臣卽蘇松太皆成澤國查閱本年
夏初督臣左宗棠原奏謂上海向係淡水近日水味忽鹹
查係塘工坍卸潮水灌入所致該督具奏時潮信未大但
就坍卸情形而言而患已如此儻稍稽時日危險各工設
有潰決其害可勝道哉臣思杭嘉湖蘇松太各屬之民久

淪於賊今甫有生機而農民之死亡者大半各屬田塍草
長過人雖盡心鳩集設法開懇廬舍蕩然器具毀失已非
三四年不能生聚設更爲海水淹浸地成斥鹵桑麻不生
何能種稻非得雨水蕩滌四五年土性不能鬆活伏思我
國家所望於南漕未有急於今日者又焉能遲至八九
年後始收其利耶且眼前百姓甫歸故土一遇驚濤駭浪
直瀉橫冲枕席未安復遭蟄溺其爲禍更迅而酷又非賊
來之可以偵探遷避也伏讀雍正十二年
上諭浙
江海塘關繫重大固須詳慎尤戒遲疑
高宗純皇
帝南巡屢次
親臨閱視指授機宜定歲修以固塘

根增坦水石簣以資擁護迭降

恩諭爲民保障豈

惟浙人仰沐

生成大江以南各縣咸資樂利現在

蘇浙蒼生安危呼吸若以軍務尙未肅清稍遲修築或因部議拘牽則例延悞事機內外輾轉因循日就贅溢南漕至計更且視爲緩圖深恐潰決之後雖有千百萬帑金亦束手無從措辦相應請旨飭下浙江江蘇各撫臣趕緊籌商遵照乾隆二十七年諭旨一面奏請一面儻辦惟是經費浩煩必須多方籌畫若如督臣左宗棠所奏飭令蘇浙紳富一體捐輸臣恐沿海各屬之紳富產業多成灰燼骨肉半已彫零加以追呼亦難應命惟有仿照

從前兩江總督程元章請開海塘捐輸事宜凡有戶部捐
銅局所不能報捐各項准在蘇杭設局收捐令各該撫條
列上聞此項捐款奏足工需卽行停止與他項捐輸係屬
有間請 飭部卽行議准並恐捐輸之開尙需月日請
將沿海各郡辦理善後各款先行墊用購辦柴料緣海塘
不修卽善後亦無所措手况以工代賑亦未始非善後之
一端也其籍隸杭嘉湖蘇松太之出仕京外各官應請特
降 諭旨令其從重捐輸並令迅速集解以衛桑梓其
江浙兩省無海塘處所紳衿富戶應由各該撫派委清廉
大員妥爲勸諭廣爲資助以敦鄉誼其餘有可籌款之處

令在事官紳通盤籌畫總期不病民而可以衛民庶幾補
救於先不致决裂於後民命既甦而數百里財賦膏腴之
地不致淹沒則南漕可望復舊於 國計之裨益實非淺
鮮臣爲情勢急迫臚陳衆悃籲懇 天恩謹繕摺具奏
伏乞 皇太后 皇上聖鑒謹奏

奏請以工代賑疏

直隸總督 劉長佑

竊臣承准議政王軍機大臣字寄同治二年十二月十九日奉 上諭譚廷襄奏統籌黃河下游現行地勢擬請

濬支渠以減漲水培土埝以衛農田等因欽此遵 旨

寄信到臣當經移山東撫臣暨署河東督臣籌辦一面行司飭委候補同知李鼎等馳往大名會同該管道府查勘在案計已次第勘估惟定於何時動工興修尙未稟覆查開州東明長垣三州縣被豫境黃水浸灌總因上有來源下無去路各處舊有堤埝迭被冲刷殘缺以致田廬連年水淹據目下情形而論自以培修堤埝爲要策春長無事

水小源微正宜及時興築查河道北徙開州情形最重長垣次之東明又次之就工程約估之計須銀三萬餘兩庫儲支絀勢難籌此巨款不得不斟酌權宜挹彼注茲先其所急因思開東長三州縣上年被水案內業經奏准撥給銀三萬兩改賑爲撫溯查從前遇有災歉每於青黃不接之時籌辦城工隄工俾災民得以力作餬口原有以工代賑之例此次工程正爲軫念災黎保衛田廬起見更非別項工程可比目前田工未興民尙無事若命隨工力作按日給予傭值數口之家藉得以資養贍所有前經奏准賞給撫卹銀三萬兩擬請改作以工代賑庶幾慎重經費無

須另籌刻下節逾清明開工已不爲早亟宜先將經費發
往以便興辦惟地糧不敷支發先在司庫旗租項下借撥
寶銀三萬兩飭委候補知府沈燮同徑行解往開州雖河
道情形開州與長垣東明不同但原案係屬撫卹今改以
工代賑少壯者固可傭趁度日其老弱鰥寡無依者轉不
得均霑寶惠未免向隅且與原案不符擬將前項銀三萬
兩按開州東明長垣三州縣各先酌撥八成銀八千兩共
銀二萬四千兩以作工用其餘二成共銀六千兩暫存開
州仍令該三州縣查明老弱鰥寡無依不能工作者往其
於二成銀內酌量支領散給作爲撫卹儻有餘贖仍查明

該三州縣內工費如尙不敷量加添補如此一轉移間既
於要工有裨而災黎亦無虞失所據布政使王榕吉具詳
前來理合恭摺具奏伏乞

皇太后

皇上聖鑒

訓示謹奏

墳塋禁步應遵定

制疏

四川總督 駱秉章

竊臣於同治五年十二月初三日接准廣東撫臣蔣益澧咨准戶部咨行會議廣東督撫等奏官山塋葬請照山糧升科一摺同治五年三月二十八日具奏本日奉 旨

依議欽此抄錄原奏知照前來竊臣於同治四年閏五月十五日具奏粵省墳山禁步應遵照例定丈尺不宜以省章斷案六月初四日內閣奉 上諭墳塋禁步自應恪

遵定例辦理若概用本省章程等因欽此仰見 聖明

洞燭 諭旨煌煌自當欽遵辦理不意郭嵩燾固執已

見復理前說臣本粵人見聞有素竊謂升科固足昭覆載

之公而禁步仍應遵 皇朝之制不宜舍定例而用章
程臣祖塋被鄧輔廷盜葬之案已結非敢屢以私事冒竇
聖聰第以前署廣東撫臣郭嵩燾陳奏各情涉於迴
護矯強旣舍 朝廷向來通行之定例而用未經奏定畫
一之省章則官吏無所遵循可以高下其手民間愈多侵
佔不免爭鬪日煩有關通省大局且因臣一人祖塋之案
郭嵩燾遽改定例使粵民受無窮之累臣不敢緘默敬請
爲我 皇上縷析陳之如原奏謂粵籍例定官民禁步
恃勢強佔地方官至不能成讞乾隆年間詳定橫直二丈
穿心四丈之章程不論紳民統以橫直各得二丈爲限其

前次來咨又稱粵省穿心四丈章程計由墳心數至邊每面實止一丈與定例庶人塋地九步穿心十八步之說不惟丈尺迥殊卽當日如何用此穿心二字已無可究結等語是郭嵩燾故以穿心二字爲不可解強就其每面各得二丈之說不過欲爲侵葬者開脫罪名遂以穿心四丈前後左右應各得二丈者臆斷爲每面實止一丈固執省章以廢定例竊以例定墳塋丈尺卽所以杜強佔地方官按照例定丈尺斷案何至不能成讞豈斷以 朝廷之定制而敢不遵斷以本省之章程轉相懾服者若謂粵省塋地盡列官山與別省情形不同臣詳譯例定墳塋禁步正爲

官山而設如係契買之業則凡在四至之內無論前後左右若干丈尺皆非他人所能進葬又何必以禁步爲限耶故定例於有主墳地切近墳旁盜葬及止於田園山場內盜葬論罪各有等差是契買之業不必限以禁步可見禁步專指官山而言郭嵩燾於例意未免悞會原奏又稱以省章爲斷丈尺多少出價承受紳民猶可通融辦理以例定禁步爲斷則直授豪強以兼併之資等語查例定墳塋禁步蓋示以一定之限制而後爭端可息若謂斷以省章則丈尺多少出價承受猶可通融是富者力能出價即可踰越於省章丈尺之外貧者無力出價必須拘守於丈尺

之中是以貧富爲強弱而不以曲直定是非也卽此通融二字實授豪強以兼併之資勢必至大啟爭端無所禁止何如有定例可循官民皆知所遵守也事必察其虛實例定墳塋禁步頒行天下二百餘年薄海臣民無不遵守不聞別有豪強藉此兼併向來粵東一省亦不聞有藉此爲兼併之資豈 朝廷之制度久已通行寰宇今獨格於粵東耶原奏又稱近年捐例廣開一命之榮皆得捐請封典按照品級援例爭論禁步則富強有勢力者其侵佔倍甚於從前貧民復何措其手足等語查墳塋禁步官民各有例定丈尺可循揆諸父爲士子爲大夫葬以士祭以

大夫之義總以歿者之有無官職爲斷豈得藉捐請之

封典爭禁步之丈尺而進佔他人之地界耶原奏又稱粵東紳富有勢力者頗多若皆據例定禁步爲詞祖墳附近進葬者皆可援例責以侵葬其已葬者亦可呈請押遷訐訟將無已時等語查歿者若無官職其墳塋禁步應照庶人九步爲斷儻被人侵葬於禁步之內自應控官押遷照例辦理至遠年所葬舊墳彼此已相安於無事亦無人混請押遷設有逞刁妄控者官可繩之以法亦何至訟無已時現今奉 旨升科旣經升科者則官山變爲已業自無豪強侵佔之弊至無力升科者其禁步仍應遵照定

例庶人塋地九步穿心十八步爲限以昭公允而息爭端
不宜以省章定斷益滋侵佔盜葬之風致釀發掘毀棄之
獄總之官山固應升科禁步須遵定例省章流弊孔多必
至紛爭不息有妨大局終不可用郭嵩燾所報省章不過
迴護一己之偏見臣請仍遵定例實關繫通省之風俗相
應請 旨飭下廣東撫臣體察輿情申明定例妥議覆
奏則全粵軍民幸甚臣不勝悚懼屏營之至理合恭摺具
奏伏乞 聖鑒訓示謹奏

A large rectangular table with 11 empty columns. A small tab is visible on the right side of the table.

--	--	--	--	--	--	--	--	--	--	--